

# شخبطة وتخاريف

مجموعتہ قصصیتہ

تألیف

ایمان شحاتہ

طبعة ٢٠١٧

شحاته، إيمان

شخبطة وتخاريف: مجموعة قصصية/ إيمان شحاته - الجيزة:  
أطلس للنشر والإنتاج الإعلامي، ٢٠١٦ .

٢٧٦ ص، ٢٠ سم

تدمك: ٩٧٨ ٩٧٧ ٣٩٩ ٤٥٢ ٥

١- القصص العربية القصيرة

أ - السخاوى، ريم (رسام) ب-العنوان

٨١٣،٠١

# شخبطة وتخاريف

مجموعتہ قصصیتہ

تأليف

إيمان شحاته



رنا للنشر والإنتاج  
ش.م.م. ٥٥٥

**عادل المصرى**

رنا للنشر والإنتاج  
ش.م.م. ٥٥٥

النشر  
والإنتاج  
العام  
ش.م.م. ٥٥٥

**نوران المصرى**

رقم الإيداع

٢٠١٦/١٦٣٥٢

الترقيم الدولى

٩٧٨-٩٧٧-٢٩٩-٤٥٢-٥

الطبعة الاولى

طبعة ٢٠١٧

الكتاب : شخبطة وتخاريف

المؤلف : إيمان شحاته

الغلاف : ريم السخاوى

الناشر: أطلس للنشر والإنتاج الإعلامى ش.م.م

٢٥ ش وادى النيل - المهندسين - الجيزة

[atlas@innovations-co.com](mailto:atlas@innovations-co.com)

[www.atlas-publishing.com](http://www.atlas-publishing.com)

تليفون : ٣٣٠٤٢٤٧١ - ٣٣٠٢٧٩٦٥ - ٣٣٤٦٥٨٥٠

فاكس : ٣٣٠٢٨٣٢٨

\*\*\*\*

## إهداء

إهداء لأمي وأبوياء وجوزي... إهداء لأولادي حبايبي وعيلتي...  
إهداء لكل صديقة طفولة عشت وبعيش معاها أجمل أيام  
عمري... إهداء لأصحابي في الغربة اللي عوضوني ولو بالقليل  
عن غيبة أهلي... إهداء لكل حد رسم ضحكتي وكل حد خلاني  
أتعلم من الحياة.

**إيمان شحاتة**

obseikan.com

## مقدمة

أوقات كثير بنمسك قلم ونشخبط شخبطة ملهاش أي معنى...  
بس بنحس إننا ارتحنا وخرجنا اللي جوانا... وأوقات بنتمنى إننا  
نخرف ونخلق دنيا في خيالنا بعيدة كل البعد عن دنيا الواقع اللي  
عايشينه.

أنا بقى في الكتاب المشخبط ده شخبطت وخرفت بطريقتي...  
غمضت عيني وسرحت بخيالي وخلقنت وألفت واقع غير اللي  
عايشين فيه ليل نهار من ملل وروتين منغص علينا عيشتنا.

اسرحوا معايا وانسوا الواقع.... صفوا ذهنكم.... سيبوا  
نفسكوا.

شخبطوا وخرفوا وخرفوا وشخبطوا.

يسعد أيامكم.

إيمان شحاتة

obseikan.com

# أبيض وأسود

## مقدمة:

بنقابل ناس ونعرفهم سنين... وفي الآخر بنكتشف إننا شايفين  
منهم القشرة وبس... مش كل حد بنحبه لازم يطلع زي ما كنا  
بنتمنى.... أدهم أخوه اتقتل... وفي رحلة بحثه عن الجاني اكتشف  
حاجات كتير....

اكتشف إن في أسود... زي بالظبط ما في أبيض.

obseikan.com

# أبيض وأسود الحلقة الأولى

كانت قاعدة على التسريحة في أوضة نومها... بتسرح  
شعرها اللي فيه خصلات من الشعر الأبيض... بس مش مكبرها  
بالعكس.... مديها جمال ورونق... سمعت صوته الكسلان من  
تحت الغطا وهو بيتقلب على السرير....  
صباح الفل يا أم العريس.

ردت فريال بعصبية مخلوطة بحبة كسوف: بقولك إيه...  
متكبرنيش... دي حياله خطوبة مش أكثر.

رد عليها ذكي وكأن عجبه نرفزتها: الخطوبة بكرة تبقى  
جواز... وهووووب تلاقي جايلك حفيد بيقولك يا نانا فريال  
ههههه .

لمعت فرحة في عينها وقالت بحماس: ده هيبقى يوم هنا...  
بس يجي هو بس.... وحطت الفرشة من أيدها بحزن أدامها  
وقالت له: كان نفسي تقولي يا أم العريس.

قام ذكي قعد على السرير وهو بيخبط كف بكف ويقولها:  
يا لهوي على الستات وسنينها... هو أنا مش لسه قايلك يا أم  
العريس اتقمصتي.

اتتهدت وردت: يوووووووه يا ذكي... أقصد العريس الثاني....  
كان نفسي أجوز الكبير قبل الصغير.

نزل ذكي رجليه من على السرير وهو بيدور بيهم على  
الشبشب: بقولك إيه.. كبير صغير كله نصيب... ده البنات اللي  
اسمها بنات بقى اللي يجي نصيها يجوزها... معدش حد بيقول  
كبيرة وصغيرة... وأنت عارفة إن دماغ أدهم غير زياد خالص.  
ردت فريال: طب قوم كلم الفندق شوف كله تمام ولا إيه....  
لازم حد يبقى واقف على راسهم وإلا هتلاقيهم عكين الدنيا.

صحي على صوت خبطتها على باب أوضته.... داخله شايلة  
كوباية عصير برتقان.... أينعم عندها ١٨ سنة... بس زي ما  
بيقولوا كده جسمها فار بدري.. مشيتها وجسمها تحت عباية  
البيت كأنها ٢٣ سنة ويزيد.... قالت بصوت متعمدة تدلع فيه:  
العصير يا سي زياد.

رد زياد وكأن النوم طار من عنيه:







خرج أدهم من عند زياد لقي إسلام في وشه... وابتسامه  
قاله:

صباح الفل يا عريس... عاوزينك ترفع راسنا انهاردة.

خرجت وراه فريدة من الأوضة وهي بتقول لإسلام: سيب  
أخويا في حاله يا إسلام... انهاردة هو يؤمر وبس.

رد أدهم: آه يا أختي والله... قولي لجوزك يحل عني مش  
فايقله... كفاية الفيت والباكس اللي جوه.

نزل تحت... كانت فريال شايله بوكيه ورد رقيق بإيد... وبتقرأ  
الكارت اللي في الإيد الثانية وعلى وشها ابتسامه.

سألها أدهم: من مين الورد ده يا ماما؟؟؟

ردت فريال بحسرة: من دكتورة ملك يا أدهم.... واتهدت  
وقالت: ياما كان نفسي يا أدهم أنت وملك...

قاطعها أدهم: تاني يا ماما؟؟؟... احنا اتكلمنا كتير في  
الموضوع ده... ملك أي حد في الدنيا يتمناها... بس أنا خلاص...  
اخترت مريم... وانهاردة خطوبتنا يا ماما.

ردت فريال بحزن: ربنا يتمملك بخير يا حبيبي.

في المايك كان اللي مسئول عن الذي جي بيقول:

ياللا يا جماعة... الكابلز يتفضلوا على الاستيتج علشان  
رقصة سلو جماعية مع العريس والعروسة.

كان أدهم عرقان وملبوخ... سألته مريم: مالك يا أدهم في  
إيه بس؟؟؟

رد أدهم وهو بينشف عرقه: في إني مبعرفش أرقص ولا بحب  
أرقص وأنت عارفة.

ردت مريم وهي بتبص يمين وشمال خايفة يكون حد سمع:

معلش هما دقتين وخلص... بس خد بالك بقى يا أدهم  
مدوسش على رجلي تاني... رجلي وجعتي من الرقصة الأولى.

في خاتمة الأغنية الرومانسية فجأة الذي جي غير لموسيقى  
صالسا... الكل بطل رقص... لكن زياد دخل وسط الدائرة مع

بنت زي القمر... برقصة صالسا ميقلس فيها عن المحترفين...  
بطريقة استعراضية بحركات شقيلة... كان بيثيل البنت اللي

معاه ويحطها كأنها حتة عجينة طوع إيده.. وسط انبهار من  
كل الموجودين.. وسط نظرات إعجاب من كل بنات الفرع اللي

مخلوطة بنظرة حسد لصاحبة الحظ السعيد اللي ما بين إيديه



# أبيض وأسود

## الحلقة الثانية

وفجأة سمعوا صوت خبطة وحاجات بتتكسر وسعاد بتصرخ  
الحقيني يا ست فريال... الحقني يا سي ذكي.... الحقونا يا  
نا!!!!!!!!!!!!!!!!!!!!!!!!!!!!!!س.

جري ذكي وفريال على المطبخ... كانت صباح على الأرض  
مغمى عليها.. وجمبها كام طبق متكسر... وسألت فريال بخوف:

إيه اللي حصل يا سعاد؟؟؟؟؟

ردت سعاد مذعورة: معرفش يا ست فريال... كانت بتغسل  
المواعين ورايحة ترص الأطباق وتجيب لسي ذكي مايه وقعت  
مسورقة.

كان ذكي بيشمم صباح إزازه برفان... بدأت تفتح عندها  
وتتبه.... سألتها فريال بلهفة:

أنت كويسة يا صباح؟؟؟

ردت صباح بإرهاق: أيوة يا ستي متخافيش... أنا بس اتلهيت  
في الشغل انهاردة ونسيت أكل.

اتتهدت فريال وقالت: خديها وعلى أوضتكم يا سعاد...  
مفيش حاجة تتعمل تاني انهاردة... كلنا مرهقين... واللي فاضل  
يتأجل لبكرة... أو عنه ما اتعمل خالص.... وطلعي الأكل اللي  
نفسكم فيه من التلاجة... وعشيها كويس.

الصبح كانت فريال وذكي وإسلام وفريدة بيظفروا... أخذت  
فريدة حطة جبنة وبدأت تفردها على التوست وهي بتقول:

مش تباركوا لإسلام... خلاص هيفتح شركته أهه.

رد ذكي وهو بينزل فنجان الشاي من على بقه بسخرية:

شركته!!!!!! شركة مرة واحدة!!!!!! منين يا سي إسلام بقى  
الشركة دي؟

رد إسلام بارتباك:

أأ... أخذت قرض يا عمي... وهبقى أسدده على أقساط.

رد ذكي بنفس السخرية: قرض!!!!!! والقرض ده مش بيعتاج  
ضمان؟؟؟ ولا البنوك بقت بتوزع قروض على خلق الله؟؟؟؟

من تحت التراييزة خبطت فريال رجل ذكي علشان يسكت...  
وضيعت في الموضوع وقالت:



بعد ما خلص أدهم محاضراته... راح مكتبه... هو مش  
مكتبه لوحده.... مشاركته في نفس المكتب مكتب ملك... المعيدة  
معاه في نفس الكلية.

كانت على مكتبها كأنها مستتياه... قلبها دق مع الأوكرة وهي  
بتنزل لتحت يفتح الباب... استقبلته بابتسامة كبيرة... راحت لما  
لمحت لمعة الدبلة في إيدته اليمين وهو بيحط الكتاب اللي في إيدته  
على المكتب.

قالت له وهي بتتصنع الفرحة: ازيك يا دكتور أدهم... ألف  
مبروك.

رد أدهم: الله يبارك فيكي يا دكتورة ملك... أنت مجتيش ليه  
امبارح... مش الدعوة وصلتك!!!

قالت له وهي بتداري حزنها: معلىش... كان في ظروف كده...  
أنا بعث لك ورد... شوفته؟

أدهم: أه شوفته... بالمناسبة... عاوز أقسم سكشن ب بيني  
وبينك... النص أمتحنه أنا شفوي وأنت تمتحنيه تحريري...  
ونعكس.

ردت ملك بجديية وهي فاهمة إن أدهم بيهرب من كلامها :

تمام... أنت كده تاخذ ٢٥ وأنا ٢٥

أدهم: بس السكشن مش ٥٠... دول حوالي ٤٥ أو أقل...  
استتى نحسبهم سوا... وجاب أدهم كشف بأسماء طلبة  
السكشن.... وراح على مكتب ملك... وقف جنبها... حط الورقة  
على المكتب... وبدأ يعد الطلبة.

مكانتش مركزة إلا في صوت نفسه.... كانت مدققة في كل سم  
منه... كأنها شايفة كل خط في قميصه بدأ منين وخلص فين...  
فاقت على صوت خبط على الباب... وواحدة داخله بتسلم على  
أدهم... وبتقوله مش يالا يا أدهم بقى هنتأخر.

رد أدهم: معرفتكوش ببعض.... دكتورة ملك معيدة معايا في  
القسم.... مريم خطيبتي.

احمر وش ملك ووقفت مادة إيديها علشان تسلم على  
مريم.... أتأخرت مريم على ما رفعت إيديها لملك وكأنها قاصدة  
تخرجها... وبطراطيف صوابعها سلمت عليها... مع نظرة من  
فوق لتحت مش مريحة.... وكملت يالا يا أدهم هنتأخر.

في العربية سألها أدهم: أنت إيه اللي خلاكي تيجي  
الجامعة.... مش كنا متفقين نتقابل بره!!!!

ردت مريم: وأنت خايف من إيه؟؟؟.... عادي يعني... لقيت نفسي خلصت اللي ورايا قولت أجيلك... إيه المشكلة في كده؟؟؟  
رد أدهم: مفيش مشكلة.... بس ده مكان شغل... بقولك إيه... هو لازم عيد ميلاد صاحبتك ده؟؟؟

ردت مريم بصوت بدا عليه العصبية: أه لازم... وقايلالك عليه من أربعة أيام... وهي حضرت خطوبتنا امبارح.

رد أدهم: وطب ولازمته إيه موضوع اللبس ده؟؟؟

ردت مريم: علشان لبسك كله كلاسيك... وده عيد ميلاد كاجوال... مينفعش تروح بينطلون كلاسيك وقميص مخطط يعني... ممكن تسييلي نفسك وتخلي عندك ثقة فيا.

في العيد ميلاد كان واقف لوحده... ماسك كاس فيه عصير في إيده... ومريم كانت بتلف هنا شويه وهنا شويه.... لما لفته واقف لوحده راحت له وسألته:

مالك واقف كده لوحدهك.... يا ابني اتعامل واتعرف عادي... كلهم هنا عشرين.

رد أدهم بارتباك: أنا معرفش حد.... ولو سمحتي متسيينيش وتروحي تاني... أنا جاي علشانك أنت... وفعلاً زهقت أنا مش برتاح في الزحمة.

ردت مريم بعصبية: هو يا أدهم كل ما نروح في.....

قاطعتها مها.... سيدي يا سيدي على العرسان... واقفين  
ومندمجين.... كان ليا عندك طلب يا دكتور.

رد أدهم بارتباك: أه طبعاً اتفضلي.

ردت مها: أنا ليا ابن خالتي عندكم في الكلية... هو مش  
بيحب يحضر وكده يعني... موضوع الدراسة ده مش في مخه...  
بس قالوا السكاشن وكده عليها درجات... فأنت الخير والبركة  
بقى يا دكتور تظبطه في الحوار ده.

رد أدهم: أظبطه!!!! يعني أساوي واحد مستهتر زي ده بواحد  
ملتزم ويحضر... لا طبعاً أسف.

ردت مها بعصبية: مستهتر!!!! إيه قلة الذوق ده!!!! ماتشوي في  
خطيبك يا مريم.

رد أدهم: لولا إنك بنت كنت رديت عليكى.... وسحب مريم  
من أيدها وخرج.

في العربية كانت مريم في قمة عصبيتها: كان ممكن تقول  
لها أسف وخلص... تعذر بأي حجة.... تقولها معرفش الدكتور  
بتاعه... لازمتها إيه تخرجني مع أصحابي؟؟

رد أدهم بنرفزة: أنا لو كنت أعرف إنك وخذاني معاكي  
واسطة مكنتش جيت.

ردت مريم: واسطة!!!!!! وعقدت دراعتها أدام صدرها.....  
أدهم... أنا عاوزه أروح.

وصلها أدهم من غير ولا كلمة بينهم... وروح بس كانت في  
حركة غريبة في الفيلا... ذكي كان واقف كأنه مستني حاجة...  
سأله أدهم:

واقف كده ليه يا بابا في إيه؟

رد ذكي: والله يا ابني ما عارف... البت صباح امبارح أغمي  
عليها وفوقناها... وانهاردة برده أغمي عليها... أمك طلبت دكتور  
وحيد يكشف عليها... متعرفش عندها أنيميا ولا إيه؟؟

خرج دكتور وحيد من أوضة صباح ووراه سعاد وفريال وهو  
بيكتب روشتة... وسألته فريال: خير يا دكتور وحيد طمني دي  
تاني مرة يغمى عليها؟!

رد دكتور وحيد: أنتوا شكلكوا تعبتوها في شغل البيت يا مدام  
فريال... وده مينفعش... لازم تراعوا إنها حامل.



obseikan.com





ردت سعاد وهي بتمثل القوة: لبست المريا ست فريال...  
هي موتوها أنا عارفة... أبوها وأخوها مش هيسبوها... دول  
صعايدة... وأبوها جه خدها خلاص.

اتفزعت فريال: إيه اللي أنت بتقوليه ده!!! مين يموت مين!!!  
هي فرخة... وأنت إزاي تسيبهم يعملوا فيها كده... اتكلمي  
معاها... شو في مين عمل فيها كده؟

ردت سعاد بنفس القوة: الكلام مات يا ست فريال لما جابت  
لنا العار... وأبوها مش هيخلص عليها إلا لوعرف مين اللي عمل  
كده... أنا هروح أكمل توضيب الحاجة.

سألته ملك باهتمام: مالك!!!

رد أدهم وهو باصص في الورق اللي أدامه:

مفيش بس مصدع شويه... منمتش كويس امبارح.

ردت باهتمام أزيد: طب أنت فطرت!!!

رد: أنا لما ببقى تعبان مش بعرف آكل... شويه كده هطلب  
قهوة وأفوق... أنا هقوم علشان عندي سكشن دلوقتي.

ردت عليه: لا سكشن إيه وأنت تعبان كده!!! ولت شنطتها  
وقامت... أنا هدخل السيكشن ده بدالك.



في حضرتك الموديل ده كمان.... ستايل أمريكي شيك جداً...  
وكمان لما بيتحطله الإكسسوار والتحف مع السجاد والإضاءة  
المناسبة بيدي شكل تاني خالص أحلى كمان... وكملت مسؤلة  
البيع في معرض الأثاث... والموضه كمان دلوقتي إن فرش البيت  
يبقى ماتشنج مع بعضه... يعني كله يبقى واخذ من كله... مش  
كل حاجة منفصلة زي زمان.

ردت مريم بانبهار: حلوة أوي فعلاً... طيب تفتكري ألاقي  
الديكور اللي يكملها فين... أنا بصراحة مش من النوع اللي يسلم  
بيته لمهندسة ديكور تفرش على مزاجها... أنا عاوزه أختار كل  
حده في البيت بنفسى.

ردت المسؤلة: في أماكن كتير احنا بنتعامل معاها... وكمان  
مممكن لو حضرتك هتتعاملني معانا هديكي خصم على الأماكن دي  
كمان.

ردت مريم: كمان!!! طب والله دي حاجة كويسة خالص...  
أنت إيه رأيك يا أدهم!!

رد أدهم: أنا بصراحة مش بحب الفرش المودرن خالص...  
أنا بفضل الفرش الاستيل... بيدي قيمته... أو يمكن هو ده اللي  
أنا متربي عليه.

احمر وش مسئولة البيع واستأذنت وهي بتقول: عموماً  
تشاوروا مع بعض وأنا تحت أمركم... عن إذنكم.

في المطعم جالهم الويتر.... طلب أكله المعتاد اللي مش بيغيره  
كل مرة قبل ما يستأذنها يدخل الحمام ويقولها: خلي محفظتي  
دي في شنطتك على ما أروح الحمام.

كانت بتلعب بالشوكة في طبق اللازانيا اللي أدامها ومش  
بتاكل.... سألها: مالك!!!

ردت باستهزاء: كل ده ومالك!!! أنت ليه كده يا أدهم???

رد: كده اللي هو إيه!!!

ردت: لا ولا حاجة... مفيش... مفيش غير إنك بتكسفني  
في كل حنة... ومع أي حد... أقول يمين تقول شمال... معندكش  
أي استعداد تتغير أو حتى تجرب أي حاجة جديدة... اللبس هو  
هو.... الأكل هو هو.... أنت ليه محسني إن عندك ٦٠ سنة...  
ماتبص لأخوك... انتوا إزاي إخوان!!! هو عايش سنه بمعنى  
الكلمة.... شوف لبسه ولبسك... شوف تصرفاته وتصرفاتك...  
شوف أسلوب كلامك وأسلوب كلامه... أنا بحس إنك طالع من  
فيلم عربي قديم.

رد أدهم بعصبية وصوت عالي: ومدام حضرتك معجبة بيه  
أوي كده... عاوزاني أبقي صورة منه ليه!!! ما الأصل موجود .

ردت مريم وهي بتقف: أنا مسمحلكش يا أدهم تتكلم معايا  
بالطريقة دي... وسابت التراييزة ومشيت .

كان سرحان في كلامها وهو سايق.... ماتبص لأخوك... أنتوا  
إزاي إخوات!!! هو عايش سنه بمعنى الكلمة.... شوف لبسه  
ولبسك... شوف تصرفاته وتصرفاتك... هي فعلاً معجبة بيه!!!  
دي مش أول مرة تقارن بينهم... فاق على صوت سرينة موتوسيكل  
المرور وهو بيوقفه:

حضرتك تجاوزت السرعة المحددة... الرخص من فضلك .

في قسم الشرطة: يا أفندم كل الموضوع إنني نسيت محفظتي في  
شنطة خطيبتي... أنا حتى كنت في مطعم مدفعتش الحساب بس هما  
عارفني كويس وفهموا الوضع... اتأكد منهم... وأنا أسف أنا فعلاً  
كنت سرحان وأنا سايق... مخدتش بالي نهائياً إنني عديت السرعة..  
أنا ممكن أكلها تبعث لي الرخص مع أي حد .

رد الضابط: تمام يا دكتور... أنا هطلعك بضمان وظيفتك  
ومحل إقامتك على مسئوليتي... بس هتدفع غرامة المخالفة .



# أبيض وأسود

## الحلقة الرابعة

كان بيدعي من كل قلبه ميقابلش زياد اليوم ده.... مكانش  
عاوز يشوف أي حد.... فتح الباب... دخل وقفل وراه.. بس  
كانت في حركة غريبة... أباجورة مايلة على جنب... فآزة واقعة  
مكسورة... أثار دم.... وصرخ... زياد.اد.

اتقفلت سوستة كيس الجثث الأسود على زياد... كان البوليس  
بيرفع بصمات... ناس رايحة وناس جاية.... صوت كلام في  
لاسلكي... صوت عربية إسعاف... كان أدهم سامع كل ده كأنه في  
حلم... كان قاعد على الكرسي فاتح زرار ياقة قميصه اللي عادة  
ما بتبقى مقفولة... بس كأنه مكنش عارف ياخذ نفسه.... سأله  
الظابط:

أنا طبعاً مقدر الحالة اللي أنت فيها... بس لو في أي حاجة  
تعرفها تساعدنا ياريت تقولي.

رد أدهم بشرود: أنا حكيت لحضرتك على اللي حصل...  
أنا.. أنا مش عارف إزاي ده حصل!؟

رد الظابط: عموماً احنا كلمنا أستاذ ذكي وهو في الطريق....  
والجثة هتروح المشرحة وفي طب شرعي هيقول كلمته.... وياريت  
حضرتك تشرفنا بكرة نكمل باقي التحقيق... تكون هديت شويه.  
كان واقف بياخذ عزا زياد وعلى وشه معالم الصدمة... مش  
قادر يعيط... مش قادر يتفاعل مع حالة الحزن اللي مسيطرة  
على كل الموجودين... مش عارف يواسي أمه وأبوه وأخته اللي  
في شبه حالة انهيار... لدرجة إن ذكي ساپ العزا ونقل فريال  
المستشفى.... كان واقف جمبه يحيى أنتم زياد... كان شبه  
منهار... في شبه كبير أوي من زياد... نفس ستايل اللبس... نفس  
قصة الشعر.

دخل الفيلا بعد العزا... كان لسه في شوية ستات بيعزوا  
فريدة... وبيطمنوا على حالة فريال اللي دخلت المستشفى...  
لمحته داخل قامت راحت له... وقالت له:

البقاء لله يا أدهم... متقلقش أنا اطمنت على طنط.. ومش  
هسيب فريدة لوحدها... أدهم أنا عاوزه أفهمك إنك فهمتني  
غلط.. أنا يا أدهم أقص.....

قاطعها أدهم وهو بيحك كرافتته السوداء من ياقة قميصه  
الأبيض... أنا مش قادر أتكلم يا مريم... أنا طالع فوق.. لو في  
أي حاجة حد بيعت لي.

في قسم الشرطة كان أدهم يحاول يوصل لأي حاجة في قضية  
قتل زياد بس كل حاجة كانت غامضة ومجهولة... قاله الطابط:

الطب الشرعي يقول إن سبب الوفاة الضرب بفازة كريستال...  
اتسببت في كسر في الجمجمة ونزيف داخلي أدى للوفاة.... مفيش  
أي بصمات للأسف في المكان غير بصمات أهل البيت... ومفيش  
أي دليل على دخول البيت بالقوة... وطبعاً حضرتك عارف إن  
مفيش أي مسروقات... يعني القتل بدافع السرقة مستبعد... كل  
الحرز اللي لقاها الطب الشرعي غير أداة الجريمة.... جزء معدني  
صغير... دي صورته.

أخذ أدهم الصورة وبص فيها وسأل الطابط:

ودي عبارة عن إيه؟؟؟

رد الطابط: متوصلناش لحاجة... ممكن تبقى حلية في لبس...  
جزء من خاتم... جزء من إكسسوار... بصراحة مش مفهومة لحد  
دلوقت..... أنت بتتهم حد معين يا دكتور أدهم!!!

رد أدهم: أنا كنت بعيد عن حياة زياد... مكنتش أعرف أي  
تفاصيل عنه... معرفش صحابه ولا علاقاته... وندمان دلوقتي  
إني مقربتلوش... مكنتش أعرف إنه هيسيبيني لوحدي كده.

رد الطابيط: عمومًا يا دكتور احنا على تواصل.... ولو في أي حاجة جديدة ياريت تبلغني فوراً... ده الكارت بتاعي وعليه رقمي الشخصي.

دخلت عليه فريال بفرجان قهوة.... بتحاول ترسم ابتسامة كدابة على وشها وهي بتفتح الستاير علشان النور يدخل وقالت:

وبعدين بقى في الكسل ده يا أدهم.... ما تصحى بقى

الساعة بقت ١١.... بس اتفجأت إنه أصلاً في السرير صاحي...

كملت.... يا ابني أنت هتفضل على الحال ده كثير!! أنت بقالك

أسبوعين مبتخرجش من أوضتك.... حتى جامعتك مبتروحاش...

ملك كلمتي وبتقولي مبتردش عليها.... حتى مريم جات كذا مرة

ومرضتش تنزلها... هتفضل كده لحد إمتي؟؟؟ وبدأت تعيط...

كفاية يا ابني حرقة قلبي على أخوك.... طمني عليك يا حبيبي.

رد أدهم: متقلقش يا ماما أنا كويس... أنا بس حاسس إنني

مضروب على دماغي... بس هفوق... أكيد هفوق... واللي عمل

كده مش هسيبه.... مش هسيب حق زياد يا ماما... أوعدك.

ردت فريال: اهتم بمستقبلك وحياتك يا ابني... ابعده عن

المشاكل... أنت دلوقتي اللي ليا... في بوليس يعمل الحاجات دي...

وقامت وهي بتمسح دموعها... قوم يالا قوم... قوم احلق دقنك

دي وخذ دش على ما أحضر لك الفطار.

رد أدهم: خلي سعاد تحضره يا ماما... أنتِ شكلك تعبان.

ردت فريال وهي بتلم هدومه اللي مرمية على الكنبه....  
سعاد!!! ما خلاص سعاد مشيت من كام يوم.... الله يكون في  
عونها هي كمان... ويصبرها على ما بلاها.

رد أدهم باهتمام: ليه يا ماما في إيه؟

ردت: أنت متعرفش.... واتتهدت وهي بتقول... صباح تعيش  
أنت... ماتت قبل حادثة أخوك بيومين... بس أنا خايفة يكونوا  
عملوا فيها حاجة.... أكيد أخوها هو اللي عمل كده... سعاد  
قالت لي إنه حالف يموتها ويموت اللي عمل فيها كده... يالا ربك  
يستر على ولياك.

انتظر أدهم من السرير وهو بيدور على لبس يلبسه....  
سألته فريال:

رايح فين يا أدهم!!!

رد أدهم وهو مستعجل: مشوار مهم يا ماما... مهم أوووي.

رد الطابط على أدهم وقاله: الكلام اللي أنت بتقوله ده كلام  
خطير... كلام فيه إجراءات تانية خالص.... إجراءات استخراج  
جتين... وعمل تحليل دي إن إيه... وتشريح جثة صباح علشان

نشوف إذا كانت اتقتلت ولا ماتت موتة طبيعية... ونعرف الحمل اللي في بطنها يخلص زياد ولا لا.... ودكتور هيروح في داهية لأنه طلع تصريح دفن لحالة موت طبيعي وهي قتل... وأعراض وحسابات تانية خالص يا دكتور.

رد أدهم: أنا عارف يا حسام بيه... بس أنا حلفت ما أسيب خيط إلا وأمشي وراه لحد ما أعرف مين عمل كده.

رد حسام: يعني أنت بتتقدم بمحضر رسمي؟؟؟

رد أدهم بعد تردد: أيوة يا حسام بيه... أمشي في إجراءاتك.

كان بقاله فترة مرحش الجامعة... كانت بتستناه كل يوم.... حاولت تكلمه أكثر من مرة كانت دايماً فريال هي اللي ترد عليها.... كانت مقدره أوي اللي هو فيه.... بتعلم تقف جمبه وتواسيه.... دخل... الحزن كان مسيطر على كل ركن في ملامحه... كأنه منمش من سنين.... دقنه طويلة على غير العادة... أول ما قعد قامت ناحيته بفسطانها الأسود:

أنا حاولت أكلّمك كتير... كنت بطمن عليك من طنط... طمني عليك.

رد أدهم: واللّه ما عارف أقولك حتى مالي... أنا جوايا ألف إحساس كلهم مختلفين... أنا تعبان أوي يا ملك.









وكملت... أنت عارف.... لولا إني مقدره كويس... وكويس  
أوووي اللي أنت فيه... كنت طردتك من البيت اللي أنت واقف  
فيه معمطلوش احترام ده... بس أنا هكتفي بكده.... وقلعت  
الدبلة... وحطتها في إيد أدهم.... وطلعت أوضتها.

رن موبايل أدهم... بص على الشاشة... كان الظابط حسام:

دكتور أدهم.... ياريت حضرتك تشرفنا شوية.

في قسم الشرطة كان أدهم أدام حسام اللي بعد ما بص في  
ورق كتير وتقارير أدامه قال لأدهم:

للأسف يا دكتور أدهم... الخيط اللي كنا ماشيين وراه وصلك  
لحاجة واحدة بس... إنك ظلمت أخوك.... تحليل الدي إن إيه  
للجنين أثبت إن مالوش أي علاقة بدي إن إيه زياد.... يعني مش  
ابنه.

اتصدم أدهم وكأن حد كب ميه مغلية على راسه وسأل: أمال

ابن مين!!!

رد حسام: للأسف محدش عارف... ولحد ما البننت ماتت  
ماقلتش حاجة.... وعلى فكرة... سبب وفاة صباح علي عبد الله  
انخفاض حاد في الدورة الدموية... يعني متقلتش ولا أي حاجة...

حتى أخوها كان في الجيش يومها... وجاب جواب من وحدة  
تدريبه في فارسكور بدمياط. يثبت وجوده وقت وتاريخ الوفاة...  
ولو إنه اعترف إنه كان أول ما هيخرج كان هيخلص عليها... لكن  
قضاها سبقه... وأنا طبعاً مقدرش أحاسبه على جريمة كان ناوي  
يعملها... ولا إيه يا دكتور!!!

كان أدهم أصلاً مش سامع معظم الكلام.... كان مصدوم...  
أد إيه طلح واطي وحقير.... اتهم أخوه بتهمة حقيرة زي دي هو  
بريء منها... لكنه رد على الطابيط في شرود: أيوة... أيوة طبعاً  
عند حضرتك حق.

في البيت سألته فريال بنبرة حادة:

أنت إيه اللي عملته في مريم ده!!! أنت خلاص اتجننت!!!

رد: هي كلمتك؟؟؟؟

لا مكلمتنيش طبعاً.... باباها كلم أبوك... أنت خلاص بقيت  
ماشى ترمي بلانا على الناس... بص... أنا من الأول أينعم مش  
موافقة أوي على الجواز دي وأنت عارف ليه... بس مادام البنيت  
بقت واحدة من عيلتنا... يبقى هي كلمة واحدة لازم تسمعها...  
بنات الناس مش لعبة في إيدك... ترضى حد يعمل كده في

فريدة؟؟؟؟

اترمى أدهم على الكنبه وهو مرهق: اللّٰه يخليكي يا ماما...  
أنا فيا اللي مكفيني... خلاص أنا هبقى أتصرف... هي فريده  
فين محدش بيشفوها؟

ردت فريال: مبتزلش من أوضتها... وإسلام بيه مشغول  
في شركته الجديدة... محدش يعرف عنه حاجة... أنت في دنيا  
وأبوك في دنيا وأختك في دنيا وأنا تعبت.

رد أدهم: معلش يا ماما... معلش حقك عليا... كل حاجة  
هتبقى كويسة.

حاول يكلمها أكثر من مرة... مكانتش بترد عليه... بعث لها  
رسالة كتب فيها:

أرجوك يا مريم ردي... أنا مخنوق جداً ومحتاجك... أنا  
عارف إني غلطت... بس ده مش وقت حساب.

بس للأسف كان ردها برده في رسالة نصها:

أنت غلطت فيا غلط كبير صعب يتتسي... أرجوك يا أدهم  
متضغطش عليا... ولو حسيت إني قادرة أكلمك... هبقى أكلمك.

كان عامل زي الغريق... مش عارف يتصرف ولا يعمل إيه...  
مسك الموبايل.. فر في الأرقام... طلع رقم يحيى واتصل:

يحيى إزيك... أنا أدهم ذكي... أخو زياد.

رد يحيى: أه طبعاً عارفك.... إزيك يا أدهم.

الحمد لله... أنت نمرتك معايا لأن كان زياد بيسيب لي معظم أرقام صحابه علشان لو تليفونه فصل ولا حاجة نوصله... أنا كنت عاوز منك خدمة.

رد يحيى بتردد: أه طبعاً اتفضل خير.

أنا عاوزك تعرفني على شلة زياد يا يحيى.. أ أ أ أصله وحشني... ونفسي أتعرف على صحابه... يمكن أصحابه يعوضوني غيابه.

رد يحيى باستغراب: أه بس أنا مسافر كمان يومين الساحل مع الجماعة هنا.

طيب اليومين دول تكون عرفتني عليهم... بس عاوز منك طلب تاني.... مش عاوز حد يعرف إنني أخو زياد؟؟؟

يحيى: ليه كده!!!

عادي.... علشان بس ما يتعاملوش معايا بحساسية... بعدين هبقى أقولهم.

رد يحيى: عمومًا هما بكرة هيتجمعوا في كافيه تورينتو....  
هعدي عليك وأنا رايح.

سرح أدهم بخياله... وكأنه بيكلم نفسه: لازم أقرب منهم...  
أكيد حد هيوصلني لخيط... بس هلبس إيه... أنا لبسي مينفعش  
للخروجات اللي زي دي... لازم أشتري لبس شكلهم... أفكر زياد  
بشياكته... دخل أوضته... بص على سريره... كان نفسه يبقى  
موجود عليه زي العادة... فتح دولابه... كان بياخذ هدومه على  
صدره... كانت لسه ريحته فيها.

وفجأة وقعت ورقة من جيب قميص منهم.... فتح الورقة....  
وقال وهو مبرق..

إسلام!!!!!!!!!!!!!!م!!!!!!!!!!!!!!



oboiikan.com

# أبيض وأسود

## الحلقة السادسة

وفجأة وقعت ورقة من جيب قميص منهم.... فتح الورقة....  
وقال وهو مبرق..

إسلام!!!!!!!!!!!!!!م!!!!!!!!!!!!!!

كانت الورقة عبارة عن وصل أمانة مكتوب وممضي باسم  
إسلام لصالح زياد بمبلغ مائتان وخمسون ألف جنيه!!!!!!

في الجامعة حاول يتصل بمريم أكثر من مرة بس كانت زي العادة  
مبتردش... رن موبايله... أخده بسرعة من على المكتب متعشم إن  
تكون مريم هي اللي بتتصل... لكن أحبط لما لقاهها ملك:

ألو.... معلىش يا دكتور أدهم ممكن تشوف أنا نسيت دفتر  
محاضراتي على المكتب بتاعي ولا لا... أنا بدور مش لقياه في  
شنطتي... هتلاقى غلافه أزرق كده.

رد أدهم: أيوة موجود لقيته.... ملك أنت فين؟؟؟؟

سكتت لحظة: ثاني مرة يندهها باسمها... ردت: أنا خلصت  
بدري فقولت أروح.

أدهم: طب ينفع نتقابل بره في أي مكان... أنا محتاج أتكلم  
معاكي... عاوز حد يفكر معايا يا ملك.

سكتت لحظات مش مصدقة اللي بتسمعه... يتقابلوا؟؟؟  
وبره؟؟؟؟ كسرت صمتها بصوت بيترعش: أه طبعاً طبعاً.... تحب  
نتقابل فين؟

في المكان اللي اتفقوا عليه كانوا قاعدين... حط الويتر فنجان  
قهوة أدام أدهم... وكوباية عصير أدام ملك... السكوت كان مخيم  
على الاتنين... هو مش عارف بيبدأ منين... وهي متعرفش هو  
عاوزها في إيه؟؟

بدأ أدهم الكلام: ملك أنا عارف أنت أد إيه قريبة مني...  
علشان كده أنت أول شخص جه في بالي لما حبيت أشارك حد  
تفكيري.

في اللحظة دي بصت ملك على الدبلة اللي لسه موجودة في  
إيد أدهم اليمين وكأنها بتسأل: طب هي فين!!!! بس مقعدتش  
تفكر في الموضوع ده كتير.... كفاية إنه فكر فيها هي يتكلم معاها  
حتى لو مريم موجودة.

حكاها أدهم على كل حاجة.... على كل خيط بيمشي وراه  
يوصله للي عمل كده في أخوه.... وكمل.... أنا ظلمت أخويا يا

ملك... اتهمته في شرفه ظلم... وتاني أكتشف موضوع وصل  
الأمانة وإسلام.... أنا مبقتش فاهم حاجة؟؟

ردت ملك باهتمام: طب هو إيه المشكلة... أنت بتقول إن  
إسلام جوز أختك فتح شركة جديدة... يمكن احتاج مبلغ فقال  
لزياد الله يرحمه وزياد ساعده.

أدهم: يا ملك زياد معندوش أي مصدر دخل لسه... كان  
بيتناقش مع بابا إن بابا يساعده بمبلغ يبدأ بيه مشروع صالة  
رياضية وجيم... والموضوع لسه تحت الدراسة وبيتعمله دراسة  
جدوى... مخدش لسه مليم... جاب متين وخمسين ألف منين!!!!  
ردت ملك بنفس الاهتمام: طب قولي يا أدهم أقدر أساعدك  
إزاي؟

رد أدهم بتردد: أنا هقابل أصحاب زياد انهاردة من غير ما  
يعرفوا إنني أخوه... أنا عاوزك تساعديني أنزل أشترتي حاجات  
مناسبة للأماكن اللي بيروحوها... أنا مبفهمش في الحاجات دي  
خالص.

ردت ملك بمكر: أ أ أ طيب هي مريم ممكن تضايق إنني نزلت  
معاك ولا حاجة؟

رد أدهم بعصبية: خلاص يا ملك بلاش... أنا هتصرف لوحتدي.

ردت ملك بلهفة: لا لا خلاص... قوم بينا يالا.. أنا أعرف كذا محل كنت بنزل مع أسامة أخويا نجيب منهم حاجات حلوة أوي.

كانت أسعد لحظات حياتها... وهما بيلفوا سوا... بتلبسه على ذوقها... بتختار له ألوانه.... بياخد رأيها وهو طالع من كل بروفة... يرتاحوا سوا يشربوا حاجة... يرجعوا يكملوا لف سوا... كانت كأنها في حلم ويتحققه على الواقع... طلع من بروفة لابس تيشرت ليه ياقعة، وزى عادته المش مهممة ياقته مكنتش معدولة... قربت منه بسرعة من غير ما تفكر... عدلت له الياقة... ضهر إيديها لمس خده.

حس إحساس غريب.... أول مرة تبقى قريبة منه أوي كده... أول مرة يركز ويشم برفانها... أد إليه رقيق زيتها... كان أول مرة يدقق في تفاصيل ملامحها... رموشها الطويلة المقلوبة... عنيتها العسلية الفاتحة.... بشرتها الفاتحة.... حجابها اللي مبروز ملامحها وكأنه برواز للوحة جميلة... رفعت عنيتها في عنيه لقيته مركز في وشها... احمرت... رجعت خطوة لورا... وبكسوف تداري بيه موقفها قالت له:

التيشرت ده محتاج جينز أغمق من كده... هروح أشوف مقاسك .

وانتهت رحلة الشوبنج عند صالون رجالي... وقفت ملك توصف باهتمام ودقة هو المفروض يعمل إيه لأدهم اللي ختم الحوار بكلمة خلتها تحمر ثاني... حاضر يا مدام... واضح إن حضرتك بتهتمي بتفاصيل جوز حضرتك أوي .

هو أنتوا متعودين تتقابلوا في الأماكن دي كثير!!! ها يا يحيى!!!! بس كانت دوشة المزيكا مش مغليه يحيى سامع اللي بيقله أدهم:

بتقول إيه يا أدهم!!!!

رد أدهم وهو بيحاول يزعق علشان يحيى يسمع: بقولك المكان هنا دوشة أووووي أنا مش سامع حاجة .

رد يحيى: طب تعالى... العيال قاعدين هناك أهه .

كانت شلة حوالي خمس أو ست شباب... شبه بعض في حاجات كتر... في اللبس الإكسسوار الشعر... شبه زياد بالظبط... بيرقصوا حتى في مكانهم على إيقاع الموسيقى اللي شويه تقلب راب وشويه تكنو وشويه موسيقى ملهاش أي معالم بس الكل بيحرك

جسمه وراسه عليها وكأنهم متومين مغناطيسي.... عرفهم يحيى  
على أدهم على أساس إنه ابن خالته... كان مش فاهم معظم  
كلامهم... بيتكلموا بمصطلحات غريبة عليه وإفيهاش بيضحكوا  
عليها... كان بييجاري الجو على أد ما يقدر... نزل على التراييزة  
كوبايات صغيرة مش عارف فيها إيه... بس اضطر يشرب لما  
لقاهم كلهم بيشرىوا عادي.

بس عرف إيه دي لما لقي كل حاجة بترقص أدامه... حتى  
الستاير كانت بترقص في مكانها...

كانت الساعة حوالي خمسة الفجر... دخل الفيلا... كانت  
فريال بتصلي الفجر... اتخضت لما شافته:

أدهم!!!! أنت كويس يا حبيبي... أنا بحسبك نايم فوق!!!  
أنت كنت بره!!! لدلوقتي؟؟؟؟؟؟؟؟

رد أدهم بلسان ثقيل وهو بيضيق عنيه كأنه بيحاول يركز  
علشان يشوفها: أه يا ماما كنت مع صحابي... اطلعي نامي أنت.

بدأت فريال تاخذ بالها من لبسه: صحابك!!! من إمتى يا  
أدهم؟؟؟ وإيه اللي أنت لابسه ده!!! ومالك مش واقف على بعضك

كده... وضريت على صدرها وهي بتسأله..... أنت سكران يا  
أدهم!!!

رد أدهم وهو طالع على السلم: أنا بس مرهق شويه... أنا طالع أنام.

ردت فريال: أنا ليا كلام تاني معاك ومع أبوك الصبح.. كفاية واحد راح... مش هيبقوا اتنين.... وغلبتها دموعها مقدرتش تكمل ولا كلمة تانية.

صحي يومها الساعة ٣ العصر... مش فاهم أي حاجة في الدنيا غير الصداع اللي في راسه وعنيه المزغلة.

كلمه يحيى في الموبايل: أدهم العيال هتتقابل انهاردة على ١٠ هتيجي!!!!

رد أدهم: أه طبعاً هتلاقيني هناك.

نزل أدهم على سلم الفيلا... لقي مريم واقفة تحت مشبكة دراعها أدام صدرها وبرفعة حاجب قالت له: ده طنط مكنتش بتبالغ بقى.

رد أدهم بارتباك: مريم!!!! أنت هنا!!!! أنا كلمتك كتير مردتيش.

ردت مريم وكأنها مش سامعة: طنط قالت لي إنك رجعت إمبراح وش الفجر... وسكران... وبعدين إيه اللي أنت عامله في نفسك ده... مالك يا أدهم في إيه؟؟؟

رد أدهم بعصيبة: مالك وفي إيه؟؟؟ في إني كنت محتاجك  
جمبي ملقتكيش... في إني أعتذرت لك مقبلتيش اعتذاري... مش  
عاجبك شكلي؟؟؟ مش أنت اللي كان نفسك تشوفيني كده... مش  
طالع من فيلم عربي قديم... روش وستايل... لابس زي سني.

رن موبايل أدهم برقم يحيى يستعجله... بص لها وقال لها:

معلش عن إذنك.... بقى عندي حاجات أهم.

كانت نفس الشلة موجودة ومعاهم ثلاث بنات كمان.... سأل  
واحد فيهم:

هاه يا جماعة هتذكروا منين انهاردة... أنا خرمان فحججحت.

رد الثاني: الله يمسيك بالخير يا زياد... كنت مظبطنا.

رد أدهم باهتمام: هو زياد ده كان بيشرب معاكم؟؟؟

رد واحد تالت: لا الحق يتقال... مكنش بيشرب إلا خفيف  
علشان حوار الجيم بتاعه... ده كان الديلر بتاعنا بس.

وانفجر الكل بضحكات هستيرية.

سأل ثاني أدهم باهتمام: ديلر إزاي يعني مش فاهم؟؟؟

رد واحد من الشلة وهو بيهز راسه على الموسيقى اللي شغالة:



obseikan.com



رد أدهم ببرود: مبروك عليك يا إسلام.... بس مش تعرفني  
الأملة دي كلها منين!!! كلنا عارفين اللي فيها... شغلك الحكومي  
اللي أنت سبته وهو كان مصدر دخلك الوحيد... وعلشان كده  
اتجوزت فريدة وقعدت معنا في البيت... منين ده كله!!!

رد إسلام بارتباك: اتصرفت يا أدهم.... ربك بيرزق.

رد أدهم بعصبية: مبلاش حوارات اللف والدوران دي... وطلع  
لإسلام وصل الأمانة من جيبه وحطه أدام عنيه... أنا عرفت  
كل حاجة... والوصل معايا... وخلي بالك... أنا لو بلغت بوصل  
الأمانة ده هتدخل جوه دايرة الاشتباه في قتل زياد

رد إسلام بتعجب: أنت تقصد إيه يا أدهم!!!

رجع أدهم ضهره لورا في كرسيه وبنبرة مستفزة قال وهو  
بيهوي بوصل الأمانة رايح جاي: وأنا إيش ضمنى إنك تكون  
خلصت على زياد علشان متردش المبلغ اللي عليك!!!!!!!!!!!!!!

رد إسلام وهو بيحاول يتمالك أعصابه: أه... فهمتك... قام  
على الخزنة... فتحها... طلع منها ملف... واداه لأدهم يقراه.

أخذ أدهم الملف اللي كان فيه ورقة إيداع مبلغ متين وخمسين  
ألف جنيه من إسلام لزياد في حساب زياد في البنك بتاريخ قبل

الحادثة بكام يوم... اتكسف أدهم... نزل الملف من إيده... وبصوت حزين قال: وكمان كان عنده حساب في البنك وأنا معرفش!!!

رد إسلام: أنا فاهم اللي أنت فيه يا أدهم... بس اعذرني أنت مكنتش قريب من زياد كفاية... زياد الله يرحمه طلب مني أرد له المبلغ بسرعة لدرجة إنني استلفت من بره... وفعلاً رديت له المبلغ قبل الحادثة بكام يوم.. لأن كان عنده مشاكل في شغله وكان عاوز يظبطها.

رد أدهم: وأنت كمان عارف شغله ولا كان قايلك إيه بالظبط؟؟؟

رد إسلام بتردد: أه يا أدهم عارف... لأنني اتوحت فترة في الموضوع ده... بس الحمد لله ربنا تاب عليا من بعد فريدة... هو اللي مشي في الطريق ده وياما حذرتة... بس لقاها تجارة بريح سريع وكان مشروع الصالة الرياضية مسيطر عليه لدرجة إنه ممكن يعمل بسببها أي حاجة.

سأله أدهم باهتمام: أنت تعرف واحد اسمه شيكو؟؟؟؟

استغرب إسلام: أنت كمان عرفت شيكو؟؟؟ يا أدهم ابعده

عن الحوارات دي... أنت متعرفش الناس دي إيه؟؟

سأله تاني أدهم وكأنه مسمعوش: أنت تعرف شيكو ده مين!!!

رد إسلام: ده واحد اسمه محمد شكري وبيقولوله يا شيكو...  
وكان على خلاف مع زياد .

أدهم: أنا عاوز أوصل للواد ده.

رد إسلام: يا أدهم كفاية اللي حصل لزياد... أنا خايف  
عليك .

في ديسكو تك دخل أدهم واثق من نفسه... مبقاش دكتور أدهم  
بتاع زمان... طلب بنت للرقص... اشتغلت موسيقى صلصا....  
بس خلاص انتهى دوره إنه يقف يسقف زي زمان... كان خلاص  
حفظ خطوات زياد وهو بيرقص... لما كان كل يوم بالليل بيشغل  
سي دي الخطوبة... كان بيعيد اللقطة دي كتييييييييير.... زياد  
وحشه... لدرجة إنه كان بيعس إنه بيتقمص شخصيته وهو لابس  
زي لبسه... بيرقص بخطواته.... كان بيعضن روحه اللي سابته  
لوحدته محتار إذا كان زياد ده كويس وهو ظالمه... ولا شيطان  
واستاهل اللي جراه.

لفت نظر الكل... وراح بهدوء على البار.... وسأل البار  
مان... أنا عاوز شيكو.... رد البار مان وهو بيرج كوباية كوكتيل  
في أيديه: اللي لابس تيشرت أحمر هناك ده.

راح أدهم ناحية التراييزة بثقة وقعد أدام شيكو اللي كان معاه  
تلاتة غيره: أنت شيكو؟؟؟

رد: أيوة خير؟؟

رد أدهم: أنا عاوز مصلحة كده.

رد شيكو: مصلحة!!! آاه... طب ما اللي قالك إني هنا...

مقلكش إني مش بعمل مصالح هنا!!!

رد أدهم بارتباك: لا بصراحة مقليش.

رد شيكو: طيب اسبقني على أول الشارع... هتلاقي هناك

كشك مقفول.... استتاني عنده... أنا ربيعة وأحصلك.

وقف أدهم بعربيته عند الكشك يستنى شيكو... جه فعلاً

متأخرش ومعاه اتنين... سأله شيكو بعصبية: أنت مين ياض

وعاوز إيه!!!!!!

رد أدهم بارتباك: قولتله عاوز مصلحة.

قال شيكو للاتنين اللي معاه: أنتوا مش سامعين ولا إيه يا

شباب... البيه عاوز مصلحة.... ادولوا مصلحة.

ونزلوا الاتنين ضرب في أدهم بطريقة متوحشة.. في بطنه...

في وشه... كسروا نضارته لحد ما تكوم أدهم على الأرض بخط

دم نازل من بقه.

وقال شيكو: قلبوووووه.

فتش واحد من الاتنين أدهم وأخذ محفظته وفلوسه وناولها  
لشيكو اللي فتحها وبرق لما قرأ اسمه بالكامل:

يا نهار أسود ومنيل..... أنت أخو زياد!!! انطق يا ض مين  
اللي باعتك قبل ما أخلص عليك هنا محدش يعرف لك طريق...  
أنت مش أخوك الزفت اتقتل!!! واحشك وناوي تحصله!!!!!!!  
رد أدهم وهو بيتوجع وبيحاول ياخذ نفسه: خليني أحصله...  
بس قبلها قولي... أنت اللي قتلت زياد ولا لا؟؟؟ وبعدها اعمل  
اللي أنت عاوزه.

رد شيكو وهو بيرمي المحفظة في وش أدهم: كان نفسي...  
وكنت حالف لأزفر إيدي بدمه... بس حد سبقني... كان نفسي  
بيقى مكانك دلوقتي.... لو جاي فاكر إنني أنا اللي قتلت أخوك  
أو غيري وهتفضل تدور وراه هتتعب.... علشان الزبالة... بتلم  
حواليها دبان كتير.... يالا يا رجالة.

مكش قادر يسوق من كتر الوجع.... طلع لأقرب شارع  
عمومي... ركن عربيته... طلع تليفونه وكلهما:

ملك.... أنا تعبان مش قادر أسوق... ممكن تجيلي دلوقتي...  
أنا محتاجك في أقل من نص ساعة كانت بتركن وراه... نزلت  
بلهفة من عربيتها... راحت ناحيته لقيته نايم على الدرکسيون....

اتخضت لما بصلها ووشه وهدومه مليونين دم... فتحت باب العربية  
بسرعة وسندته ونزلته... وودته عربيتها ومشيت.

في المستشفى كان الدكتور بيربط له راسه... ويحاول يعالج  
الكدمات اللي في وشه وسأله: حضرتك تحب نعمل محضر  
تعدي!!!

ردت ملك بسرعة: لا حضرتك دي حادثة بسيطة.... قطاع  
طرق والحمد لله إنه كويس.

رد الدكتور: طيب هروح أبص على الأشعة علشان بس أظمن  
إن محصلش أي كسور أو شروخ.

انهار أدهم أدامها... كان حاسس إنه طفل صغير تايه...  
وبعين مليانة دموع قالها: أنا تعبت يا ملك... أنا تايه مش عارف  
أوصل لحاجة... أنا حتى مبقتش عارف أنا مين... أنا أنا...  
ولا أنا هو... أنا بقيت أبص في المرايا أشوفه... أغمض عينا  
أشوفني... نفسي يرجع... نفسي أضربه ميت قلم... وبعدها  
أخده في حضني... نفسي أعرف كان كويس ولا وحش... نفسي  
أرجع أنا زي ما أنا... أنا مبقتش أدهم.... ولا عرفت أبقى زياد...  
مبقتش أبيض... ولا عارف أكون أسود.... بقيت حاسس إن عندي  
انفصام... متسبنيش يا ملك.... متسبنيش.

خدت إيده بين كفوفها... ورفعتها على شفائيفها.... وحطتها  
على خدها اللي مليان دموع... قبل ما يقاطعهم جرس موبايله  
برقم يحيى:

أنت اتجننت يا أدهم... أنت رحى لمحمد شكري.... أنت  
مستغنى عن عمرى؟؟؟

رد أدهم بعصبية: أنت لىك عىن تتكلم... أنت لىه محكتلىش  
عنه... يحيى... لأخر مرة بسألك.... وغلاوة زىاد عندك... أنت  
تعرف إيه تانى أنا معرفوش.

سكت يحيى ثوانى وقال: هى اللى ممكن تكون ورا كل ده يا  
أدهم... هى مفىش غيرها..... حورية

●●●

# أبيض وأسود

## الحلقة الثامنة

سكت يحيى ثوانٍ وقال: هي اللي ممكن تكون ورا كل ده يا أدهم... هي مفيش غيرها..... حورية.

في قسم الشرطة قال أدهم لحسام: يا حسام بيه أنا المرة دي متأكد.... أنا دورت ورا حورية دي... وعرفت إنها وزياد كانوا مرتبطين فترة... لحد ما زياد قرر إنه ينهي العلاقة دي.... ومن ساعتها كل أصحابها بيقلوا إنها اتغيرت تغيير جذري... وكانت دايماً تقول إنها هتموته لو بص لغيرها.

رد حسام: أيوة يا دكتور أدهم... بس ده مش سبب كاي في أبداً للاتهام... كلنا لحظة الغضب بنقول كلام أكيد متحاسبش عليه... وعلى العموم أنا هعملها أستدعيها أخذ أقوالها.

أدام حسام كانت قاعدة بشعرها الأصفر الذهبي... جميلة بس مليانة حزن... هالات عينيها السوداء مغطية جمال لون عنيها الأخضر الفاتح... وبعد الأسئلة المعتادة في أي تحقيق عن الاسم والسن والعنوان وعلاقتها بزياد قالت حورية بيروود شديد وهي بتدخن سيجارة:

أيوة قتلته.... ونفسي يرجع تاني وأقتله تاني... عاوزني  
أعمل إيه بعد ما ضيعت في حبه ثلاث سنين كاملين... عاديته  
أهلي علشانه بسبب رفضي لكل عريس بيتقدم... وفي الآخر أتعب  
شويه... يسيبني!!!! يسيب حورية حبيبته.

سألها حسام: قتلتيه إزاي؟؟؟

ردت ببرود: مش مهم إزاي.... المهم إني شفيت غليلي وخلصت  
منه... وقولتلك لو في أيدي هقتله تاني وتالت ورابع.

بص حسام للي بيكتب المحضر وقاله: اكتب يا ابني... وبناء  
على اعتراف المتهمه... قررنا نحن حسام عبد الفتاح... حبس  
المتهمه حورية محمد الجمال.... أربعة أيام على ذمة التحقيق...  
مع مراعاة التجديد في الموعد... وعرضها على النيابة.

دخل عليها المكتب... كانت واقفة بتبص في أوراق على مكتبها  
وضهرها للباب... لفت لقيته أدامها..... مسكها من ذراعها وهو  
يلف بيها:

أنا أسعد واحد في الدنيا يا ملك.... أخيراً عرفت مين اللي  
عمل كده.... ووقف لحظة وهو حزين... أنا دخلت دنيا عجيبة...  
واكتشفت الدنيا الثانية لزياد الله يسامحه على اللي كان بيعمله...  
أنا هعمله خير كتير باسمه يمكن ربنا يسامحه... بس دلوقتي  
أنام وأنا مرتاح.

وأخذ إيديها بين كفوفه وقالها: أنا من غيرك مكنتش هعمل  
أي حاجة من اللي عملتها.... أنتِ وقفتي جمبي وادتينى كل  
وقتك.... ملك..... تتجوزيني!!!!

اتصدمت ملك من سؤاله... مكانتش مصدقة اللي بتسمعه....  
وسألته باستغراب:

طب ومريم يا أدهم؟؟؟

رد أدهم بسخرية: مريم!!!! مريم سابتي وسط الطريق يا  
ملك... مريم عمرها ما حبتني... محدش بيحب حد ينتقده كل  
دقيقة... أنا غلطت من الأول لما اخترت مريم... وأنا عارف وواثق  
إنك بتحبيني.

حطت وشها في الأرض وهو غرقان دموع... رفع وشها لفوق...  
ومسح دموعها وقالها: حقك عليا يا ملك... أنا هعوضك عن كل  
يوم بعدت عنك فيه.. أنا... أنا... أنا بحبك يا ملك.

ابتسمت وسط الدموع واطرمت في حضنه.

في الفيلا كان الكل بيجهاز للخطوبة... قالت فريال:

مش كنا عزمنا باقي الناس يا أدهم... كده ناس كثير هتزعل.

رد أدهم وهو لابس الأسموكن الأسود بباييون شيك فيه فص  
بيلمع... ودبوس في جاكيت البدلة مكتوب عليه ملك:

يا ماما أنتِ عارفة إنني رافض إن أعمل أي هيصة علشان  
زياد الله يرحمه... واتفقنا على حاجة ضيقة كده في بيت ملك...  
في الفرح ابقى اعزمي اللي أنتِ علوزاه.

في الوقت ده لقي مريم داخلة عليه بوش شاحب... سابتهم  
فريال لوحدهم... بصت له وقالت له:

خلاص يا أدهم هتخطب!!!

رد أدهم: أنتِ اللي بيعتي يا مريم... سبتيني في عز احتياجي...  
غلطت في حقك واتأسفت بدل المرة ألف... كنت ضايع وبلطش...  
كنت بشك حتى في نفسي... كنت أوقات بقول يمكن أنا اللي  
قتلته وأنا مش في وعيي... كان لازم تستحمليني... هزيتي ثقتي  
في نفسي بنقدك المتواصل ليا... لا كلامي ولا شكلي ولا لبسي ولا  
أي حاجة عاجباكي.... هي ادتني كل حاجة حرمتيني أنتِ منها.

ردت بدموع: بس أنا بحبك يا أدهم... بحبك وكنت مجروحة  
منك أوي... أنا غلطانة أنا عارفة... بس الجرح لما بيعي من حد  
بتحبه بيبقى صعب أوي.

رد أدهم: خلاص يا مريم معدش ينفع... أنا قلبي حتى  
مبقاش معايا... بقى معاها هي... أنا أسف أوي لازم أمشي أنا  
اتأخرت.

ودخل لفريال في المطبخ وهي بتوضب حاجات: ماما... أنا  
هروح أخذ ملك من الكوافير.... هنطلع على مكان مفتوح نتصور  
تكونوا أنتوا سبقتونا على بيت ملك واحنا هنحصلكم.

كانت خارجة من الكوافير زي البدر في تمامه.... بفستانها  
الهادي وحجابها ومكياجها الخفيف.... قابلها ببوكيه ورد أزرق  
بلون فستانها... ركبت جمبه وهي في قمة كسوفها... أخذ إيدها  
وباسها وبصوت حنين قالها: مبروك يا أرق عروسة... ليكي عليا  
أعوضك وأعملك فرح متعملش لحد.

ردت بكسوف: ميهمنيش فرح ولا دوشة ولا ناس... يهمني  
إنك تبقى جمبي وبس.

كان الفوتوجرافر حاسس بكمية الحب بينهم... مكانش بيغلب  
أبداً أن يديهم أي وضعية تصوير.... الرومانسية كانت مخيمة على  
المكان الهادي اللي اختاروه.... بورده وشجره وإضاءته الخافتة.

وصلوا أدام البيت وقالها: طب ينفع كده... متعملوش حساب  
ركنة عربية العريس!!

ضحكت وقالت له: طب بص أنا هنزل أنا علشان فستاني  
ميتهدلش من المشي... وهقول لخالو ينزل يحرك عربيته وتركن  
بداله أدام البيت.

نزلت... كان متابعتها بابتسامة وهي نازلة ورافعة الفستان  
علشان تعرف تمشي... اتمنى يشوفها بالفستان الأبيض... قطع  
حبل أفكاره رقم حسام على موبايله: دكتور أدهم ممكن تشرفنا  
شوية!!!

رد أدهم باستغراب: خير يا حسام بيه... أنا مش هقدر  
أجي... أنا خطوبتي انهاردة... طمني بس خير.

رد حسام: والله مش خير أوي يا دكتور... والد حورية جاب  
شهادة إنها بتتعالج نفسياً من فترة كبيرة... وده سبب إن زياد  
أنهى العلاقة معاها... والأغرب من كده... إن والدها جاب من  
مصحة في روما ما يثبت أنها قبل فترة الحادثة بأسبوعين وبعدها  
بأسبوع كانت في المصحة بتتعالج.

قفل أدهم مع حسام من غير حتى حسام ما يكمل كلامه....  
كان في حالة ذهول... لفت نظره حاجة بتلمع مكان ما كانت ملك  
قاعدة... هو شاف الحاجة دي قبل كده مش فاكر فين.... أيوة  
أيوة.... افتكر.

دخل أوضتها.... كان صحباتها البنات معاها بيظبطولها باقي  
المكياج... خرجوا بره لما شافوه... طلع الجزء المعدني وسألها...  
إيه ده؟؟؟

ردت بتلقائية: آه ده من الانسيال بتاعي.

رد وهو بيحاول يمسك دموعه: الجزء ده كان زيه جمب زياد  
لما اتقتل... قتلتيه ليه؟

ومن غير ولا كلمة افتكرت اللي حصل بصورة أبيض وأسود...  
وبصدى صوت....

لما كانت مودية ورق امتحانات السيكشن لأدهم البيت علشان  
عارفة إنه تعبان... فتح لها زياد وكان مش في وعيه... كان شارب  
يومها بسبب خناقة مع محمد شكري... سألته: هو دكتور أدهم  
موجود لو سمحت!!!

وبعد بصة مسحت جسمها: آه طبعاً... هو فوق... اتفضلي.

ردت ملك: أنا دكتورة ملك... وكنت جيباله الورق ده علشان  
عارفة إنه تعبان.

رد زياد بمكر: آه.. آه ده تعبان أووووي... اتفضلي اطلعي له  
فوق.

طلعت ملك ودخلت أوضة أدهم اللي مش موجود فيها...  
رجعت خطوة لورا... خبطت في صدر زياد... وسألت بارتباك:  
أدهم مش هنا؟؟

رد زياد وهو بيحاول يلمسها: أدهم إيه وبتاع إيه بس... بلاه  
أدهم... في زياد.

افتكرت لما زفته ونزلت تجري على السلم لحقها تحت....  
وقعها على الأرض... كانت بتحاول تبعده عنها.... انسيالها شبك  
في شراشيب السجادة... شدته... اتقطع منه جزء وفضل في  
السجادة... ملقتش أدامها غير الفازة الكريستال... ومن غير  
ما تحس كانت فوق راسه.. وهو واقع جمبها غرقان في دمه....  
قامت وجريت على الباب اللي كان لسه مفتوح... وخرجت وهي  
مذعورة... مشفهاش حد وهي داخلة ولا خارجة... كلهم كانوا  
مسافرين.... حتى غريب البواب كان بيعزي في صباح.

وكانت آخر نظرة لأدهم وهي في البلكونة بتبص عليه وهو  
بيدور عربيته وماشي.... وقرابيهها والمعازيم جاين على أول الشارع  
بصوت كلاكسات الزفة... الممزوجة بسارينه عربيات الشرطة.

..... تمت بحمد الله.....

# كوما

## مقدمة:

مين فينا ما بتحنش للي فات... مين مش بيشتاق للماضي  
اللي من غير أي مسئولية؟؟؟

مين ما اشتاقش لناس راحت وندم على ناس عرفها؟؟؟؟

مين فينا متمناش تبقى علا!!!!!!!!!!!!!!!!!!!!!!

obseikan.com







في البيت... ولا على النيش اللي ادغدغ ميت حته.... ولا  
على أعز هدية عندها.... اللي راحت زي ما صاحبها راح.  
بعد المغرب رن جرس التليفون.... كانت صاحبته الأنتيم مها....  
رد أحمد عليها... بس للأسف علا كانت قافلة أوضتها عليها  
مش عاوزة لا تكلم حد ولا تشوف حد.

مها: ليه يا أحمد إيه اللي حصل؟

أحمد: والله يا مها العادي بتاع العيال بس علا هي اللي بقت  
حساسة بزيادة.

مها: طب بص يا أحمد أنا هعدي عليكم أخذها تفك  
شوية.... بس هطلب منك طلب.... ممكن تخلي يوسف وجنى  
معاك.... ساعتين بس.

أحمد: ولو إني عارف إني هندم.... بس ماشي أهني تريح  
أعصابها شوية.

وصلت مها عند علا في البيت اللي اتخرجت واضطرت تطلع  
تقابلها.... مها:

ياللا يا علا البسي وتعالى معايا.

علا: أنا مش عاوزة أروح في حته.











خرجت علا من باب أوضتها بتجر رجلها.... إيه ده....  
باباها على السفرة أهه... بجلاييته... بدقنه البيضة... بوشه  
الحنين السمح اللي مليان نور.

انهارت علا.... ودموعها كانت مفرقة وشها... ومحستش  
بنفسها إلا وهي زي العيلة بتجري وتترمي في حضن الحاج  
صلاح.... أبوها.

صلاح: بسم الله الرحمن الرحيم... مالك يا بنتي في إيه...  
أنتِ كنتي بتعلمي بكابوس!!!!!!

لكن علا مكانتش عارفة تتطق.... كانت منهاره بمعنى الكلمة...  
عمالة تحضن في الحاج صلاح.... بتشم ريحته اللي وحشتها...  
ومستمتعة بإيده اللي بتملس على شعرها بحنان الدنيا وما فيها...  
خرجت ماجدة مخضوضة: مالك يا علا... في إيه يا حاج.... إيه  
اللي حصل!!!!!!

صلاح: معرفش يا حاجة... علا شكلها مكوبسة... شغلي  
القرآن... واطلقي البخور في البيت... وأنتِ يا بنتي... قومي  
اتوضي وصلي ركعتين وأنتِ تهدي... أنتِ كده هتتأخري على  
كليتك.





ومشييت علا تدور على مها لكن قابلته في وشها... كريم...  
حبها القديم... وحب عمرها الأول... قصة حب خدت من حبها  
تلات سنين جامعة... ورجعت تفتكر اللي حصل منه... لا لا ده  
اللي لسه هيحصل:

كريم: أنتِ مبتجيش ليه الكلية بقالك ٣ أيام؟؟

علا: احمد ربنا إنها جات على ٣ أيام.... أنا إسلام كان  
حالف ما ينزل الجامعة تاني... ما أنتا نايم في العسل... إسلام  
شافنا واحنا مع بعض في الكفتريا اللي أدام الجامعة... وعملي  
مشكلة في البيت... وكان على تكة إنه يقول لبابا... وماما عرفت.

كريم: يعني إيه يعني..... مش هعرف أشوفك تاني!!!!!!  
علا: أنا بقولك إيه تقولي إيه.... بص.... إيه رأيك لو تكلم  
إسلام... أو حتى تكلم ماما... تعرفهم إنك ناوي تتقدم أول ما  
تخلص.... وكمان يطمنوا شوية.

كريم: أنتِ مجنونة!!! أكلم مين!!! وأكلهم أقولهم إيه...  
أقولهم أنا ماشي مع بنتكم!!!! فاضلي سنتين في صيدلة... ولسه  
جيش... ويا اشتغل يا مشتغلش.

علا: ماشي مع بنتهم!!!!!!!!!!!!!!!!!!!!!! وأنت لما ارتبطنا مكنتش  
عارف ده كله!!!!!!



روحنت بيتها... شممت ريحة الملوخية بتاعة مامتها... يااااه  
أكل مامتها وحشها.... معقولة تروح تلاقي أكلها جاهز... والبيت  
نضيف... وتتام وقت ما تحب.

قعدت على السفارة مع أمها وأبوها.... جو البيت الدايفي...  
وسألت أمال فين إسلام!!!!!!

ماجدة: إسلام طلع إسكندرية هو واتنين أصحابه... بيقول  
رايحين يجيبوا مراجع وكتب و.....  
صرخت علا: لا يا مامااااااااااااااااا لا.



obseikan.com



إسلام: أنتِ إيه رأيك في أميرة!!!!

عرفت علا نيته... زمااااااان وقتها طارت من الفرع لما  
سألها السؤال ده... وقعدت تشعر في أدبها وأخلاقها... وأد إيه  
هيبقى خسران لو مكانتش من نصيبه لكنها عاشت... قصدي  
هتعيش المستقبل... وعرفت إن أميرة هتبقى سبب في مشاكل  
كتيييييييييير .

إسلام: علا أنتِ مبروديش ليه!!!!!!!

علا: مش عارفة أقولك إيه يا إسلام... بس أنا مش  
هغير قدر... وبصوت حزين مع دموع قالت له: مبرووووك.  
كانت عارفة إن دي بداية إن أخوها يروح منها... يتغير عليها...  
ينسى إن ليه عيلة... ومش بس كده... ده شبه هينساهم كمان.  
أيام وهل شهر الخير... علا من زماااااااان محستش بالشهر ده  
كده... مع إن هو هو رمضان اللي بيجي كل سنة... رجعت تختم  
القرآن مرة واثنين وتلاتة... لما كانت في بيت أحمد كانت يادوب  
تختمه مرة بالعافية.. يوسف وجنى ماكنوش مديينها أي فرصة  
لوقت عبادة.

ريحة اللمة موجودة... طرحة أمها بطمنها... وصوت سبحة  
أبوها محسساها بأمان الدنيا .



ضحكت فاطمة ضحكة عملت فيها إنها شرانية: والله ولا  
صلاح ولا غيره يهمني... غنوا معايا بس بصوت واطي لصلاح  
يكرشنا.

ضحك الكل وكانوا بيغنوا ورا فاطمة بهممممممس:  
يا كحك العيد.... يا حناااا... يا بسكويت.... يا حناااا... يا  
شرباتاا... يا حنااا... في الكوبايات.... وسط ضحك الكل على  
غناهم بهمس زي اللي بيسرقوا.

وقبل فرح إسلام كانت علا في الكلية... سألت على مها لحد  
ما لقتها:

بقولك إيه يا مها.... فاضية الخميس الجاي!!!!

مها: أنا!!!!!!

علا: أه أصل فرح إسلام أخويا الخميس وعاوزاكي معايا  
كمان قبلها.

مها: أنا!!!!!!

علا: أه ننزل نجيب فساتين سوا وتبقي معايا يوم الفرح من  
أوله.

مها: أنا!!!!!!

علا: أنتِ هتونوي... أه أنتِ... أنا قصرت معاكي كثير...  
وهعوضك على اللي أنتِ عملتيه معايا... أقصد اللي أنتِ  
هتعمليه.... بصي متركزيش... بس والله أنا بحبك في الله....  
بحبك أوي.

مها كانت في حالة صدمة من كلام علا... علا عمرها ما  
عاملت مها كويس... وكل ده كان بسبب أميرة اللي كانت عاوزه  
تكسب علا وتقطع علاقتها بكل اللي حوالها كسيل للوصول  
لإسلام مش أكثر.

يوم فرح إسلام أهه جه... كان جواها مشاعر الدنيا كلها....  
فرحانة وزعلانة... دخل عليها إسلام في أوضتها وقالها بعاتته  
وهو بيهزر:

إيه ده إيه ده... إيه الحلاوة دي يا بت.... بس والله مهما  
عملتي هتفضلتي بايرة.

علا: هههههههه أنا هعديها لك علشان أنت عريس بس.  
إسلام ناولها بابيون وهو بيشاور لها تلبسهوله... أخذته ولفته  
حوالين رقبته... بس مكلمتش ولفت إيديها حوالين وسطه ودخلت  
في حضنه... حضنها إسلام وقالها:

متقنعنيش يا بايرة إني هوحشك... أنا ساكن فوقكم.

بصت علا في عنيه وقالت له: البعد مش مسافات يا  
إسلام.... البعد بعد قلوب.

افتكرت لما كانت حامل في يوسف.. وكانت بتزور مامتها  
هي وأحمد بعد وفاة باباها ونزل إسلام من فوق وهو بيزعق:  
ماما أنت زعقتي لأميرة انهاردة!!!!!!

ماجدة: واللّه يا ابني ما حصل.... هو أنا أقدر... دي زي  
علا بالظبط.

إسلام بصوت تهكمي: بقولك إيه.... بلاش أسطوانات الحنية  
دي.... دي مش أول مرة تشتكي منك وأنا بعدي وبسكت.

وهنا مستحملتش علا: أنت إزاي تكلم ماما كده.... وطى  
صوتك وأنت بتكلمها.

أدخل أحمد علشان يهدي الوضع: اصبر يا إسلام واستهدى  
باللّه... وافهم من طنط إيه اللي حصل... يمكن مراتك فهمت غلط.  
إسلام: وأنت إيه دخلك.... احنا عيلة في بعض... أنت مالك أنت  
يا أخي.

عمرها ما هتسى لما جالها مكاملة من خالتها فاطمة الساعة  
١١ ونص بالليل: الحقي يا علا أمك تعبانة.







الأسورة دي بتاعة مين يا جماعة.... أنا لاقيتها عند الكرسي ده.  
ردت فاطمة وهي فرحانة زي العيال:

الحمد لله إنها جات في إيدك يا هالة.

علا وقفعة متابعة.... طنط هالة أهه.... حماتها... جدة  
عيالها... أم أحمد نصها الثاني... اللي شافتها في فرح إسلام  
وأصرت تخطبها له.... دي هالة اللي وصتها الناس إياها إنها  
تعمل حدود بينهم من أول الجواز.... علشان متعملش عليها  
حما... اللي كانت قلقانة ومرعوبة منها.... بس برده هي اللي  
بقت بديل أمها وهي في محافظة تانية.... هي اللي وقفت جمبها  
لما سقطت أول بيبي قبل يوسف... هي اللي خدمتها واهتمت بيها  
لما كانت مامتها تعبانة.

وفي لحظة كانت علا في حضنها... ولما الناس استغربت لأن  
دي أول مرة علا تشوف هالة ارتبكت علا وقالت:

أأ... شكراً يا طنط إنك لقيتي أسورة خالتو... أصلها...  
أصلها عزيزة عليها... شكراً بس ماكانتش تقصد شكراً على  
الأسورة.... هي كانت تقصد شكراً على كل حاجة حلوة بينهم.

وبعد أيام قليلة كانت فاطمة بتفتح موضوع إن هالة وابنها  
عاوزين ييجوا زيارة.... زيارة عائلية تخص علا...

ماجدة: وهو ده وقته يا فاطمة.... ده احنا طالعين من جواز  
إسلام إيد ورا وإيد أدام.... أنا مش مرتاحة أصلاً إن البت تبعد  
عني... بقولك إيه اعتذري لهم.

فاطمة: يا ماجدة ده عريس كويس... وأنا عارفة أمه... ناس  
محترمة... بصي أنا هقولهم بيجوا الخميس... وإياكي تخرجيني  
مع الناس وتقولي لا.

يوم الخميس كان أحمد ومامته في الصالون في بيت علا...  
دخلت علا فرحانة... أحمد أهه... نظرته الرقيقة وحشتها... قلبها  
درددق... دددق أوي... أحمد لسه مش بكرش... ولسه في شوية  
شعر في راسه عارفة إنهم هيطيروا ومش هتلاقهم كمان كام سنة.  
وبعد الكلام اللي بيتقال في المناسبات دي سابوا علا وأحمد  
يتعرفوا على بعض وقبل ما ينطق أحمد قالت له علا: بقولك  
إيه..... أنا مش عاوزة أجيب نيش في الجهاز!!!!

أحمد: نيش!!!!!!!!!!!!!!

علا: أأأأأأ... أصل يوسف هيكسره.

أحمد: يوسف مين يا أنسة علا!!!!!!!!!!!!!!

علا: هقولك بعدين بعدين.







قرفانين من المدرسة وتحكم أهالينا ونقول إمتى نتجوز واكتشفنا  
إنها كانت أحلى أيام... آسفة لكل واحدة قلبت عليها المواجه  
وأولهم نفسي... بس أنا كمان كنت محتاجة أفوق من الكوما.

.....تمت.....



obseikan.com

# شنطرة مشاعر

## مقدمة:

الصراع بين الحب والفلس والسلطة هيفضل موجود طول  
ما احنا عايشين.... بس في الآخر لازم حاجة واحدة بس فيهم  
اللي تنتصر....

سلمى كانت ضحية الصراع الأبدي إياه.... يا ترى مين  
هينتصر في الآخر!!!!!!!

oboiikan.com

# شنطت مشاعر (الحلقة الأولى)

ففي قسم الشرطة سألت عسكري واقف على الباب...

سلمى: لو سمحت بطاقتي ضاعت ورحت أطلع غيرها قالولي لازم أعمل محضر.

العسكري: اتفضلني عند إيهاب باشا اعلمي محضر.

دخلت بارتباك... أول مرة تدخل قسم شرطة... دخلت بملامحها الهادية الرقيقة... بحجابها اللي منور وشها.... وعلى استحياء قالت:

صباح الخير.... لو سمحت عاوزه أعمل محضر علشان بطاقتي اتسرقت وعاوزه أطلع غيرها؟

إيهاب: اتسرقت ولا ضاعت!!!

سلمى: والله أنا للأسف مش متأكدة... وأنا مروحة ركبت تاكسي ولما روحت ملقتهاش... بس أنا حاسبت التاكسي... ممكن تكون وقعت مني أو اتسرقت... بس فعلاً أنا مش متأكدة.

إيهاب: طب احنا محتاجين ضامن أو جواز سفر.



خالد: أه المأمورية... فاكسر الواد السوابق بتاع حادثة  
حلوان.....

وابتدى خالد يتكلم في الشغل في الوقت اللي خلصت فيه  
سلمى المحضر وتابعها بنظرته لحد ما خرجت من الباب.  
في شركة زينوكس للدعاية والإعلان خرجت سلمى من أوضة  
المدير مدايقة إنه علق على تأخيرها.

نهى: مالك يا بنتي في إيه!!!!

سلمى: مفيش اتأخرت وأنا بعمل محضر في القسم... وأستاذ  
ثروت اتترفز عليا.

نهى: معلىش هو متترفز من الصبح إن الورق مجاش وفي  
مواعيد مع العملا... وكمان متسيش إنك جديدة هنا.... فلازم  
يدجلك القطة من الأول ههههههههههههه.

سلمى: خلاص حصل خير.... اديني الشغل بتاع دعاية  
الحضانة أبدأ فيه.

المكتب اللي أدام سلمى من ساعة ما جات الشركة كان دائماً  
فاضي... هي جاية بقالها أربعة أيام بس... واتعرفت على كل  
الموجودين... بس انهاردة في حد على المكتب... بس واضح إن



ضحكت سلمى ونهى والكل كمل شغل لحد ميعاد الانصراف...  
نزلت سلمى وقفت أدام الشركة علشان تشاور توقف تاكسي....  
وفجأة سمعت صوت بينده عليها:

آنسة سلمى... آنسه سلمى.

التفتت سلمى لمصدر الصوت... الشخص ده شافته بس مش  
فاكرة فين... آااااه هو.... هو اللي كان في القسم.

ردت سلمى: حضرتك بتنده عليا أنا!!!

خالد: اتفضلي.... ومد إيده بظرف لسلمى.

سلمى مدت إيدها وأخذت الظرف المفتوح: إيه ده!!!  
معقول!!! دي بطاقتي.... طب إزاي!!!

خالد: لا إزاي دي شغلتي بقى.... آنسة سلمى أنا كنت  
عاوز.....

قاطعته سلمى: أولاً أنا بشكر حضرتك على البطاقة... بس  
أنا آسفة جداً مش هقدر أقف مع حضرتك أكثر من كده.

خالد: إزاي بس... أنا في كلام كتير عاوز أقولهولك... أنا  
كنت حتى بفكر أسألك لو ينفع نروح مكان نقعد نتفاهم.

سلمى: مكان!!!!!! لا كده حضرتك اتعديت حدودك أوووووي.

وفجأة ظهر كريم من وراها: حدود!!!! حد مضايقتك!!! مين

ده يا سلمى!!!!!!

خالد: وأنت مالك أنت.... مين ده يا سلمى!!!!!!





اللي هيعملنا البامية الحلوة دي بعدك ههههههه... احنا هناكل  
بدري ولا إيه!!! مش هنستى بابا!!!

مديحة: أبوكي في أوضته.

سلمى: في أوضته!!! دلوقتي!!! لبيبيبيبييه ماله؟؟؟؟؟؟

مديحة: مفيش... مشاكل الشغل اللي بتزيد يوم عن يوم....  
التجار عاوزين فلوسهم... والحال واقف... ربنا يفرجها من عنده.

سلمى: يا ماما... يا ماما أنا قولتله ألف مرة يقفل مصنع  
الخشب اللي مش جايب همه ده... الناس كلها دلوقتي بقت بتجيب  
جاهز ومودرن.... مفيش حد لسه ييفصل عفش خشب بقوايمه.

مديحة: أنا زيي زيك ياما قولت... روعي قولي له علشان  
تسمعي أسطوانة.....

سلمى: لا استتي أسمعها لك.... أنتوا عاوزني أسيب تجارة  
أبويا وجدي!!! أنتِ تعري في المصنع ده فاتح كام بيت (وهي بتقلد  
نبرة صوته) لما أروح أرخم عليه شوية.... متحرقيش البامية يا  
ديحة أنا بقولك أهه.

خبطت سلمى على باب أوضة عبد الفتاح وفتحت الباب  
بالراحة ليكون نايم: بابا... أنت صاحي؟



خدت بالها من اسم دينا اللي جه وسط الكلام.... أكيد  
خطيبته أو مراته... بس ميمنعش إنه حد جدع... من أول يوم  
تعارف في الشغل كان عنده استعداد يعمل مشكلة لمجرد إن في حد  
دايقها... وقطع تفكيرها صوت نهى وهي بتسألها:

سلمى عاوزه قلم أحمر من عندك... سلمى.... سلللاللمى.

سلمى: أه معلىش اتفضلي.

هنا دخلت رضوى... مديرة الحسابات.... وراحت على مكتب  
كريم على طول:

هاااااااااااا يا كيمو... جيت لي اللي قولتلك عليه ولا لآآآآ

كريم طلع رزمة ورق من الدرج واداهها لرضوى:

اتفضلي يا ستي منستش..... ودينا بتقولك لو احتاجتي أي  
ورق ثاني كلميها.

رضوى: لا أنا لو احتجت ورق ثاني هقولك تقولها.... وبصت  
لكريم بصة كلها إعجاب وخرجت من المكتب.

سلمى مكانتش شايفة أي دبلة في إيد رضوى أو كريم... بس  
متعرفش ليه فضولها خلاها في لحظة تسأل نهى:



بالليل في بيت الحاج عبد الفتاح بعد ما شربوا الشاي بدأت  
مديحة تشاور له إنه يتكلم.... وسلمى وسالي مش فاهمين  
حاجة... وفجأة قال:

سلمى يا بنتي.... أنا عاوزك شوية في الأوضة.

ردت سالي: وسالي ملهاش نصيب في كلمتين؟؟؟ ولا أنا بنت  
البطة السوداء.. لا مؤاخذة يا ديحة.

رد عبد الفتاح: إن الله مع الصابرين... مسير كلمتينك بيجوا  
بس اصبري.

دخلت سلمى الأوضة واستتت إن أبوها يقعد الأول.... قعد  
الحاج عبد الفتاح بجلابيته الرمادي... وسبحته في إيدته بيستغفر  
عليها... وقال لسلمى بصوت حنين:

أنا مطلعتش من الدنيا إلا بيكي وبأختك وأمك... أنت عارفة  
يا بنتي إني لا أخ ولا أخت... أنتوا كل أهلي..... ويعز عليا فراق  
واحدة منكم بس دي سنة الحياة.... أنا ربيت وعلمت وكبرت لحد  
ما بقى عندي عروستين زي القمر ربنا يحميكم.

سلمى: في إيه يا بابا أنت قلقتني!!!

عبد الفتاح: أنت جايلك عريس يا بنتي.

رجعت سلمى بظهرها لورا... عريس!!!!!! إوعى يا بابا يكون  
ظابط .

عبد الفتاح: أنتِ تعرفيه يا سلمى???

سلمى: معروفش يا بابا... بس اللي حصل... وابتدت سلمى  
تحكي لباباها كل اللي حصل .

عبد الفتاح: هو طبعا غلط إنه جالك الشغل وطلب منك  
كده.... بس عذره الوحيد عندي إنه جالي المصنع كلمني بعدها...  
وعاوز يدخل البيت من بابيه .

سلمى: مش عارفة يا بابا... أنا متلخبطة .

عبد الفتاح: فكري براحتك يا بنتي... أنا عمري ما هفصبك  
على حاجة .

على مخدتها كان عقلها شغال تفكير... صورة خالد اللي  
جواها خوف منه مش فاهماله أاااي سبب... خوف غريب... بس  
برده صورة كريم كانت بتتط آدمها... كريم!!!! معقول!!!! لا طبعا  
مستحيل.. ومن كتر التفكير راحت في النوم من غير ما تحس .

في المكتب استقبلها كريم بابتسامة كبيرة.... كانت مستياها...  
وكأن ابتسامة عينيه هي التحية الوحيدة اللي كانت ممكن ترضيها

عن مليون صباح الخير من أي حد ثاني... دخلت رضوى على  
مكتب كريم زي العادة... قعدت على الكرسي اللي أدامه...  
بس المرة دي مكانتش سامعة الحوار اللي بينهم... كانت رضوى  
بتهمس.... بس سلمى كانت بتحس إن الهمس ده زي النار في  
صدرها... مقدرتش تستحمل وقالت:.....

●●●

## شنطت مشاعر (الحلقة الثالثة)

فف المكتب استقبلها كرفم بابتسامة كبرفة... كانت مستفياها...  
وكأن ابتسامة عفنه هف التطفة الوحفدة اللف كانت ممكف ترضفها  
عن مليون صباخ الخفر من أف حد تافف... دخلت رضوف على  
مكتب كرفم زف العادة... قعدت على الكرسف اللف أدامه...  
بس المرة دف مكافتش سامعة الحوار اللف بفنهم... كانت رضوف  
بتهمس.... بس سلمف كانت بتفس إن الهمس ده زف النار فف  
صدرها... مقدرتش تستحمل وقافت:

آنسة رضوف... عمفل شركة كنفج للمقاولات بفقول إننا  
وعدناه بخصم مع الاتفاق فف أول الشغل... وبعد ما خلصنا شغله  
جات له الفاتورة من ففر أف خصومات... ومداقق جءاً... ولمح  
لف إنه ممكف ما فتعاملش معانا تافف.

رضوف: والله فا سلمف موضوع الخصومات ده بفرفع للأستاذ  
ثروت... أنا مقدرشف أعمل أف خصم من ففر إذنه.

سلمف: لفه!!!! هو مش حضرتك مفررة الحسابات!!!! فارفت  
بقى نركز فف شغلنا شوفة وبزفافة دلع... عمفل زف ده خسارة  
للشركة لو اتعامل مع حد تافف ففرنا.

ارتبكت رضوى واستأذنت ومشيت... استأذنت كريم بس  
وكانه هو الوحيد اللي في المكتب مش معاه حد تاني.

كريم: ملكيش حق يا سلمى... رضوى مغلطتش في حاجة...  
مهما الواحد كان مسمى شغله برده ليه حدود ميقدرش يتعدها.

سلمى: وأنت مالك واقف في صفها كده ليه!!!!

كريم: أنا واقف في صف الحق... أنا رايح أطيب خاطرها  
وخرج من المكتب ورا رضوى.

ردت نهى بابتسامة خبيثة: مش قولتلك يا بنتي... شكله بدأ  
يطب.

سلمى: خلاص يا نهى... يطب يشب... أنا ليا الشغل وبس  
وإن عميل ما يطفشي.

في صالون الحاج عبد الفتاح بالليل كان خالد موجود ومامته  
وباباه... بدأ الأستاذ ياسين والد خالد الكلام:

والله يا حاج عبد الفتاح خالد ما بطل كلام عنكم... أنا يا  
سيدي طلعت معاش بعد شغلي في التربية والتعليم... والحاجة ربة  
منزل... وعندي خالد الكبير وفي زياد كمان الصغير لسه في ثانوي  
ربنا يبارك فيه... واحنا يشرفنا نسبكم.. ههههههه... والله ما  
عارف المواقف دي بيتقال فيها إيه ههههههه... الولاد كبرونا.

سحب خالد الكلام من الحاج ياسين: أنا يا عمي عندي شقة... وكل طلبات آنسة سلمى مجابة وحضرتك واللي تؤمر بيه.

رد عبد الفتاح: واللّه يا ابني لا طلبات ولا حاجة... أنا كل اللي يهمني واحد يتقي الله في بنتي... واللي رايده ربنا هيكون... ادوني فرصة أشاور البنت... وربنا يقدم اللي فيه الخير.  
نزلت سلمى من التاكسي الصبح وبرده سمعت صوته بينده عليها: سلمى.... سلمى.

جسمها قشعر لما سمعت صوته والتفتت: أستاذ خالد؟

استغرب خالد: أستاذ؟؟ حد برده يقول لخطيبه يا أستاذ؟؟

بصت سلمى في الأرض وقالت: خطيب إيه بس؟؟ هو حضرتك هنا ليه؟؟

خالد: برده حضرتك؟؟ ماشي... حضرتي هنا علشان أصبح على حضرتك وبس... تمام كده؟

لمحت سلمى كريم وهو بيركن عربيته... نزل من العربية... بص لها من فوق لتحت ودخل الشركة... استأذنت سلمى من خالد اللي مكملش كلامه ودخلت هي كمان.



دور كريم وشه وقال: وهو في حد برده يرفض ظابط الأيام

دي!!

قامت سلمى على الحمام... مكانتش عارفة دموعها دي جاية  
منين... هي زعلانة ليه!!! هي كانت مستتية منه إيه!!!! لا كانت  
مستتية.... كانت مستتية مجرد تلميح منه... نقطة ميه تروي  
الحاجة اللي اتزرعت جواها ناحيته... هو مش غلطان... هي  
اللي رسمت وهم وصدقته... نهى كان عندها حق... أكيد رضوى  
هي السر.

على باب أوضته كان في خبطات... رد عبد الفتاح: اتفضل....  
تعالى يا بنتي.

دخلت سلمى تقدم رجل وتأخر رجل: بابا.... بالنسبة لموضوع  
الخطوبة.... لو أنت شايف إنه حد كويس... أنا معنديش مانع.  
كانت الاتفاقات سريعة.... كان خالد طابير من الفرحة...  
وكانت كمان سلمى فرحانة... بس فرحتها كانت ناقصة حاجة  
هي مش فاهماها.

في أوضتهم قالت سلمى لسالي: ممكن توطي البتاع ده  
شوية؟؟ عاوزه أكلهم صحباتي أعزمهم على الخطوبة.



رد ممدوح: ياسين السيد \$\$\$ آااااااااااااااااااااا عارفه.... ده أنا  
لسه حاضر فرح ابنه الكبير قريب.

سلمى: فرح ابنه الكبير \$\$\$ \$\$\$ إزاي يا عمو \$\$\$ ده خالد هو  
الكبير.

...

obseikan.com

# شنطرة مشاعر (الحلقة الرابعة)

في صالون الحاج عبد الفتاح كان خالد يبحاول يعلي صوته  
علشان يسمع سلمى اللي رفضت حتى إنها تطلع تسلم عليه:

يا عمي والله لا فرح ولا حاجة... دي كانت مجرد خطوبة  
ومحصلش نصيب... أنا عارف إنني غلطت إنني مقولتش لحضرتك  
أو حتى لسلمى.... وماما عتبت عليا وقالت لي كان لازم تقول...  
بس والله ما رديت أقول علشان مجرحش مشاعر سلمى مش  
أكثر... عمي بعد إذنك عاوز أقعد معاها أشرح موقفى... لكن  
متقوليش مفيش خطوبة... الخطوبة بعد أربع أيام... ده أنا  
عزمت الناس.

عبد الفتاح: يا ابني أنا ميهمنيش الناس... أنا يهمني قلب  
بنتي... وأساس العلاقة بين أي اتنين هي الثقة بينهم... وأنت  
سقطت في أول درس.

خالد: أرجوك يا عمي قدر موقفى أنا.....

قاطعته عبد الفتاح: بص يا ابني أنا مش هظلمك... أنا  
هديك فرصة أخيرة... إنما مش هغصب على بنتي أي حاجة...  
هي دلوقتي صاحبة القرار... إنها تكمل معاك أو لأ؟

اتفجئت نهى بدخول سلمى المكتب وسألتها:

اللَّهُ؟ أنتِ مش أجازة انهاردة يا بنتي علشان تحضري  
لخطوبتك؟؟؟؟

ردت سلمى بصوت واضح قاصدة تسمع كريم:

لا ما خلاص مفيش نصيب.

نهى: مفيش نصيب؟؟؟ له يا بنتي إيه اللي حصل بس؟

سلمى: مفيش... كان خاطب وخبى عليا.

ردت نهى بعصبية: من أولها كذب كده؟؟؟ لا بناقصه... أنا

مبحبش النوع الملاوع ده... ولا إيه رأيك يا كريم؟؟

التفتت سلمى باهتمام تسمع رأيه.... هو أكثر واحد دلوقتي

رأيه يهملها... اللي رد وقال:

والله أنا نصيحتي تقعدى معاه وتعريفه هو عمل كده ليه وبعد

كده تحكمي.... لازم تديه فرصة.

خرجت نهى من المكتب تودي شغل المطبعة.... وسألته سلمى

بعصبية:

فرصة إيه اللي أديهاله... أنت علشان راجل زيه واقف في  
صفه.... وحست بضعف في صوتها وهي بتقوله: ولو إنك آخر  
شخص في الدنيا اعتقدت إنه ممكن يقف في صفه.

رد كريم بعصية شديدة وصوت عالي:

وما أقفش في صفه ليبييه؟؟؟؟ مش يمكن حاسس بيه....  
مش يمكن بحب زيه... مش يمكن هو قادر ياخذ خطوة أنا مش  
عارف أخذها بسبب ظروف المادية ومسئولية بيت فيه أم وأختين  
فوق راسي بعد ما أبويا مات... بسبب عهد على نفسي إني لازم  
أجوز إخواني البنات الأول... وخبط على المكتب... كل ده وما  
أقفش في صفه؟؟؟؟؟ حسي بيا بقى أنا تعباً!!!!!!!!!!!!!!

كانت سلمى في حالة ذهول من عصبيته وصوته العالي...  
وردت عليه بخوف:

كريم أنا مش فاهمة حاجة... أنت؟؟؟؟

رد كريم بحسرة: آه أنا يا سلمى.... بس مقدرش أقولها...  
علشان أبويا الله يرحمه علمني مقلش كلمة أنا مش قدها...  
وأنا دلوقتي مش قدها يا سلمى.... مش قدها.... وساب المكتب  
وخرج.



خالد بفرحة: بجد يا سلمى؟؟؟؟ طب تعالي أوصلك.... ولا  
بلاش هتخرجيني زي العادة استني هوقفلك تاكسي.

في الوقت ده كان كريم نازل مرووح من الشركة... أول ما لمحته  
سلمى راحت عند عربية خالد... فتحت الباب الأدماني اللي  
جمب السواق... وركبت وقفلت الباب بوش خالي من أي مشاعر.

خالد مكانشي مصدق نفسه... بس هو كمان لمح كريم  
وهو عينه عليها وهي قاعدة في عربيته... عينيهم جات في عين  
بعض... واترسمت على عينين خالد نظرة انتصار طاووسية...  
وراح في هدوء ركب عربيته وطلع بيها.

تمت الخطوبة في الميعاد وسط فرحة أهل خالد وأهل سلمى...  
وبرده فرحة سلمى كانت ناقصة... في الخطوبة كل الشركة جات  
إلا هو... كانت بتدور عليه بين الوشوش والإضاءة الملونة ودخان  
الليزر والموسيقى.

شوية تدعي إنها تشوفه.... وشوية تتمنى إنه مييجيش...  
وفعالاً مجاش.

في مصنع الحاج عبد الفتاح وبالتحديد في مكتبه كان قاعد  
أدامه الحاج محمد الأسيوطي اللي قال: يا حاج أنا عارف  
الظروف ومقدر والله... ده احنا عشرة سنين مش تعامل يوم ولا

اتنين... بالنسبة للشيكات اللي تخصني ولا كأنها موجودة.... لحد  
ما ربنا يفرجها عليك... إنما باقي التجار.. وسكت.

رد الحاج عبد الفتاح: مالهم باقي التجار يا حاج محمد؟؟؟  
قولي في إيه؟؟

رد الحاج محمد: الصراحة يا حاج ناويين ياخدوا إجراء  
قانوني بالشيكات اللي عليك.... أنا اتكلمت معاهم ياما من كذا  
شهر... بس المرة دي مصريين.

بحسرة قال الحاج عبد الفتاح: يعني خلاص؟؟؟؟ وصلت  
لدرجة دي؟؟؟؟ وصلت إنني أتحبس علشان شيكات متأخرة؟؟؟؟؟؟؟؟  
قاله الحاج محمد: واللّه على عيني يا حاج... أنا لو معايا  
سيولة واللّه متأخر أنت عارف... بس أنا فلوسي كلها بضاعة في  
السوق... ربنا يعينك ويفرجها من عنده.

مكانشي شايف الطريق قدامه وهو سايق مروح دخل البيت  
متسند على الحيطه.... وجه صوت مديحة من جوه:

أنت جيت يا حاج؟؟؟؟

عبد الفتاح بصوت ضعيف: ناولينني كوباية مايه يا حاجة...  
وفجأة.... وقع عبد الفتاح وأغمى عليه.

رن جرس موبايل سلمى في الشغل... اللي انتطرت من مكانها:  
إيه؟؟؟؟ بابا؟؟؟؟ إمتى؟؟؟؟ أنتوا فين يا سالي؟؟؟ أنا جايه حالاً.

وقامت لت شنطتها بسرعة وسألتها نهى: في إيه يا سلمى؟؟؟؟  
ردت بقلق: بابا تعب ونقلوه المستشفى.

قام كريم من مكتبه وأخذ سلسلة مفاتيحه: استني يا سلمى  
أنا هوصلك.

كانت راكبة جمبه دموعها مغرقة وشها... كانت في حالة  
انهيار بمعنى الكلمة... وكل شوية كانت تتصل بسالي تعرف أي  
أخبار جديدة... كان نفسه يطبطب عليها.... كان نفسه ياخذها  
في حضنه ويقولها: متخافيش... أنا جمبك.

في المستشفى دخلت سلمى جري ووراها كريم..... لقت خالد  
في وشها.... عينه جات على كريم وملامح وشه كلها اتجمدت...  
مكانشي في بالها غير إنها تظمن على أبوها وبسسس.... لقت  
مديحة وسالي واقفين بيعيطوا مستئين الدكتور وقتت معاهم  
تستني أي خبر هي كمان.

وهنا سأل خالد كريم بنظرة شر: أنت تاني؟؟؟؟ أنت إيه  
اللي جابك هنا؟؟؟؟

رد كريم بتحدي: عاوز تعرف أنا جاي ليه؟؟؟ جاي أريحك....

وأقولك إن أنا وسلمى....

...

## شنطرة مشاعر (الحلقة الخامسة)

رد كريم بتحدي: عاوز تعرف أنا جاي ليه؟؟؟ جاي أريحك....  
وأقولك إن أنا وسلمى.... أنا وسلمى..... وسكت وغمض عينيه  
وأخذ نفس... زمائل شغل مش أكثر... بص... أنا لا جاي أعمل  
مشاكل لسلمى ولا مشاكل معاك.... أنا وصلتها لأنني خفت تركب  
تاكسي مع حد غريب وهي في الحالة دي... سلمى منهارة...  
ومعتقدش إن حالة سلمى أو باباها تستحمل أي حاجة حالياً.

خالد: تمام... مش عملت اللي عليك!!!!!! متشكرين أووووي....  
نورت.

خرج كريم نفس بعصبية: أنا كده كده كنت ماشي.

ولف كريم وساب المستشفى ومشى..... خرج الدكتور من  
الأوضة... وبدأ يقولهم في هدوء:

أنا أسف جداً!!!!... لازم عملية... حالة القلب متدهورة جداً...  
عاوزين حد يمضي إقرار وشوية بيانات.

رد خالد: أنا موجود يا دكتور... تحت أمرك.

في الوقت اللي كان فيه عبد الفتاح في أوضة العمليات قالت  
مديحة: سلمى.... روعي يا بنتي الحسابات... شوي في المفروض  
نسيب فلوس تحت الحساب أد إيه... وعملية أبوكي هتتكلف أد  
إيه؟؟؟ علشان أنزل أبيع الغوايش... أهو كله من خيرره.

نزلت سلمى الدور الأول عند شباك الحسابات: مساء الخير.  
موظف الحسابات: مساء النور يا فندم.

سلمى: لو سمحت عاوزه أسيب فلوس تحت حساب المريض  
عبد الفتاح الأسواني... وعاوزه أعرف التكاليف المبدئية هتبقى  
أد إيه؟؟؟؟

بدأ الموظف يقلب في ملف المرضى وقال: عبد الفتاح... عبد  
الفتاح... آه تمام عبد الفتاح الأسواني.... الحساب مدفوع يا  
فندم وفي كمان ١٠٠ ألف جنيه تحت الحساب.

اندهشت سلمى: اندفع إزاي؟؟؟ أنا مدفعتش حاجة.. اتأكد  
حضرتك أكيد في لخبطة؟؟

رد الموظف: يا فندم الحساب مدفوع... واللي ماضي حتى  
اسمه... اسمه... أيوة... أستاذ خالد ياسين.

ردت سلمى: خالد!!!!

خالد كان في الاستقبال يشرب قهوة قاعد على استاند  
وحاطط القهوة على الأرض بين رجليه... وباصص في الموبايل....  
راحت قعدت جنبه سلمى وقالت في هدوء: أنت ليه عملت كده!!!!!!  
احنا معانا فلوس... من فضلك عرفني دفعت كام بالطبط علشان  
نردهم.

ومن غير ما يبص لها خالد رد عليها: ممكن أطلب منك  
طلب!!!!!!

ردت سلمى: اتفضل.

رد خالد من غير ما يبص لها برده: آآآآآآ آخر مرة أشوفك  
راكبة عربية مع حد غريب... وخصوصاً الواد ده.... فاهمة....  
خصوصاً الواد ده.

ردت سلمى: بس يا خالد أنا.....

قاطعها خالد وهو بيقف: أنا رايح أظمن على عمي.

وساب سلمى قاعدة غرقانة في همومها... هم كريم... وهم  
تعب أبوها... وهم فلوس هي عارفة إن معهمش يردوها.... وهم  
موقف خالد من كريم.



رد خالد: عاوز تردلي الجميل يا عمي!!!! أول ما تقوم  
بالسلامة نكتب الكتاب.

رد عبد الفتاح بارتباك: بس يا ابني.....

قاطعہ خالد: متردش دلوقتي يا عمي.... هنتكلم لما تقوم  
بالسلامة إن شاء الله.

الفترة دي كانت سلمى وكريم بيتجنبوا أي تعامل مع بعض...  
حتى كانوا بيتجنبوا إن عينيهم تتلاقى... واللي مكانشي يمنع إنها  
بتتلاقى أكثر من ١٠٠ مرة كل يوم.... انتهز كريم عدم وجود نهى  
في المكتب وسألها:

أنتوا بجد هتكتبوا الكتاب!!!!

ردت سلمى من غير ما تبص له: ده كان اتفاق مع بابا وهو  
تعبان.... ودلوقتي قام بالسلامة.

مردش كريم فسأله:

مردتش يعني!!!!!!

رد كريم: عاوزاني أرد أقولك إيه يا سلمى!!!!

ردت سلمى بعيون مليانة دموع: قولي أي سبب يخليني مكملش  
وأنا مكملش.

رد كريم بحسرة: مبرووووك... ربنا يتمم لك بخير.

لفت سلمى وشها ببطء ناحية اللاب اللي أدامها.... مسحت  
دموعها في كبرياء مداري كسرة قلبها... وكملت شغل.

شال المأذون المنديل من على إيد خالد وعبد الفتاح...  
بارك الله لكما وبارك عليكما وجمع بينكما في خير.... وانطلقت  
الزغاريط من صحبات سلمى وسالي.

كانت رقيقة... بفستان أوف وايت هادي... وحجابها ومكياجها  
الخفيف... استأذنت وطلعت البلكونة... لفحت وشها نسمة هوا  
هادية... خلاص... مبقاش ينفع حتى تفكري فيه يا سلمى... دي  
خيانة لخالد.... خالد مبقاش خطيبك ويس... ده بقى جوزك  
أدام ربنا... هو دلوقتي اللي ليكي... كانت كأنها بتكلم نفسها...  
جه من وراها وقرب لودنها وهمس:

بتعملي إيه هنا؟؟؟

اتخضت سلمى: خالد!!! لا مفيش... أنا بس بشم هوا.

رد بنفس الهمس: تعري في إنك انهاردة زي القمر.

مردتش عليه سلمى واكتفت بيصة في الأرض.... كمل خالد  
ومسك إيدها بين كفوفه... ورفعها عند وشه... وباس كف إيدها  
برقة.

ارتبكت سلمى واحمر وشها.... وشدت إيدها بسرعة قبل ما  
تقول: خالد... من فضلك أنا مبحبش كده.

ضحك خالد: يا بنتي أنتِ مراتي أدام ربنا.

سلمى: ولو... برده... يووووه... واتكسفت وسابت البلكونة  
ودخلت جوه.

في الشركة رن موبايل سلمى برقم خالد: سلمى... أنا في  
الشقة... والناس عاوزة الدرجة النهائية للون علشان يبدأوا شغل.  
ردت سلمى: طب اختار أنت.

خالد: لا... معلشي خدي تاكسي وتعالى الناس مستتية.

ردت سلمى: هشوف هعمل إيه... واتصلت سلمى بياها  
تستأذنه لقت موبايله مقفول... كلمت مامتها وحكت لها ردت  
مديحة:

خلاص روجي يا سلمى وأنا هبقى أقول لأبوكي.

راحت سلمى الشقة واتفقوا مع العمال على اللون المطلوب  
ومشيوا العمال واتفقوا عليهم باب واحد.  
ارتبكت سلمى: يالا روجني يا خالد بقى.

رد خالد وهو يقرب إيدته من وشها: إيه... مش عاوزة تقعدي

معايا شوية ولا إيه؟؟؟

بعدت وشها وهي بتكمل: لا بس أنا اتأخرت وماما هتقلق

عليا كده.

كمل خالد تمليس على وشها بإيده وكأنه مش سامع.

سلمى بصوت عالي: خالد.... عاوزة أروح لو سمحت.

رد خالد وكأنه في دنيا تانية: أنتِ مراتي على فكرة وبدأ

يقرب منها أكثر.

ردت سلمى بعصبية: خالد... قولتلك مبحش كده... لا يا

خالد... ابعدي عني... بقولك ابعدي عني... لااااااا.....



# شنطرة مشاعر (الحلقة السادسة)

انهارت سلمى وهي بتقفل هدومها: عمري ما تخيلت إنك  
ممکن تعمل كده... أنت مش بني آدم.

قرب منها خالد: سلمى أنا بحبك.... أنت مراتي.

بعدت سلمى إيده عنها بعنف:

إوعى تلمسني..... إياك تلمسني وأخذت شنطتها وفتحت  
باب الشقة وخرجت.

في البيت كان عبد الفتاح ومديحة وسالي على السفرة...  
دخلت منطقتش.. وعلى أوضتها على طووووول... قامت مديحة  
من على السفرة ودخلت وراها:

هاه.... إيه الأخبار يا سلمى... اختارتي اللون؟؟؟؟

ردت سلمى بشرود: اخترت غلط يا ماما.

ردت مديحة باستغراب: غلط إزاي يعني.. معرفوش يعملوك

اللون اللي أنتِ عاوزاه؟؟؟ ومال هدومك متربة ومبهدة كده ليه؟؟؟



إن الحب اللي ياما حلمت بيه جه في وقت غلط... وحصل إني  
كرهت الحب... مفيش حب يا كريم بيكمل صح؟؟؟ الحب ده شيء  
دايمًا ناقص مبيكملش... اللي بيكمل بس هو الوجد... الوجد  
وبس يا كريم... وانهارت من العياط.

كان نفسه ياخدها في حضنه بس مش قادر.. وبصوت مهزوز  
قالها:

سلمى... أنا بحـ....

قاطعته سلمى بسرعة: إوعى تنطقها... إوعى يا كريم...  
أنت مقولتهاش وأنا مخطوبة... جاي تقولها وأنا على ذمة راجل  
تاني؟؟؟؟ وأخذت بعضها ومشيت.

بس اللي ما أخذوش بالهم منه هما الاتين... إن كان خالد  
واقف بعربيته شايف كللل المشهد ده.

بالليل في بيت الحاج عبد الفتاح كان خالد موجود وقال:

يا عمي أنا احتمال أتقل... وعاوز أعجل بالفرح... وتقريبًا  
خلاص الشقة جاهزة... في خلال أسبوعين تلاتة تكون اتفرشت.

رد عبد الفتاح: يا ابني ليه الصربعة؟؟؟ الحاجة لسه بتنز  
تجيب حاجات للجهاز... ما أنت عارف الستات... إشي حلل

وإشي صيني وإشي مش عارف إيه... خليهم براحتهم... ولسه  
مجبناش بقيت الحاجات اللي علينا .

رد خالد: يا عمي كل اللي بتتكلم فيه ده شكليات... واللي  
ناقص من عند حضرتك أنا ممكن أكمله مفيش مشكلة.

عبد الفتاح: والله يا ابني أنا معنديش مانع... شوف سلمى  
هتقول إيه.... هي برده العروسة وهي اللي تحدد... يا سلمى...  
يا سلمى.... مش تيجي تسلمي على خالد!!!

دخلت سلمى.... ومن غير أي سلام قعدت على أول كرسي...  
وبعد ما باباها سابهم لوحدهم... قام خالد قفل باب الأوضة...  
بصت سلمى على الباب وعليه وقالت له بصوت كله اشمئزاز:

نعم؟؟؟ عاوز إيه؟؟؟ مش مكسوف من نفسك.... ليك عين  
توريني وشك تاني؟؟؟

رد خالد: يا سلمى بفكرك تاني... أنا جوزك.... وأنتِ مراتي  
أدام ربنا.... وأنا جيت أستأذن عمي إننا نقدم الفرحة.

ردت سلمى بعصبية: فرح؟؟؟ فرح إيه.... أنا هقول لبابا  
على كل حاجة... هقوله علشان يعرف أد إيه هو مخدوع فيك...  
وإنك ملكش أمان... وبنظرة تحدي قربت منه وقالت له:

طلقني .

مسكها خالد من دراعها وضغط جامد لدرجة إنها اتوجعت...  
وقربها منه وهو يقول ببطء:

أنا لحد دلوقتي مورتكيش الوش الثاني بتاعي... فمتخليهوش  
يطلع أحسن لك... اعلمي حسابك الفرغ بعد ثلاث أسابيع....  
ومن هنا للفرغ متعتبيش الشغل بتاعك ده.... وانا حاجات  
كثير تتجهز.... والشقة لازم تتفرش وتخلص... فاهمة ولا أقول  
تاني!!!!!!

وسابها وخرج ورزق الباب وراه... ثاني يوم مكانتش في  
المكتب.... كان خايف تبقى تعبانة... سأل نهى على استحياء:

مش تكلمي سلمى تطمني عليها تشوفها مجتش ليه؟؟؟

ردت نهى باستغراب: سلمى؟؟؟ هي معزمتكش؟؟؟ يا ابني  
سلمى أخذت شهر أجازة جواز... وكلمتنا عزمتنا... يمكن  
هتكلمك كمان شوية.

مرت عليه الأيام في الشغل بطيبين... مكتبها الفاضي  
كان بيقبض قلبه... كان الشغل مالهوش أي طعم... وهي كمان  
مكانتشي حاسة بفرحة العفش الجديد ولا الفرش الجديد زي أي

عروسة... وكانت موكلة سالي ومديحة تقريباً في كل حاجة... يوم  
الفرح الصبح صحتها سالي:

والله أنا مشوفتش كده... إيه البرود اللي أنت فيه ده؟؟؟ ده  
منظر عروسة؟؟؟ والله أنا متوترة أنا وديحة أكثر منك.... الدنيا  
مقلوبة.... خالاتك وجيرانا برة وأنتِ ولا هنا.

ردت سلمى بملل: عاوزه إيه على الصبح؟؟؟

ردت سالي وهي بتشيل المخدة من على وش سلمى: عاوزه  
حضرتك تقومي تحضري نفسك علشان ننزل للكوافير...  
ياللاااااااااا اخلصي هنتأخر.

في نفس الوقت في الشركة... دخل اتين ظباط مع عساكر...  
وسألوا أول موظف أدامهم:

فين كريم المنصوري؟؟؟؟

راحوا على مكتبه وبلهجة حادة: أنت كريم المنصوري؟؟؟

رد كريم: أيوة أنا يا فندم خير؟؟؟

رد الظابط: في بلاغ متقدم ضدك إنك مستغل شغلك في  
تجارة المخدرات... ومعانا إذن نيابة بالتفتيش.

رد كريم باذبهلال: مخدرات؟؟؟؟ وقبل ما يكمل كان في عسكري  
مقومه من على المكتب واتين عساكر قالبين المكتب فوقه تحته...  
طلع عسكري منهم لفة من الدرج واداهها للظابط وقاله: لقينا دي  
يا فندم.

رد الظابط: الله الله... إيه ده يا روح أمك؟؟؟ نزلوه على  
البوكس.

وسط استغراب كل الموجودين بما فيهم الأستاذ ثروت.

في الكوافير... استأذنت سلمى قبل ما تبدأ في عمال شعرها  
ومكياجها وأي حاجة بتتعمل اليوم ده لأي عروسة... دخلت  
الحمام... طلعت البيبي تشيك من شنطة إيدها... وعملت اختبار  
الحمل... وكانت الثواني بتعدي عليها وهي مستتية النتيجة  
سنييييييين... مسكت الاختبار ولقت.....



obseikan.com

# شنطرة مشاعر (الحلقة السابعة)

كانت الميك أب أرتيست مش عارفة تعملها مكياج.... كل ما  
تعمل مكياج يتبهدل من دموعها... قالت لها:

وبعدين يا عروسة... أنا مش عارفة أشتغل... أنا هسيبك ١٠  
دقايق تهدي علشان أنا كده هعيد من الأول... قربت منها سالي  
وحطت إيدها على ظهرها:

مالك بس يا سلمى في إيه!!!! أنت تعبانة؟؟؟؟  
ردت سلمى وهي بتمسح دموعها:

لا مفيش... أنتوا بس هتوحشوني.... مش قادرة أتخيل إنني  
هبقى في بيت تاني.... وكملت وهي بتحضنها..... أنا بحبك أوي  
يا سالي.

في القسم كان في تحقيق مفتوح مع كريم.... رفضوا حتى إنه  
يتصل بأهله أو بمحامي... كان التعامل سيء لأبعد حد.... وسأله  
الظابط:

هااااااه... بقى بتاجر في الممنوعات يا كوكو؟؟؟

رد كريم: أنا مش هتكلم إلا في وجود المحامي بتاعي.

رد الضابط: محامي؟؟؟؟ طيب تمام.... يا صول محمود.....  
ارميه في الحجز لحد ما بيان له صاحب.

في الكوافير رن موبايل سلمى برقم غريب... ردت سلمى: ألو.  
كان صوت بنت بتعيط: ألو... السلام عليكم... سلمى معايا؟؟  
ردت سلمى بقلق لما لقت الصوت ببيعط: أيوة أنا... مين  
معايا؟؟

رد الصوت: أنت متعرفنيش.... أنا دينا... أخت كريم.  
ارتبكت سلمى: أه أهلاً وسهلاً يا دينا.

ردت دينا: أنا مش هعطلك يا سلمى... عارفة إن انهاردة  
فرحك... بس أنا دلوقتي ماليش غيرك... كريم حكالي على كل  
اللي جواه يا سلمى ناحيتك... وعارفة إنك الوحيدة دلوقتي اللي  
تقدرني تساعديه.

ردت سلمى بقلق: أساعده؟؟؟ هو في إيه؟؟؟ ماله كريم يا  
دينا؟؟

حكّت دينا اللي حصل مع كريم... زي ما وصلهم من الأستاذ

ثروت... هما حتى مش عارفين يوصلوله ولا يعرفوا هو في أنهي  
قسم... وكملت كلامها: أنا إحساسي كبير إن خطيبك.... قصدي  
جوزك ورا اللي فيه كريم... أرجوكي يا سلمى... احنا ملناش  
غيره في الدنيا... واتفتحت في العياط.

ردت سلمى بتحدي: متقلقيش يا دينا... متقلقيش.

قفلت سلمى مع دينا واتصلت بخالد وقالت له بنبرة حادة:

تعالالي حالياً على الكوافير يا خالد لو سمحت.

رد خالد باستغراب: دلوقتي؟؟ دي الساعة مجتش ٥... أنتِ  
خلصتي؟؟؟ لسه بدري على الزفة.

ردت سلمى بعصبية: لو مجتش حالياً مش هيبقى في زفة  
أصلاً.

رن موبايل سلمى برقم خالد: سلمى أنا برة الكوافير.

قامت سلمى وهي بالفستان ورولات الشعر ملفوفة على  
شعرها وبنص مكياج وشها.... رفعت جيبونها ونزلت تحت...  
جريت وراها سالي:

أنتِ رايحة فييييين!!!!!! مينفعش العريس يشوفك  
بالفستان... ده فال وحش.

نزلت سلمى وكأنها مش سامعة حاجة ووقفت أدامه وقالت

بهدهوء:

لو كريم مروحش انهارده يا خالد مش هتلاقيني... أنا  
عارفة إنك اللي عملت كده... أنت إيه يا أخي... عمك إيه!!!

رد خالد ببرود: فكر ياخذك مني.

ردت سلمى: وأديك أخذت كل حاجة... كل حاجة حتى  
بالغصب... كريم يرجع انهارده وإلا قسماً بالله ما في فرح...  
وهقلب الليلة فوقها تحتها.

رد خالد: للدرجة دي؟؟؟؟

ردت سلمى بعصبية: أه للدرجة دي... لما تضيع مستقبل بني  
آدم يبقى للدرجة دي... بني آدم أمه وإخواته البنات متشعلقين في  
رقبته يبقى للدرجادي... طلع موبايلك... وزي ما عملت اتصالاتك  
علشان تضيعه... تعمل نفس الاتصالات تاني تخرجه ومش طالعة  
من هنا إلا لما أعرف إنه في بيته.

لف خالد ومشى وبعد حوالي ساعتين رن موبايل سلمى برقم  
دينا تبلغها إن كريم روح وإنه رافض يكلم أي حد.

في الزفة كان الكل فرحان ومبسوط وبيرقص... وهي كان كل شويه يطلع لها مديحة أو سالي يقولولها تضحك علشان الناس بتسأل العروسة مالها مكشرة كده ليه!!!

في البيت كانت سلمى قاعدة على طرف السرير بفستانها... خرج خالد غير هدومه... أكل تفاحة... ورجع لقاها لسه على نفس القعدة... قرب منها وسألها: مش هتقومي تغيري هدومك؟؟ ردت سلمى: هغير وهروح أنام في أوضة الأطفال.

رد خالد باستغراب: نعم.... في عروسة تمام في أوضة لوحدها؟؟؟

ردت سلمى بأسى: عروسة؟؟؟ هي فين العروسة؟؟؟ أقولك على حاجة معتقدشي إن في عروسة قالتها لعريسها قبل كده يوم فرحهم!!!! أنا حامل.

رد خالد: حامل؟؟؟

سلمى: أه حامل... كسرت فيا فرحة العروسة... وبدأت دموعها تنزل... أنا متمنتش كتير من الدنيا... أنا اتمنيت أحب وأتحب.. حد يحس بيا... حد حابب فرحي.. ووقت جرحي بيكي بدالي.. كان نفسي أفرح بالخطوبة اللي الكل بيتقول إنها أسعد فترة في حياة أي بنت... أفرح باليوم اللي بتستاه كل بنت من أول

ما بتوعى... كان نفسي أفرح بفسطاني الأبيض وطرحتي التل...  
كان نفسي الليلة تبقى أسعد ليلة في حياتي... كان نفسي أبقى  
بين إيديك برضايأ مش غصب عني... أرجوك اطلع برة.. أنا  
بجد تعبانة.. وافتحت في العياط.

رن موبايل كريم برقم ثروت اللي اعتذر منه كريم على إن  
بقاله كام يوم في أجازة بس هيرجع الشغل من بكرة... لكن جه رد  
ثروت غريب لما قاله:

أنا يا كريم بعترك زي ابني... وأنت ونعم الناس... بس  
معلشي يا ابني بعد اللي حصل معادش ينفع تكمل معانا... أنا  
هخلي محمد من الحسابات يكلمك ويشوف حسابك كام.

كان عدى على جوازهم ٥ أيام... هي في أوضة وهو في  
أوضة.. كانت بتخرج بس لما حد بييجي يبارك مش أكثر.. جالها  
وقال: طب تعالي نطلع أي مكان كام يوم... أجازتي قربت تخلص.  
ردت سلمى: لا.

رد خالد بعصبية: أنا مستحملك... بس خلاص فاض بيا....  
متخلنيش أعمل حاجة غصب عنك... فوقي بقى.  
ردت سلمى ببرود: أنا سكت مرة ومش هسكت ثاني.. أنت  
كله بقى عندك غصب.. خلي عندك إحساس بقى.

هجم عليها خالد يحاول يبوسها: تعالي أوريكي الإحساس  
بقى... أنتِ كده ادلعتي كثير.

زقته سلمى عنها وجريت على المطبخ جابت سكينه ووجهت  
سلاحها ناحية بطنها: قرب مني كده... وأنا هموت نفسي...  
وهموت اللي في بطني كمان.

قرب منها خالد وبحركة سريعة خطف منها السكينه...  
بدأت تصرخ بشكل هستيري... ضربها قلم على خدها اليمين  
بكل قوته... وقعت سلمى على الأرض بنقط دم على بؤها.

رن جرس بيت عبد الفتاح... فتح الباب... كانت سلمى... بشنطة  
هدوم جمبها... وكدمة زرقا على عنقها... وورم في شفايفها.

اتذعر عبد الفتاح: مالك يا سلمى في إيه يا بنتي؟؟؟

في الصالون كان خالد موجود مش عاوز يقول سبب الخناق  
زيها بالظبط: يا عمي من فضلك عاوز مراتي.

عبد الفتاح: يا ابني إيه اللي حصل؟؟؟

كرر خالد بعصبية: يا عمي لو سمحت عاوز مراتي.

رد عبد الفتاح بتهديد: أولاً متعليش صوتك هنا... ثانياً مراتك  
مش عاوزة تروح معاك... أنا معرفش إيه حصل بينكم... بس

اللي أعرفه إن بنتي رجعت لي بعد أسبوع من جوازها مضروبة..  
وأنا اللي يلمس بنتي هحطمه... أنت فاهم.

رد خالد بنبرة حادة: أنت راجل كبير... وأنا مش عاوز أغلط  
فيك... خش اندهلها بدل ما أدخل أجيبها من شعرها.

وقف عبد الفتاح بتحدي: أبقى مش راجل لو خدت بنتي من  
بيتي غصب عني... اطلع برة.

رد خالد: تمام... وأنا هندمك وأندمها.

عبد الفتاح: أعلى ما في خيلك اركبه.

بعد كام يوم رن جرس الباب: منزل الأستاذ عبد الفتاح  
الأسواني؟؟

رد عبد الفتاح: أيوة يا ابني خير؟؟؟

رد: أنا محضر... ومعايا إعلان قضية مرفوعة عليك.

ارتبك عبد الفتاح: قضية؟؟؟ قضية إيه يا ابني؟؟؟

رد المحضر: قضية مرفوعة عليك من السيد خالد ياسين  
بشيكات بدون رصيد... من فضلك امضي هنا.....



## شنطرة مشاعر (الحلقة الثامنة)

رد المحضر: قضية مرفوعة عليك من السيد خالد ياسين  
بشيكات بدون رصيد... من فضلك امضي هنا.....  
ندهت مديحة: الحقيني يا سلمى.... هاتي كوباية ميه بسكر  
لأبوكي.

لما فاق عبد الفتاح قال لمديحة بتعب: ناوليني... عقد حنة  
الأرض أبعها وأسدد له وصولات الأمانة بتاعته.

خبطت مديحة على صدرها: هتبيع الأرض يا حاج؟؟؟ ده دي  
اللي فاضلانا... والإيجار اللي ببيجي منها أهو بيساعد بأي  
حاجة.... ولسه لو سلمى جالها نصيبها... وكمان...

قاطعها عبد الفتاح: يا مديحة.... ده حقه في الأول والأخر  
بغض النظر عن طريقة طلبه لسداد الدين.... أنا بحتة الأرض  
دي بسدد ديني... وبشتري سلمى يا مديحة.

عند المحامي كان عبد الفتاح موجود وقال: الفلوس أهه يا  
أستاذ مصطفى... شوف نسوي القضية إزاي... أنا مش عاوز  
الموضوع يكبر.



رد خالد: يعني إيه يا طنط أسيبكم في حالكم؟؟؟

ردت مديحة: يعني عبد الفتاح باع الأرض اللي حيلته علشان يخلص سلمى منك... ولو كان على وش الدنيا كان قالك الكلام ده... زي ما دخلنا بالمعروف يا ابني... نخرج بالمعرووووف.

رد خالد بتهمك: مش مطلق... وهسيبها كده زي البيت الوقف... وزى ما أنتِ قولتي... لا وقته ولا أوانه.... كلامنا بعدين.

الحياة كانت هادية... مبتخلاش من مناوشات من خالد لرجوع سلمى البيت.... كانت مديحة بتدبل يوم عن يوم.... كانت بتلمع إزاز السفارة... مسكت راسها كأنها بتلف بيها.... لحقتها سلمى:

مالك يا ماما؟؟؟؟

ردت مديحة: مفيش يا بنتي... دي دوخة بسيطة... أكمني مفطرتش كويس.

سألته سلمى: ماما أنتِ جبتي الدوا بتاع الشهر ده؟؟؟؟

ردت مديحة بارتباك: هه؟؟؟؟ يووووه نسيت.

ردت سلمى: لا يا ماما أنتِ منستيش... أنتِ مش راضية تقولي لي مفيش فلوس... تجارة بابا الله يرحمه خلاص اتقلت... ومعاشك مبكففيش حاجة... أنا هنزل أشتغل يا ماما.

ردت مديحة: تشتغلي فين ببطنك اللي أدامك دي.... ربك هيفرجها من عنده... متقلقيش يا بنتي.

في مكتب سيادة اللواء كان خالد واقف انتباه.... وبرسمية شديدة قال: خير يا فندم... تحت أمر سعادتك.

رد اللواء: في بلاغات متقدمة ضدك يا خالد.... بأنك بتقبل رشاوي في سبيل تقفيل محاضر كبيرة لناس كبار.... مطلوب التحقيق معاك... ومكديش عليك الموضوع ممكن يوصل لفصل.... شد حيلك.

في صالة بيت عبد الفتاح كان قاعد أدامها... دقنه طويلة... ثلاث زراير من قميصه مفتوحين... مبهدل على غير العادة:

سلمى أنا سبت الشغل... حصل مشاكل كثير اضطرتني إني أقدم استقالتني أفضل لي.... سلمى أنا محتاجك جمبي... وكمل بخجل... الفلوس اللي عمي الله يرحمه ادهالي هبدأ بيها مشروع صغير... وأنت خلاص قربتي تولدي.... عاوز بنتنا تتربى بينا يا سلمى... مش هي بنت برودة!!!

جه صوت مديحة من ورا الستارة: يا سلمى يا سلمى... قامت سلمى لمديحة اللي مسكتها من دراعتها وقالت لها:

متروحيش معاه يا سلمى... أنا قلقانة عليكى يا بنتى معاه...  
خليكى معايا أنا وأختك... أنا...

قاطعتها سلمى: يا ماما... اللي ميشوفش من الغريال... وأنا  
شايغة الوضع... أنا على وش ولادة ومصاريف... أنا هروح معاه  
لأسباب كتير... أولها إنى أديله فرصة تانية... علشان ضميرى  
ميوجعنيش إنى حرمت بنتى من أبوها... يمكن يتعدل يا ماما...  
يمكن.

بعد كام شهر من حياة شبه هادية... لكن ما تخلاش من  
حنين لكريم... وما تخلاش برده من اكتشاف سلمى لحاجات  
تحرق الدم على لاب توب خالد... فيديوهات ومحادثات وصدقات  
تقرف... بس كانت بتبرر لنفسها إن ده بسبب بعدها عنه... أكيد  
كان عنده فراغ بيعوضه بالحاجات المقرفة دي.

شغل خالد الجديد كان زي الموجة... بس للأسف كان معظم  
الوقت في خسارة... ولدت سلمى... جابت بنت زي القمر... جابت  
فرح.

وهي في سريرها مامتها بلغتها إن في واحدة صاحبتها برة  
تقريباً جايه تبارك لها... واستغربت سلمى إنها أول مرة تشوفها:  
أهلاً وسهلاً... اتفضلى... اتفضلى أقعدي.

قعدت الضيفة وعلى استحياء قالت لها: أنا دينا يا سلمى...  
فاكراني ولا لا... أنا كلمتك قبل كده.

سلمى حست إنها بتشوف كريم... فعلاً فيها ملامح منه...  
اترسمت على وشها ابتسامة... من كتييير منورتش وشها...  
وقالت بفرحة: بجد؟؟؟ أنت دينا؟؟؟ أنا مش مصدقة والله.

ردت دينا: حمد الله على سلامتك... أنا عرفت من نهى إنك  
قومتي بالسلامة... وكملت بكسوف... ولما كريم عرف أصر إنني  
أجي وأجيب لك دي.. واداتها علبة قطيفة صغيرة.

مدت سلمى إيديها وفتحت العلبة... لقت سلسلة رقيقة  
بحرف الـ S

ردت سلمى: أنا سميت فرح.

قالت لها دينا: معلش هو ميعرفش اسم البيبي... فجاب أول  
حرف من اسمك... كريم بيقولك يا سلمى إنه مسافر.. أستاذ  
ثروت خلاله يسيب الشغل... جاله عقد برة وخلص مسافر....  
وبيقولك إنه... إنه.....

ردت سلمى: كملي يا دينا... إنه إيه؟؟؟

ردت دينا: إنه هيخطب رضوى قبل ما يسافر.... سلمى احنا  
مممكن نكون صحاب مش كده؟؟؟

ردت سلمى بدموع في عينيها: طبعاً يا دينا... ده شرف ليا.

مكانتش الدموع المرة دي دموع حنين... كانت غضبانة منه أووووي... هيخطب؟؟؟ أمال إيه مسئولية وإيه مش هتجوز وإخواني البنات؟؟؟

استأذنت دينا ومشيت... دخلت مديحة: أنا هنزل يا سلمى... أنا عملت لك أكل والشقة نضفتها... هنزل قبل ما جوزك يبجي وعاززة أعمل أكل لأختك قبل ما ترجع من كليتها... خلي بالك من نفسك ومن فرح.

بعدها بدقايق كان خالد في البيت... دخل على سلمى أوضتها... وبنبرة حادة: البت دي كانت بتعمل إيه هنا؟؟؟؟؟؟؟؟  
ارتبكت سلمى: بنت... بنت مين؟؟؟

رد خالد بنفس العصبية: أنت مفكراني معرفش عيلته كلها؟؟؟  
ده أنا ياما حظيتهم تحت مراقبتي... انطقي يا سافلة... باعت لك أخته ليه الكلب؟؟

ردت سلمى: أنا مسمحلکش تغلط فيا.... ولا حتى فيه...  
متتعداش حدودك.

راح خالد على سريرها... شدها وقعت من على السرير...  
وبدأ يضرب فيها وهو يقول: أنا هربيكي من أول وجديد يا  
فاجرة... وصوت عياط فرح مبيتقطعش... كأنها فاهمة الحوار  
اللي داير بينهم.

في المستشفى خرجت الدكتورة لمديحة وقالت لها:

عندها نزيف حاد.... وكمان في غرز فكت من جرح القيصرية...  
إزاي واحدة والدة تعمل المجهود ده؟؟؟ ولا هي مضروبة ولا إيه؟؟  
في كدمات في كل حته من جسمها... أنا مضطرة أعمل محضر.

لكن سلمى رفضت وبشدة لما مديحة بلغتها كلام الدكتورة  
وقالت: مينفعش يا ماما... محضر إيه.... هعمل محضر في أبو  
بنتي؟؟؟ غير كده خالد ساب شغله أه... لكن معارفه كتير....  
المحضر ده هبله واشرب ميتة... واكتفت إنها تقول إنها وقعت من  
على السلم وده سبب الكدمات.

في البيت كانت مديحة واقفة بتطبخ.... دخلت عليها سالي  
وبالين عليها الارتباك: أمال سلمى وفرح فين يا ماما؟

ردت مديحة: فرح عذبت أختك على ما رضعت ونامت...  
قولتلها ادخلي نامي شوية على ما أحضر الأكل... في إيه يا سالي؟

ردت سالي: قابلت واحد تحت ببسأل على سلمى... واداني  
الورقة دي.

أخذت مديحة الورقة من إيد سالي: ورقة؟؟؟ ورقة إيه دي؟؟؟  
إيييييييييييييييييه؟؟؟ ووقعت مديحة مغمى عليها.

●●●

oboiikan.com

# شنترة مشاعر (الحلقة التاسعة)

ردت سلمى بذهول: بتقولي إيه يا ماما؟؟؟ بيت طاعة؟؟؟  
طالبني في بيت الطاعة؟؟

ردت مديحة بدموع مالية عينيها: أنا هكلم المحامي يشوف  
لنا حل معاه... مش هسيك تروحي له تاني.

في مكتب الأستاذ مصطفى المحامي كانت مديحة بتستشيريه  
في الوضع اللي رد وقال:

للأسف يا حاجة منقدرش نعمل أي حاجة... لو كانت سلمى  
عملت محضر وهي في المستشفى كان الوضع اختلف... وكان ممكن  
كمان أرفع لها قضية طلاق للضرر... لكن حالياً... مقدمهاش  
غير إنها تتفند.

كانت داخلة البيت هي وفرح زي الطفل اللي كاره مدرسته...  
كان قاعد مستيتها بعيون شامته.. وبص لها وقال: قولتك هريكي  
من أول وجديد.

ردت سلمى: أنت عملت اللي أنت عاوزه... عايز إيه تاني  
مني؟

رد خالد بتهكم: ولاااااااا أي حاجة... أنتِ اللي زيك خلاص  
ميتعازش منه حاجة... حبيت أثبت لك إنني أعرف أجيبك أي  
وقت.. زي ما أعرف أمريكي أي وقت... واحمدى ربنا إنك جيتي  
هنا... كان ممكن أخلي بيتك زي ما القانون قال... حصيرة تنامي  
عليها وقلة ميه تشربي منها.

دخلت سلمى أوضتها... فتحت شنطة هدومها... وبدأت  
تفضي هدومها وهدوم فرح في الدولاب... لاحظت إن علبة  
الذهب بتاعتها مفتوحة... هي متعودة تشيلها مقفولة... وكمان  
بتدريها في الهدوم... فتحت علبة الذهب... وكانت المفاجأة...  
العلبة فاضية.

جريت عليه... الحقني يا خالد: الذهب اتسرق.

رد خالد ببرود: أنا أخذته.

صرخت سلمى: يعني إيه أخذته؟؟ وإزاي تعمل كده من غير

ما تقولي؟؟؟

رد خالد: اتزنقت في فلوس شغل وكنت محتاج سيولة... أعمل

إيه يعني؟؟؟

ردت سلمى بدموع: بس ده مكانش شبكتي وبس... ده كان

كمان ذهب جايبهولي بابا الله يرحمه.

رد خالد بتهكم: الله يرحمه بقى.

سلمى وهي بتعيط: حسبي الله ونعم الوكيل فيك... حسبي  
الله ونعم الوكييييييل.

كان البيت باااااارد... وكل اللي مصبرها على الدنيا ضحكة  
فرح.. فرح وهي فرح حياتها... أوقات كتير كانت بتكلم دينا  
من وراه... مكانتش بتسأل على كريم... بس لما كانت بتفضفض  
معاها كانت بتحس إنها بتفضفض معاه... في يوم لما خالد سافر  
كلمت دينا:

ممكن أقابلك يا دينا... محتاجة أتكلم معاكي.

ردت دينا بقلق: طبعاً يا سلمى... بس أنا خايفة يحصلك  
مشاكل بسببي تاني.

سلمى: إذا كان على خالد فهو مسافر يومين... ومعتقدش إنه  
بيراقبني كمان.

في كافيته هادي كانت سلمى ودينا على تراييزة واحدة.... جه  
الويتر بعصير... حط كوباية أدام كل واحدة ومشى... التفتت دينا  
لسلمى وقالت:

هاه يا ستي... قولني لي مالك... طلعي كل اللي جواكي يا  
سلمى.

اتتهدت سلمى: أنا تعبانة أوي يا دينا... وحاسة إني بغرق  
ومش عارفة أَلحق نفسي.

سألته دينا: وأنتِ إيه رجعتك بس؟

حكّت سلمى لدينا على كل اللي حصل وكملت:

مش بس كده يا دينا؟؟؟؟ ده كمان باع كل الذهب اللي حيلتي...  
وكذب عليا وقالني إنه كان عاوز الفلوس علشان الشغل.

ردت دينا: مش يمكن يا سلمى كان محتاج فعلاً فلوس  
للشغل... يمكن لما الشغل يمشي يا دينا يعوضك ويجيبلك أحسن  
منه.

ردت سلمى بدموع: شغل إيه يا دينا.... اتفضلي اقري فلوسي  
بيتجاب بيها إيه؟؟

أخذت دينا الورقة وفتحتها... كانت فاتورة لمحل مجوهرات...  
وشهقت وهي بتقول: خاتم الماظ؟؟؟ ١٢٠ ألف جنيه؟؟؟ وده لمين  
ده يا سلمى؟

ردت سلمى بأسى: متسألنيش.... وياريته على كده وبس....  
ده غير كمان السهرات والعزومات.

سألته دينا: وأنتِ عرفتي منين يا سلمى كل ده؟

ردت: كله بالصدف..... فاتورة الخاتم والعزومات لاقيتها في  
جيب الجاكيث بتاعه بالصدفة وأنا بفضيه علشان أبعته الدراي  
كلين... أنتِ عارفة هو فين دلوقتي؟؟؟ مش بيخلص جمارك زي  
ما قالي ولا حاجة.... أنا شوفت تأكيد حجز الفندق بعنيا يا  
دينا.... أوضة يومين على البحر.... لفردين يا دينا... فردين.

وبحزن سألتها دينا: أنتِ إزاي مستحيلة كده؟؟؟

... كانت مديحة بتكلمها ١٠٠ مرة في اليوم: طمنيني عليكي

يا سلمى وعلى فرح؟

سلمى: احنا كويسين يا ماما... متقلقيش علينا... هو  
مبيكلمنيش أصلاً.... وبدأت تعيط.... أنتِ وحشتيني أنتِ وسالي  
أوووي... لا راضي آجي لك... ولا أنتِ عاوزه تيجي.

ردت مديحة وهي بتكتم دموعها: وأنتِ كمان يا حبيبتي  
وحشتيني أووووي... اصبري معلش... واجمدي علشان بنتك....  
متعيطيش بقى أنتِ بترضعي... أقولك... ادخلي شغلي قرآن...  
هيريحك والله يا بنتي.

قفلت سلمى التليفون... ومسحت دموعها.... دورت على  
اللاب تشغل قرآن زي ما قالت لها مديحة... ولما فتحت اللاب  
لقت الكارثة.... مش بس طلعت فيديوهات ومحادثات... الموضوع

أكبر من كده بكتييييييييييييييييييييييير... شافت المحادثة اللي كانت  
بقالها فترة مش قليلة... وده كان جزء منها:

وردة الحب: حبيبي خلاص التاشيرة على وشك إنها تطلع...  
أنا مش مصدقة إنني هشوفك وهتبقى معايا.

خالد: أنا حاسس إنني أعرفك من سنين... أخيراً هبدأ  
حياتي من جديد.

وردة الحب: أول ما توصل... هنروح السفارة على طول ونكتب  
الكتاب... أنا مش مصدقة نفسي.

خالد: ولا أنا يا روحي.

وردة الحب: هاه... قوللي عملت إيه في موضوع الفلوس...  
المشروع محتاج سيولة يا لودي.

خالد: والله ما عارف أقولك إيه... حتى فلوس ذهب البومة  
خسرتها في بضاعة اتحجرت في المينا مش راضيين يفرجوا عنها...  
والباقى خلص في شوية مصاريف.

وردة الحب: طب والحل يا لودي؟؟؟؟

خالد: ولا يهملك... أنا كنت مدكن ١٠٠ ألف على جنب  
محدث يعرف عنهم حاجة... وفي كمان حاجة كده هتصرف فيها  
هتجيبلي بتاع ٤٠٠ ألف كمان... دول يكفوا.

وردة الحب: ميكفوش يا روحي... بس متقلقش... أنا هكمل  
عليهم ونبدأ على طول... ومنتساش تبعت لي الشيك لحامله...  
أنت عارف إن في بيني وبين البنك مشكلة على آخر قرض للقرية  
السياحية... مش عاوزاهم يصدعونني.

كانت أعصابها متخدرة... كأن حد كب جردل فيه متلجة  
على راسها... مكانتش حتى قادرة تقوم من مكانها... بس قامت  
لما جرس الباب رن... فتحت الباب لقت البواب ومعه اتنين رجالة  
وست:

صباح الخير يا ست سلمى.

ردت سلمى: صباح النور يا عرفة.... وبصت على الناس اللي  
معه... خير يا عرفة في حاجة؟؟

رد عرفة: البهوات والمدام جايين يتفرجوا على الشقة زي ما  
أمر خالد بيه.

ردت سلمى بذهول: يتفرجوا على الشقة إزاي يعني؟؟  
وليه.....



oboiikan.com

# شنطت مشاعر

## (الحلقة العاشرة والأخيرة)

رد واحد من اللتين اللتي مع البواب: يا مدام احنا متفقين مع  
أستاذ خالد على كل حاجة... وعارفين إنه مسافر... وهو قالنا  
أنا راجع انهاردة... وقالنا كمان لو الشقة عجبنا ممكن نمضي  
عقد ابتدائي انهاردة ونبقى نسجله في الشهر العقاري بعد كده.

كانت سلمى قاعدة على كرسي الصالون كأنها بتعلم....  
والبواب واللتي معاه رايعين جاينين في الشقة... لحد أوضة النوم  
دخلوها واتخرجوا عليها... وبصت الست للبواب وقالت له: قول  
لخالد بيه إن في حاجات في العفش أسعارها هتتغير... مش كل  
العفش ستايل زي ما قال.

ردت سلمى بعصبية: عفش؟؟؟ عفش إيه كمان؟؟؟ هو يبيع  
شقتة هو حر... لكن العفش ده عفشى... وفي قائمة متسجل فيها  
كل فنتوتة في البيت ده.

ردت الست بعدم اهتمام: والله دي مشاكل خاصة بيكم تحلوها  
مع بعض احنا ملناش دخل فيها... الاتفاق على الشقة والعفش  
مع بعض.

لما رجع من السفر كانت مستتياه سلمى.... شايلة فرح....  
وجمبها تلات شنط كبار... بص لها خالد وقال:

إيه؟؟؟ هتسيبي البيت؟؟؟؟ متستعجليش كده كده هتسيبيه.

ردت سلمى: أنت فعلاً هتبيع الشقة؟

رد خالد وهو بيحط سلسلة مفاتيحه على التراييزة: أنا  
خلاص مضيت العقد.

ردت سلمى بقوة: طلقني يا خالد... أنا عرفت كل حاجة  
خلاص... عرفت إنك مسافر... وعرفت إنك متفق مع واحدة  
تانية على الجواز... وأعرف من البواب إنك بتبيع الشقة زي زي  
الغرب؟؟؟ كأنك بتقطع أي صلة بتربطك بهنا قبل ما تسافر...  
أرجوك... طلقني بهدوء أنا مش عاوزه أعيش معاك.

رد خالد: أنتِ عمرك ما تفهمي ولا تحسي.... مش هتفهمي  
يعني إيه كانت في يوم من الأيام كلمتي تهز شنبات... يتفتح لي  
بيان بإشارة... كنت خالد بيه... عارفة يعني إيه خالد بيه....  
وفجأة من خالد بيه لواحد ضايع... وعلشان إيه... علشان  
تسليك مصالح... طب ما كل الناس بتسلك مصالح.... بس أنا  
كنت كبش الفدا اللي ضحوا بيه... أه هتجوز.... واحدة وجيالي  
لحد عندي.... معاها فلوس متلثة مش عارفة تصرفها فين...  
هتخليني أرجع خالد تاني... خالد بيه.



في مكتب الأستاذ مصطفى المحامي كانت سلمى وخالد  
ومديحة موجودين... قال مصطفى:

يا أستاذ خالد مدام سلمى موافقة على الطلاق والتنازل عن  
كل حقوقها... لكن بشرط إن الطلاق يبقى طلاق بائن لا رجعة  
فيه... طلاق بالتلاثة يعني زي ما بنقول.

رد خالد: موافق... بس تمضي التنازل الأول.

رد مصطفى: الورقتين هيتمضوا في نفس الوقت... أنت  
هتتمضي ورقة الطلاق... وهي هتتمضي ورقة التنازل.

في بيت عبد الفتاح اتلم شمل مديحة وسالي وسلمى وفرح....  
كان الحال ضيق بس كانت حاسة إنها حرة... حسست إنها رجعت  
زي زمان... كان فاضل بس وجود أبوها جمبها... بس كأن ربنا  
بعث لها فرح علشان تعوضها ولو جزء صغير من فقدان أبوها.

رن جرس الباب... راحت فتحت سلمى... واتهلل وشها وهي  
بتقول:

دينا!!!!... اتفضلني يا حبيبتي.... وحشتيني أووووي.

قعدت دينا وهي بتسأل: طمنيني عليكي... عاملة إيه...  
مبسوطة؟؟؟ وإزي فرح... أمال هي فين البت دي؟

ردت سلمى: رضعت ونامت... احنا كويسين يا دينا.. حاسة  
إني كنت في كابوس وصحيت منه.

فتحت دينا شنطتها... طلعت ظرف منه وقالت لها: دي أمانة  
ليكي معايا.

أخذت سلمى الظرف: إيه ده يا دينا؟؟؟؟

ردت دينا وهي بتقوم وبتأخذ شنطتها على كتفها: بقولك  
إيه... أنا عندي شغل... ابقى افتحيه براحتك... وابقى كلميني  
طمينيني عليكى..... ياالا سلام.

فتحت سلمى الظرف... كان فيه ورقتين.... فتحت أول ورقة  
وكان نصها كالاتي:

عزيزتي سلمى....

فات وقت طويل أوووي على آخر كلام بينا.... بس عمري ما  
نسيت حرف من حروف أي كلمة اتكلمناها سوا.... كنت فاكر يا  
سلمى الغربية بتتسي... بس طلعت بتكبر الحنين اللي جوانا أكثر...  
مكنتش بحاول أكلمك وكنت عارف إنك مش بتسألني عليا لأنه لا  
كان حقك ولا حقي... بس كنت بعرف كل أخبارك من دينا...  
استتي... متزعليش منها... هي كانت بتحكى أخبارك بحسرة...  
كنت بحس إنها نفسها تملك حاجة ومش قادرة... وأنا كمان كان

نفسى أعملك أي حاجة تساعدك... أنا معرفتش أعمل أي حاجة  
زمان... ومش بس كده... كان مستقبلي هيضيع بقضية ظلم....  
اتقطع عيشي... واتهدلت أمني وإخواني البنات ظلم... وبعدت  
عنهم أسعى على أكل عيشي وهما ملهمش غيري... كنت مسافر  
بشنطة هدومي وحاسس إنني شايل شنطة مشاعر.... مشاعر  
حب وكره وسخط على واقع مش عارف أغيره... وبعدت عنك  
أنتِ كمان وأنا عارف إنك محتاجاني... خليت دينا تكذب عليكي  
وتقولك إنني خطبت وده محصلش علشان متفكرش فيا... كان  
عندي أمل إنه يخليكي تحبيه... سامحيني يا سلمى... كان لازم  
أنتقم.... كان لازم أخلصك بعد ما اتأكدت إن مفيش أمل فيه....  
وعلى فكرة أنا معملتش كده ومستتي منك أي حاجة.... أنا عارف  
إنه موت حاجات كتير حلوة جواكي.... بس أنا هستاكي العمر  
كله يا سلمى أنتِ وفرح... حتى لو مجيتوش... هفضل برده  
مستتي... متزعليش من وردة الحب يا سلمى... علشان لو زعلتي  
منها يبقى زعلتي منى.... سامحيني.

كريم.

وفي نفس الوقت في المطار.... طلع خالد الباسبور في مكان  
ختم الجوازات.... بص الظابط للجواز بتمعن... وبص لخالد  
وسأل: اسمك إيه؟؟؟

رد خالد: موجود عند حضرتك الاسم.... خالد ياسين.

رجع الطابط بص للجواز تاني: التأشيرة دي مزورة.

اتخذ خالد: مزورة؟؟؟؟؟ مزورة إزاي يعني؟؟؟؟؟؟

رد الطابط: لا ده موضوع كبير وهنبقى نتفاهم فيه سوا.

وفجأة لقي خالد اتنين ضباط... واحد على يمينه والتاني على شماله وهو بيقوله: اتفضل معانا من غير شوشرة لو سمحت.

فتحت سلمى الورقة الثانية من الظرف وكانت عبارة عن شيك بخط خالد:

(ادفعوا لحامله مبلغ وقدره خمسمائة ألف جنيه مصري فقط لا غير).

**تمت بحمد الله**



oboiikan.com

# أحاسيس في صندوق

مقدمة:

كثير مننا قابل ناس صح في وقت غلط.... وقابل ناس غلط  
برده في الوقت الغلط... الغلط بيوجب غلط لأنه في الأصل غلط.

يا ترى ريم غلطت إنها حبت؟؟؟؟؟

ولا مازن هو اللي اتعامل غلط؟؟؟؟؟

ولا أصلاً فين الغلط؟؟؟؟؟

obseikan.com

# أحاسيس في صندوق (الحلقة الأولى)

ريم بنت عادية من عائلة متوسطة.. اتخرجت من كليتها واتخطبت خطوبة صالونات لما لقت إن أصحابها بدأوا يتخطبوا واحدة ورا الثانية ولما أهلها شافوا إنه حد كويس على حد قولهم لكن ريم بعد ما نزلت الحياة العملية والشغل بدأت تدرك إن مش ده الإنسان المناسب ليها وقررت بعد كام شهر من الخطوبة فسحها وسط اعتراض من أسرتها لأنهم في قرية شبه ريفية اتنقلت من شغل لشغل ومن شركة لشركة لكن كان في دايمًا سبب إنها تنتقل... ومع متابعة إعلانات الوظائف قدمت لوظيفة في شركة استثمار عقاري وبعد يومين اتصلت بيها وفاء سكرتيرة الشركة بأن في تدريب هيبداً من يوم السبت وريم من ضمن قائمة ١٥ اسم تم اختيارهم مبدئياً

كانت ريم في مياعدها في الشركة الساعة ١٠ الصبح بالتمام دخل مستر أمجد رئيس مجلس إدارة الشركة وصاحبها قاعة التدريب.

أمجد: صباح الخير يا جماعة... منورين الشركة... طبعاً تم تبليغكم من مس وفاء إن تم اختياركم للتدريب بس حابب أضيف إنه ه يتم اختيار أربعة بس من العدد ده بناءً على التقييم اللي ه يكون في آخر التدريب وهيقوم بتدريكم مستر مازن نائب رئيس مجلس الإدارة فياريت نستفاد منه على أد ما نقدر، مازن كان واقف سامع كل كلام أمجد في هدوء بملامحه السمرا الوسيمة وشياكته الملحوظة.

مازن: صباح الخير.. زي ما مستر أمجد وضع التدريب بتاعنا هيبقى شامل حاجات كتير تؤهلكم للعمل بثقة بعد كده إن شاء الله وهنخلي أول يوم في التدريب موضوعه كيفية التعامل مع العميل بأنواعه... العملا يا جماعة مختلفين في الشخصيات وبالتالي التعامل معاهم مينفعش يكون بطريقة واحدة... وده يخلينا نتطرق إننا نقول إننا لازلنا نتعامل مع العميل الأول ومن خلال التعامل المبدئي نحدد إزاي نتعامل معاه لكن كلام مازن لقي اعتراض من محمد واحد من المتدربين. محمد: بس أنا شايف إنني ممكن أستشف ملامح مبدئية من شخصية العميل حتى من قبل التعامل.

قاطع مازن: طب تمام.. أنا أهه.. اعتبرني عميل واستشف ملامح من شخصيتي. لكن محمد ارتبك وبدأت مهمات من الموجودين.



ریم: ریم... اسمی ریم وکأنها بتقوله افکر الاسم ده کویس...  
لأنه هیغیر حیاتک.

...

# أحاسيس في صندوق (الحلقة الثانية)

اليوم الثاني للتدريب كان حاضر ١٤ متدرب بس مش ١٥ زي ما مس وفاء قالت لمازن... الساعة ١٠ بالتمام مازن دخل قاعة التدريب... كان بيدور عليها بالتحديد... بس للأسف ملقهاش ... بس بعد دقائق من بداية التدريب كان في خبطة رقيقة على الباب... بس الخبطة مكانتش على الباب و بس... الخبطة كانت على قلب مازن كمان... لما حس فجأة إن قلبه دقاته بقت أسرع بمجرد إنه لمح ريم من الباب.

ريم: أنا أسفة جداً على التأخير... كان في حادثة على الكوبري والطريق كان واقف.

رد عليها مازن برسمة الشغل، مازن: مفيش مشكلة اتفضلي وهعيد من الأول، ولف مازن على البورد وكتب (مهارات التسويق) كعنوان... لكن ريم لاحظت إن إيد مازن فاضية... إيده مفيهاش الخاتم، مرت أيام التدريب.. وفي اليوم الأخير اتعلقت ورقة بأسامي المقبولين الأربعة: علا- أشرف- ريم- محمد، الموضوع كان تنافسي بين الموجودين لإثبات الوجود... الكل كان ملتزم...

الكل كان جاد في شغله... واستغرب أمجد ومازن من شغل ريم  
اللي كانت زي اللي بقالها سنيين في المجال مش مبتدئه... اللي  
خلى أمجد يقول عليه حظ مبتدئين، في بيت ريم دخلت عليها  
مامتها مدام تهاني... مدام تهاني ست بيت... سابت شغلها  
علشان تهتم بريم ومنى بناتها بناءً على رغبة حسين جوزها حتى  
لو مرتبه فب التربية والتعليم يادووووب على الأد... بس كانوا  
راضيين أوووي بالحال.

تهاني: مرتاحة يا ريم في شغلك الجديد؟

ريم: أه يا ماما الحمد لله... الناس كويسة ومقدرين شغلي...  
بس يا ماما!!!!

تهاني: بس إيه يا حبيبتى قولي؟؟

ريم: كنت محتاجة أشتري كمبيوتر علشان أتابع شغلي...  
والله يا ماما أنا عارفة الحال... بس متابعة شغلي هتخلينى أزود  
الشغل والعمولات وده في مصلحتي.

سكتت تهاني لحظة بتفكر وقالت: طيب بصي... أنا هديكي  
مقدم تجيبي الكمبيوتر ومن شغلك تبقي تدفعي الأقساط...  
مبسوطة يا ستي؟؟





ريم: بجد ؟؟؟؟؟؟؟؟؟؟؟ مرسى بجد يا مستر مازن... أنا مش عارفة أشكر حضرتك إزاااي.

بالليل على سريرها سرحت... مش حاسة إنها فرحانة بالأجازة وفرح بنت خالتها على قد ما هي فرحانة بمكالمته... معقولة مكنتش عاوزه أجازة وكانت هتبقى مبسوطة أكثر لو راحت الشغل.. لا مش لو راحت الشغل... كانت هتبقى مبسوطة أكثر وهي جنبه... مازن بيعاملها معاملة خصوصي... يبقى معاها رقيق ولطيف... بس الغريب إنه أدام الناس بيعاملها برسومية زيها زي أي حد موجود في الشركة... مشاعر كتير مخلياها مش فاهمة حاجة... بس جواها حاجة حلوة... حاجة أول مرة تحسها.. لكن وفاء السكرتيرة كانت بتعاملها معاملة جافة جداً... معاملة غريبة ريم ملقتلهاش سبب وفي يوم لاحظ مازن عميل موجود على مكتب ريم.. كان برده موجود من كام يوم على مكتبها... ولما لاحظ إن الوقت طول بعث لريم إبراهيم الأوفيس بوي.

إبراهيم: مس ريم... مستر مازن عاوز حضرتك في مكتبه حالياً.

دخلت ريم مكتب مازن وعلى وشها ابتسامة ضاعت من صوت مازن اللي أول مرة تسمع نبرته.

مازن: هو مين اللي على مكتبك ده؟؟؟ أنا اتخايلت بيه من  
كام يوم.

ريم: أيوة فعلاً... ده عميل عايش في الإمارات وحابب يشتري  
شقة من وحداتنا اللي في إسكندرية... وجه انهاردة يستفسر أكثر  
وبدأت أتفق معاه على الدفعة الأولى والأقساط.

مازن: طب من فضلك سيبيلي أنا العميل ده... هو اسمه  
إيه؟؟؟

اتفاجئت ريم من طلبه وردت: أستاذ وليد طلع مازن من  
المكتب وراح على مكتب ريم وبص لوليد وقاله مازن: آنسه ريم  
بتقول إن حضرتك حابب تاخد شقة في وحداتنا في إسكندرية.  
وليد: مطبوط يا فندم.

مازن: بس للأسف وحداتنا كلها اتحجرت ومفيش أي  
إمكانية دلوقتي... ممكن على أول الشهر إن شاء الله يبقى في  
وحدات جديدة.

وليد: بس آنسة ريم قالت لي.....

مازن قاطعه: آنسة ريم جديدة معندهاش خلفية باللي  
اتحجز... شرفت يا فندم.

حس وليم إنه شخص مش مرغوب فيه واستأذن بس قبل ما  
يمشي.. عينه جات على ريم اللي واقفة مصدومة من كلام مازن  
اللي مش صحيح ومن عميل ضيعه مازن من إيدها وفي نفس  
اليوم وفي البريك دخل مازن على الموظفين بقرار جديد .

مازن: يا جماعة من فضلكم... من هنا ورايح البنات هتتعد  
مع العائلات فقط... يعني واحد ومراته مثلاً... أما لو شباب أو  
رجال بس ده هيبقى اختصاص محمد وأشرف... ما أنا مش  
حبيب بصراحة شغل الهاهاها والدلع والمياصة ده .

خرج مازن متعصب بس الكلمة وجعت ريم أوووي.. هي  
عارفة إنه بيرمي عليها... بس مياصة؟؟ دي كانت في قمة  
الاحترام والرسمية مع العميل... ودخلت وفاء بعده بورقة فيها  
القرار الجديد وعلقتها في أوضة البريك ووجهت كلامها لريم .

وفاء: العميل اللي مستر مازن مشاه كان قاعد معاكي صح؟؟

ريم: أيوة... اشمعني؟؟

وفاء بابتسامة سخرية معجبتش ريم: أنا قولت كده برده ولفت  
وخرجت من الأوضة وهي بتقول: دي حاجة تقرف ولأول مرة ريم  
تروح مخنوقة من الشغل... لدرجة إنها عيطت في أوضتها بس  
استغربت لما لقت موبايلها بيدي صوت مسج اسم الراسل فيها

مستر مازن زي ما هي مسجلاه... مسج كانت كلماتها بسيطة  
بس ليها معاني كثير بيقول فيها: متزعلش... أنتِ التلميذ اللي  
اتفوق على أستاذة.

ويوم السبت... دخلت ريم الشركة... كان مازن واقف في  
الريسبيشن بيقراً ورق... التفت لقاها.. ابتسامته ملت وشه...  
بس راحت بسرعة لما لقي الدموع مغرقة وش ريم جري عليها  
وسألها: مالك يا ريم في إيه؟؟؟؟ في حد ضايك؟؟؟؟؟؟؟؟

●●●

# أحاسيس في صندوق (الحلقة الثالثة)

يوم السبت... دخلت ريم الشركة... كان مازن واقف في  
الريسيبشن يقرأ ورق... التفت لها.. ابتسامته ملت وشه...  
بس راحت بسرعة لما لقي الدموع مغرقة وش ريم جري عليها  
وسألها: مالك يا ريم في إيه؟؟؟؟ في حد ضايقتك؟؟؟؟؟؟؟؟

ريم من كتر العياط مكانتش عارفة ترد عليه.. بس هو فهم  
السبب لما لقاه ماسكة إيدها وصابعها أحمر جداً وضافرها لونه  
أزرق... ففهم إن في حاجة قفلت على إيديها محسش بنفسه إلا وهو  
واخدها من دراعها على الأوفيس (مطبخ الشركة) وفتح التلاجة  
زي المجنون وأخذ أزايز الميه السقعة... كان يبصب على صابعها  
الميه بايد.. والإيد الثانية سانده إيدها هي مكانتش حاسة بألم  
وقتها... هي كانت في دنيا تانية خاااالص... أول مرة تبقى قريبة  
منه أوي كده... لدرجة إنها شايفة تفاصيل شعره الأسود الناعم...  
شايفة تحديد شعر دقنه... شايفة كاروهات قميصه... أما برفانه  
فهي واخده عليه... برفان لما بتشمه وتعرف إنه جاي من بعيد  
بيبقى عندها أحلى من ريحة موج البحر اللي بتعشقه... حاجة كده  
بتخليها ممكن تنسى تتنفس... وفاقت على صوته بعد ما طلع من

جيبه فلوس. مازن: انزل بسرعة يا إبراهيم الصيدلية اللي جمب الشركة... هات كريم للكدمات ويكون فيه مسكن... يالا بسرعة مستتي إيه اخلص... وبص لها وقالها: هو إيه اللي حصل؟؟

ريم: بقفل الأسانسير من غير ما آخذ بالي قفل على إيدي.

مازن: مادام مبتعرفوش تركبوا أسانسيرات... ماله السلم.

ضحكت ريم ضحكة كسوف.

مازن: أيوة كده يا شيخة... اضحكي مش داخلة تعيطي.

فجأة دخلت عليهم وفاء وبصوت تهكمي قالت وفاء: هو في

إيه يا مستر مازن.... خير!!!

مازن: لا مافيش دي ريم الباب قفل عليها.

وفاء: طب متقلقش أوووي كده.... ده دلع بنات يعني.

اتخرج مازن وخرج من الأوفيس... أما ريم فتأكدت إن وفاء

بتحب مازن والمعاملة الوحشة منها دي سببها غيرتها عليه بعدها

مازن وريم قربوا لبعض أوووي... وبرده من غير أاي تصريحات...

كان تقريباً بيكلهما يوماً بعد الشغل لأسباب غريبة... مرة يؤكد

عليها ميعاد الاجتماع اللي هي عارفاه أصلاً... مرة يسأل على

ورقة خاصة بقسم ثاني ومش عندها من أساسه... مرة يطمئن

إنها روح البيت بالسلامة أصله مكانش مرتاح لشكل سواق التاكسي!!! هي كانت عارفة إنها كلها تلاكيك... بس هي كانت بتستى التلاكيك دي smile emotion وحتى في الشغل.. فترة البريك بقى يقضيها مازن معاهم مش في مكتبه زي زمان... كان بيعمل حركات صغيرة بس كانت بتخلي ريم تحس كأنها مالكة الدنيا... زي إنه يقسم معاها شوكولاتية... يشرب من نفس المج بتاعها على أساس إنه اتلخبط في مجه... يجيب حاجة عارف إنها بتحب تاكلها وفي يوم دخل وليد العميل الشركة.. بس المرة دي مرحتش على مكتب ريم... هو نده الأوفيس بوي.

وليد: لو سمحت أنا عاوز أقابل صاحب المكان.

إبراهيم: حضرتك في أي مشكلة!!! ممكن خدمة العملاء يساعدوك.

وليد: لا معلش... أنا عاوزه شخصياً.

ريم كانت سامعة الحوار وكانت متأكدة إن وليد داخل يشتكي مازن على الموقف الأخير... بس المشكلة إنه كده هيحط مازن في موقف وحش أدام أمجد لأن الوحدات متوفرة ومش محجوزة ولا حاجة، دخل وليد مكتب أمجد وقعد حوالي ربع ساعة وخرج ومشى من الشركة... وهنا جه إبراهيم لريم.

إبراهيم: مس ريم... مستر أمجد عاوز حضرتك.

مازن كان مراقب الموقف كله من مكتبه... وقرر يدخل مع ريم  
علشان عارف إن زيارة وليد بسببه هو.. خبط مازن على مكتب  
أمجد ودخل.

مازن: ممكن أدخل ولا!!!!!!

أمجد: تعالى يا مازن أهو تحضرنا... وبص لريم وكمل  
كلامه معاها اللي مسمعهوش مازن من الأول وقالها: أنا معرفش  
هو صح ولا غلط إنه يطلب إيدك مني أنا... بس هو خاف إنك  
متكونيش متقبلاه أو مرتبطة بحد ويحرج نفسه... فهو بيقول  
إنه على استعداد إنه يبجي البيت فوراً... وطلب مني أقولك  
متأخريش في الرد لأن أجازته هتخلص كمان أسبوعين ولازم  
يرجع أبو ظبي لشغله.

ريم كانت واقفة وشها لونه أحمر زي الطماطم... كانت  
مكسوفة جداً!!! وباصة في الأرض... فرد مازن وقال:

مازن: هو جاي يشتري شقة ولا يجوز... الواد ده أول ما  
شوفته مبلعتوش. أمجد: مش مهم أنت تبعله... وبعدين متعكش..  
ده ممكن يبقى في يوم خطيب واحدة من الاستف بتاعنا يعني  
هيبقى زي أخونا.

وكان رد مازن هو السكوت وطلع سيجارة وولعها .

أمجد: مردتيش عليا يا ريم... أقول إيه للراجل .

ريم: مش عارفة يا مستر أمجد أقولك إيه... ربنا يسهل .

أمجد: طيب خلاص فكري براحتك ولما توصلي لقرار بلغيني... ربنا يكتب لك الخير .

وخرجت ريم من المكتب ومن كتر لخبطتها اتكعبت في السجادة... بس كان كللل هدفها تشوف إيه رد الفعل اللي على وش مازن وبعد حوالي ساعة جه مازن عند مكتبها .

مازن: عندك العقد بتاع الأستاذ محمود اللي أخذ الشقة الدوبلكس!!

ريم: أيوة موجود .

مازن: طب هاتيه مكتبي علشان المحامي جاي ياخذ العقود اللي هتتوثق في الشهر العقاري .

خدت ريم العقد ودخلت مكتب مازن اللي أول ما شافها سأل:

مازن: هه... هتعملي إيه في حوار العريس ده!!!!!!

ريم حطت العقد على المكتب وقالت له:



قاطعتهم خبطة على الباب ودخلت أسماء مديرة الحسابات وهي شائلة ولد جميل صغير عنده حوالي سنة أو اثنين بص لها مازن وقالها:

مازن: أنتِ إيه اللي جابك يا بنتي... أنتِ مش واخدة أجازة مصيف أسبوع!!! وبص لريم وقالها: طبعاً تعريف مسز أسماء... كنا أصحاب أنا وهي وأمجد واحنا اللي بدأنا الشركة من الأول لحد ما وصلنا للي احنا فيه ده... أسماء أخت وصديقة عمر هي وجوزها.

بصت ريم وقالت له:

ريم: مسز أسماء غنية عن التعريف... كفاية إنها بتقبضنا أول الشهر ههههههه.

مازن: ومين العسل اللي أنتِ شايله ده؟

أسماء: ده يوسف ابن أختي... نسيت شاحن الموبايل هنا امبارح قولت أعدي قبل ما أسافر أخده شبط فيا يوسف. فتح مازن إيدته ليوسف عاوز يشيله... وضحكوا لما يوسف رمى نفسه ناحية مازن وهو بيقول بحروف مقطعة باااا.. بااااا.

ضحكت أسماء وقالت: بابا إيه يا ابني... متجيش للراجل  
مصيبة هههههه... الراجل لسه عريس جديد... مكملش ٦ شهور.

ريم باستغراب وذهول: عريس!!!

وكملت أسماء: قولي أخبار غدير إيبيه!!! عاملة إيه في

الحمل!!!

...

# أحاسيس في صندوق (الحلقة الرابعة)

ريم كانت واقفة في حالة صدمة تامة... متجوز!!! وكم ان  
مراته حامل... طب كان ليه بيعمل معاها كده... ليه كان بيلمح لها  
إنه مهتم... أسئلة كتير وقفت بدخول إبراهيم مكتب مازن وقاله:  
مستر مازن... مستر أمجد بيقول لحضرتك عاوز كل العقود اللي  
هتوثق في الشهر العقاري لأن المحامي عنده في المكتب.

مازن ملقاش فرصة أحسن من دي إنه يهرب من عين ريم...  
أخذ العقود وخرج من المكتب... وحصلته أسماء بعد ما جالها  
رنة على تليفونها من الناس اللي مستياها بره بيستعجلوها، ريم  
روح لا أكلت ولا شربت ولا حتى كانت طايقة تكلم حد....

دخلت عليها تهاني تظمن عليها وقالت لها: مالك يا مرمز...  
لا كلتي ولا طلعتي تقعدى معانا أدام التليفزيون زي عادتك ولا حتى  
بتردي على أختك... في إيه يا حبيبتي!!!

ريم: مفيش يا ماما... أنا بس ضغط الشغل تاغبني... أنا  
بفكر أسيب الشغل.

تهاني: ليه يا بنتي أنت مرتبك زاد وقولتي إنك مرتاحة..  
ومتتسيش إن بابا ماضي كمبيالات أقساط الكمبيوتر ده غير الـ  
٥٠٠ جنيه اللي بتدهوملي بيسندوا البيت.

ريم: بس يا ماما ...

تهاني: أنا عمري يا بنتي ما هخليكي تعملي حاجة غصب  
عنك... لو تعبانة خلاص بلاش... وأنا هتصرف... فكري براحتك  
وقرري... ربنا يريح قلبك يا بنتي.

قلبيها!!! قلبها مجروح.. لا ده مكسور.. بس قعدت تفكر وقالت  
إن أهلها وظروفهم ملهمش ذنب في إنها اتخدعت فيه وصدقته...  
وإن مش ده اللي هيووقف نجاحها وحياتها... وكأنها بتقنع نفسها  
بأاااي سبب... غير إنها لسه عاوزه تفضل جمبه... لسه مش  
قادرة تبعد عنه.

تاني يوم ريم راحت الشغل... بس عينها ما جتش على مكتب  
مازن خاالص زي ما كان بيحصل.... في الوقت اللي مازن مكانشي  
متابعها من مكتبه... لا... ده تقريباً منزلش عينه من عليها... على  
أمل إن عينيهم تتلاقى صدفة ولما فقد الأمل بعث لها:

إبراهيم: مس ريم... مستر مازن بيقول لحضرتك إنه محتاج  
تودي له توارخ أقساط العميل مصطفى والفایل بتاعه.

ردت ريم: استتى يا إبراهيم ودورت على الملف وادته لإبراهيم  
وطلبت منه يوصله لمستر مازن لأنها مشغولة حتى في البريك  
هربت منه... طلعت برة الشركة خالص ورجعت في الميعاد بتاعها  
تاني حاول يكلمها أكثر من مرة على تليفونها... بس كانت آخر  
المحاولات إنها قفلت موبايلها خالص لأنها حتى مش طايقة  
تشوف اسمه في مكالمة واردة تاني يوم خلاها ماشية في كوريدور  
الشركة وقف أدامها وقال: أنتِ مبتروديش على تليفوناتي ليه؟  
ريم:.....

مازن: أنا عارف إنني جارحك... بس أقسم لك بالله عمري ما  
كنت قاصد. ريم: جرح إيه يا مستر... أنا هنا في شغل وحضرتك  
مديري ودي كل علاقتنا... ربنا ما يجيب جرح.

مازن: ريم... بلاش كده... أنتِ فاهمة وأنا متأكد.

ريم: فاهمة!!! فاهمة إيه!!! أنا طلعت مش فاهمة أااي  
حاجة... وللأسف مقدرش ألومك على أااي حاجة برده... أنت  
لا قولتلي حاجة صريحة... ولا صرحت ليا بأي حاجة... هاجي  
دلوقتي أقف أدامك ألومك على إيه!!!

مازن: متظلمنيش... أنا أول ما شوفتك حسيت....

قاطعته ريم: ميهمنيش حسيت بابه... أنا دلوقتي عاوزة  
أسألك سؤال واحد بس... أنت عاوز مني إيه!!!!!!

مازن: عاوز أسألك سؤال... هو أنا لو من ٦ شهور... وفي  
ظروف غير اللي أنا فيها... ووقفت أدامك زي ما أنا واقف  
دلوقتي... وطلبت منك... لا مش طلبت منك... اتوسلت ليكي  
إنك تتجوزيني... كنتي هتوافقى بيا!!!!!!

رنت الكلمة في ودن ريم... الكلمة اللي كانت بتتمنى تسمعها  
من يومين وساعتها كانت هتكون أسعد واحدة في الكون... دلوقتي  
بتسمعها وهي أتعس واحدة في الدنيا وردت عليه: احنا بقينا  
دلوقتي... مش من ٦ شهور... وظروفك أنت فيها دلوقتي... أنت  
فاهم يعني إيه دلوقتي.

مازن: ريم أنا لو كنت شوفتك بس من ٦ شهور كانت حياتي  
اتغيرت.

ريم: من فضلك... أنا عندي شغل.

دخلت ريم الحمام ودخلت في نوبة عياط رهيبة... كان صعبان  
عليها نفسها أوي... مش عارفة تكرهه إنه لعب بيها، ولا تصدقه  
وتتعاطف معاه إنها قابلته في الوقت الغلط... بس مسحت دموعها  
بسرعة لما لقت وفاء داخلة الحمام وعملت نفسها بتظبط طرحتها،

دخلت وفاء طلعت روج هادي من شنطتها حطته... وبصت لصورة ريم في المرآة وقالت لها: أنتِ مكنتيش تعري في إنه متجوز صح!!!

ارتبكت ريم وقالت لها: هو مين ده!!!

وفاء: أنا سمعتكم وأنتوا بتكلموا من شوية.... على فكرة أنا مش بكرهك... أنا كنت مدايقة منك لأنني فكرت إنك متقبلة اهتمامه بيكي وأنتِ عارفة إنه متجوز... بس دلوقتي لا.

مقدرتش ريم ترد عليها وسابت دموعها مقدرتش تحبسها أكثر من كده وكملت وفاء: غدير كانت صحبتي لما اشتغلت هنا... وأنا مقدرتش أشوف مازن مهتم بيكي كده ومضايقش.

ريم: هي كانت بتشتغل هنا!!!

وفاء: بقولك إيه... تعالي بعد الشغل نروح نقعد في حنة نتكلم شوية.

وبعد الشغل كانوا في كافييه أدامهم نسكافييه وبدأت وفاء تتكلم: أنا و أمجد ونهى مراته وأسماء ومحمود جوزها ومازن أصحاب من زمان... وبدأنا في شركة صغيرة مع بعض لحد ما أمجد قرر يفتح شركة ليه وكلنا وقفنا جنبه ومعاه، وإزاي اتجوز فدى حدوته... مازن مرة كان في مكان هو وأمجد وغدير وبنت

خاليتها كانوا في نفس المكان... المهم يا ستي جت شلة شباب  
يرخموا على غدير وبنت خاليتها بس زودوا الرخامة حبتين تلاتة..  
ومحدث اتحرك إلا أمجد ومازن.. كلموهم بالذوق وميصحش  
وكده بس الولاد دول كانوا مش كويسين وبدأوا يضربوا أمجد  
ومازن.. بس واحد فيهم كان لابس خاتم ضرب مازن في عينه  
الدم غرررق وشه الولاد لما شافوا دم جريوا.. لكن غدير فضلت  
جمب مازن في المستشفى.. وباباها لأنه غني أوي ما شاء الله  
أصر إنه يتكفل بمصاريف العملية وإقامته في المستشفى.

كانت ريم مهتمة بكل كلمة من وفاء اللي كملت: وبعدها بدأت  
غدير تقرب ليه وكان ببيجي يحكلنا أنا وأمجد ونهى وأسماء إنه  
مش حاسس ناحيتها بأاي مشاعر وخصوصاً إن باباها بدأ يكلمه  
صراحة في جواز من باب أخطب لبنتك وأنه شايف فيه راجل  
بجد وإنه محتاج حد معاه يمस्क المصنع وخاصة إن غدير بنت  
وحيدة معندهاش إخوات صبيان.

ريم: هه كملي.

وفاء: مازن مكانش مقتنع... وللأمانة احنا اللي أقنعناه  
وخاصة إن باباها هيتكفل بمصاريف الجواز وبكده مازن مش  
مضطر يكون نفسه من الأول وجات غدير اشتغلت معنا فترة

صغيرة من باب التقرب ليه لحد ما اتجوز وبس كلنا ندمنا إننا  
أقنعنا مازن لما شوفنا معاملة غدير ليه بعد الجواز... مش عاوزة  
أحكي لك كااام مرة اتخانقت معاه لما كنا كلنا بنخرج كلنا مع  
بعض.. وكام مرة سابته وقامت روحت وكام مرة شخطت فيه  
أدامنا... بس على ما اكتشف ده.. كمان اكتشف إنها حامل.

بصت ريم في الأرض ودموعها على خدها وكأنها لقت سبب  
ولو بسيط إنها تعذره.

وكملت وفاء: أنا مش بقول كده من باب إن اللي عمله معاكي  
صح... أو إنه كده بيغلط في حقها... بس أنا لومت نفسي إنني حكمت  
عليكي إنك واحدة بتخطفي راجل من مراته من غير ما أتأكد.

ردت ريم: أنا.....

قطع كلام ريم رنة تليفون وفاء اللي كان بيكلمها أمجد.

وفاء: ألو... أيوة يا أمجد.... إيه..... مازن!!!

أول ريم ما سمعت اسمه اتعدلت في قعدتها واهتمت أكثر.

وكملت وفاء: لا حول ولا قوة إلا بالله.... البقاء لله... أنا  
جايه حاااالأ.



obseikan.com

# أحاسيس في صندوق (الحلقة الخامسة)

في الشركة ثاني يوم دخل أمجد في فترة البريك وقال: يا جماعة للأسف حما مستر مازن توفاه الله امبارح... طبعاً أنا ومسر أسماء ومسر وفاء رحنا عزيزنا... لكن حابب إننا نكلمه كلنا على موبايله نعزيه من باب الواجب.

ريم مكانش الخبر عليها جديد لأنها عرفت لما كانت قاعدة مع وفاء امبارح... مكانتش عارفة تكلمه هي كمان ولا لا... نفسها تسمع صوته... صوته واحشها أووي... بس هتكلمه علشان أبو مراته!!! موقف بجد صعب أمجد بدأ المكالمة والتليفون بقى يتقل من إيد لإيد بعبارات التعازي لحد ما وصل لإيد ريم.

ريم: ألو.. مستر مازن إزي حضرتك؟

رد مازن: وحشتيني يا ريم.

ارتبكت ريم وردت: البقاء لله.

مازن: ريم أنا هكلمك انهاردة بالليل... أرجوكي ردي عليا

ضروري.

ريم: ربنا يجعلها آخر الأحزان إن شاء الله..... وادت التليفون

لعللا .

مازن كان في موقف لا يحسد عليه... هو فعلاً حب ريم من أول يوم... لكن كمان هو مش ناسي إنه زوج وقريب أوي هيبقى كمان أب... أدامه أكثر من حل كلهم مش نافعين... أولهم إنه يطلق مراته... طب بغض النظر عن المؤخر الكبير اللي أبوها كتبه عليه لأنه مساهمش في مصاريف الجواز... هل هيقدر يتخلى عن ابنه أو بنته اللي جاي... طب يطلع ندل ويبيعها بعد ما بقى السند الوحيد ليها ولأمها اللي طلبت منه إنه يمسك المصنع بعد موت جوزها.... هو رفض ده أول الجواز علشان ميحسش إنه بيشتغل عند أهل مراته... بس مع موت أبوها الوضع اختلف تماماً... طب هل في أمل إنها تتغير... ولو حتى اتغيرت هل ده سبب كافي إنه يشيل حب ريم من قلبه!!! طب يتجوز ريم!!! وهل مراته هتوافق على كده.... بلاش... هل أهل ريم وريم نفسها هتقبل ويتقبلوا إن بنتهم تبقى زوجة تانية!!!! أسئلة كتير جواه من غير إجابات... بس كل اللي حاسس بيه ومتأكد منه إنه هيتجنن من بعده عنها بقاله كام يوم... ده غير كمان إنها زعانة منه ومكسورة في أوضاعها وعلى سريرها كانت ريم قاعدة تبص لموبايلها... فتحته وقفلته زيادة عن ٢٠ مرة... تفكر إنه هيكلمها تقفله... لكن لما

تحس أد إليه هو واحشها ترجع تفتحه تاني رن نغمة الموبايل اللي  
مخصصاها له... قلبها دق أووووي... إيديها بقت زي الثلجة...  
كانت بتترعش متعرفش ليه... لكن جمعت شجاعتها وردت: ألو.

مازن: ريم إزيك.

ريم: الحمد لله... البقاء لله.

مازن: ريم أنا عندي كلام كتييير نفسي أقولها لك... أنا  
محتاجك جمبي يا ريم بجد... والله ما قصدت إنني أخبي عليك  
حاجة... بس أنا كنت زي اللي عايش في حلم مش عاوز يفوق  
منه... أنت متعرفيش ظروف في... أنا اتجوزت ٦ شهور منهم شهرين  
ونص عند أهلها غضبانه... أول يوم شوفتك في التدريب كنت  
قبلها بيوم بكلمها أحاول أصالحها مع إنها هي اللي غلطانة...  
بس كنت عاوز بيتي يمشي... يومها قولتيلي في حاجة في حياتك  
مسبالك تعاسة.. يومها بعد ما روحت قلعت خاتم جوازنا...  
حسيت إنه فعلاً خانقني... ريم... أنا... ريم أنا بحبك.

نزلت دموع ريم زي البحر... مكانتش قادرة تمسك نفسها.

مازن: أنا مش عارف إزاي مش هقدر أشوفك الفترة الجاية...

ريم أنا هسيب الشركة.

ريم: تسيب الشركة!!!! طب ليه!!!!

مازن: همسك المصنع بتاع حمايا الله يرحمه... مؤقتًا....  
لحد ما عمها أو حد من ولاده يتولى الأمر وكمل كلامه: ريم.....  
أنتِ بتحبيني!!!!

ريم سكتت ومردتش.... بس من جواها كانت بتصرخ... كلمة  
بحبك شوية على اللي جوايا ليك... أنا جوايا إحساس ليك  
مفيش أي كلمة من كلام الحب ولا الأغاني توصفه.

كمل مازن كلامه: ريم ردي عليا.... طب بلاش... أهلك يقبلوا  
إنك تبقي زوجة تانية!!!

ريم: إيه!!!! زوجة تانية!!!

مازن: أنا مش عاوز رد دلوقتي... فكري وردي عليا.

ريم: أنت سألتني أهلك يوافقوا ولا لأ.. بس مسألتنيش أنا  
هوافق ولا لأ؟ وأنتِ مش هتوافقي يا ريم!!!

ريم: أنا مش هوافق إن يكون ليا نصك بس... أنا مستحملش  
كده.

مازن: بصي يا ريم... أنا بفكر إنني أخذك وأسافر برة... بس  
أنا مش هقدر أطلقها... أنا لو غلطت في قرار جوازي... فمش

هغلط إنني أبعد ابني أو بنتي عني... خلينا نساظر وهما مش هيعرفوا حاجة.

ريم: هما مين... مراتك وأهلها!!! طب مش ابنك ولا بنتك دول هيكون ليهم إخوان مني!!! ساعته الإخوات مش هيعرفوا بعض!!! ولا هتطلب مني كمان إنني مجبش ولاد منك... هتحرمني كمان من أمنية اتمنتها لما قربت منك... إنني أجيب منك ولد شبهك... ياخذ منك كل حاجة... شكلك... طبعك... مشيتك... صوتك... واهتمامك بيا... إلا حاجة واحدة بس... ظلم قلبك ليا.... من فضلك يا مازن... أنا مش عاوزة أكلمك تاني... ولا عاوزة أعرفك تاني وقفلت ريم التليفون الفترة دي في الشغل مستوى ريم قل جداً... ونسبة مبيعاتها تراجعت اللي خلى أمجد ينبهها أكثر من مرة إن مش ده المستوى اللي مستتبه منها ولا اللي عودته عليه كانت الشركة بالنسبة لها مكان باااهت من غير لون... كانت مقبوضة مش زي الأول... مكتب مازن وهو مضلم شكله وحش أوووي... كانت بتدخل الأسانسير متمشمش برفانه... ولا كانت بتسمع ضحكه وقفشاته في البريك.

وفي يوم داخله البيت لقت شوز حد غريب جمب الباب وسألت مامتها: احنا عندنا حد غريب ولا إيه؟

ردت تهاني: أنتِ ليه يا ريم محكتليش عن الولد اللي جه  
اتقدم لك في الشغل؟؟

ريم: وليد!!!!

تهاني: أه وليد... جوه مع أبوكي... وعلى فكرة أبوكي زعلان  
جداً .

وبعد ما مشي وليد نده حسين على ريم وقال لها: أظن شكلي  
وحش أووي أدام الراجل لما بييجي يكلمني في موضوع المفروض إني  
عارفه وأنا معرفش عنه أأاي حاجة .

ريم: أنا مقصدش والله يا بابا... بس أنا انشغلت الفترة اللي  
فاتت والموضوع أساساً مش في دماغي .

حسين: يعني إيه يا بنتي مش في دماغك... هو أنا طرطور  
ماليش رأي.. أنتِ فسختي خطوبتك بمزاجك... وجالك كذا  
عريس ورفضتي بمزاجك... لكن كده كتير... وأنا بسايسك  
وبحايلك... تقدري تقولي لي عيبه إيه الراجل... أنا شايفه حد  
محترم الصراحة وكفاية إنه دخل البيت من بابه. ريم: يا بابا أنتِ  
عارف إنه عايش برة... وأنا رافضة فكرة الجواز والسفر وإني  
أبقى في بلد لوحدي بعيد عنكم .

حسين: ما ده حال معظم الناس.

ريم: اللي يناسب الناس ممكن ميناسبينيش.

حسين قام من مكانه وعلى صوته: أنا اللي الكلام ده مينفعينيش... عقلي بنتك يا تهاني.

دخلت ريم أوضتها تعيط... عمرها ما زعلت باباها أو مامتها منها... بس هي مش قادرة بجد... وكل المشاكل جاية في نفس الوقت وفجأة رن موبايلها... رقم غريب مش متسجل عندها... ردت: ألو.

الصوت: ألو السلام عليكم.

ريم: وعليكم السلام.

الصوت: آنسة ريم معايا!!!

ريم: أيوة يا فندم مين حضرتك؟

الصوت: أنا غدير... مرات مازن... كنت عاوزاكي في موضوع لو سمحتي.



obseikan.com

## أحاسيس في صندوق (الحلقة السادسة)

ريم بعد ما عرفت إن غدير هي اللي على الخط الثاني كأنها  
اتجمدت.... منطقتش بكلمة حتى.. وجه صوت غدير ثاني: ألو...  
أنتِ معايا!!!

ريم: أيوة يا فندم مع حضرتك.

غدير: بصراحة يا ستي مازن كلمني عنك أنتِ وعلا كثير  
وعلى التزامكم في الشغل ونسبة المبيعات اللي زادت على إيديكم...  
وبعد وفاة بابا الله يرحمه مازن هيمسك المصنع وكنا محتاجين  
معانا استاف جديد على الموجود علشان نزود المبيعات وكملت  
غدير: ومازن رشحك ليا أنتِ وعلا.... أنا كلمت علا من شوية  
وكانت مترددة.. بس بعد ما اتفقنا على المرتب الشهري وعدتني  
إنها تفكر وبنسبة كبيرة هي معانا من أول الشهر إن شاء الله...  
إيه رأيك!!!

ريم: أولاً البقاء لله وربنا يجعلها آخر الأحزان... أما عن  
موضوع الشغل فأنا بجد أسفة مش هقدر... أنا مرتاحة مع  
مستر أمجد جداًااا وربنا يوفقكم للأحسن.

غدير: ما أنتِ لو وافقتي طبعاً مازن هيستأذن أمجد ليكي  
ولعلا ومش هيبقى فيها أي إحراج... وطبعاً هنتفق على المرتب  
من الأول.

ريم: حضرتك الموضوع مش موضوع إحراج ولا مرتب... أنا  
مرتاحة في مكاني وكمان احتمال أسيب مستر أمجد قريب ومصر  
كلها لأن في احتمالية ارتباط وسفر برة مصر.

غدير: بجد!!! طب ربنا معاكي.

ريم: مرسى ليكي... مع السلامة.

ريم كانت هتتجنن... إزاي يفكر في كده... إزاي يفكر إنه  
يجمعها مع مراته في مكان واحد... للدرجة دي هو أناني... هي  
اضطرت تقول موضوع الارتباط ده لمجرد إنه يبعد عنها... مع  
إنها متأكدة إنها هترفض موضوع وليد حتى ولو مكانش مازن  
دخل حياتها لأنها رافضة فكرة إنها تتجوز بعيد عن أهلها نهائياً.

تاني يوم نازلة ريم من الشغل لقت عربية بتلكس لها... في  
الأول مهتمتش بس بعدها اكتشفت إنه مازن... كان بيشاور لها  
إنها تيجي عند العربية.. بس هي مشيت كام خطوة اللي خلاه  
ينزل من العربية وينده عليها.

ريم: هي وصلت كمان إنك تيجى لحد هنا!!!! وتنده عليا في الشارع!!! مازن: اركبي طيب عاوزك في كلمتين.

ريم: لا طبعاً مش هركب.

مازن: أنت فعلاً هتتجوزي الواد إياه ده وهتسافري!!!!

ريم: أنت متدخلش في حياتي الشخصية... وبعدين أنت إزاي تخلي مراتك تكلمني إنني أشتغل عندها!!!! أنت بتفكر إزاي؟؟

اتهد مازن ورد بانكسار: ومين قالك إنني عارف أفكر أصلاً... أنا مخنوق يا ريم.

عينيّه لمعت أوي وقتها... مكانتش عارفة لمعة عينيّه دي حب ولا بداية دموع ولا كسرة نفس ولا إيه بالطبط.

ريم: أنا لازم أمشي... ده ميعاد خروج موظفين الشركة ومش حابة حد يشوفني معاك.

مازن: ريم أنا مش هسيبك... أنا ما صدقت لقيتك... عارفة يعني إيه ما صدقت لقيتك.

مشيت ريم وسابته واقف مكانه مش عارف يعمل إيه.. لف وهو رايح عند العربية لقي أمجد واقف شايف تقريباً معظم اللي حصل... راح مازن يسلم على أمجد وهو مكسوف وجرجه زاد لما أمجد قاله: وما دام أنت هنا... مطلعتش تسلم ليه!!!!

مازن: ما أنا قابلت ريم نازلة قولت أسلم عليها وأطلع.

أمجد: مازن مش عاوز تقولي حاجة!!!!

مازن: عاوز يا أمجد... أنا حاسس إن فوق كتفي جبل...  
مش قادر أشيله لوحدي... أنا محتاج أفضفض معاك وبعد شوية  
كانوا قاعدين في كافيه كانوا بيتقابلوا عليه هما وأصحابهم أيام  
العزوبية... وحكى مازن كل حاجة لأمجد من أول يوم لحد ما  
كان معاها دلوقتي تحت الشركة... أمجد كان بيسمعه باهتمام  
لأنه حس إن مازن بيتكلم من قلبه... وسأله أمجد: أنت بتحبها  
بجد ولا سكة نزوة والسلام؟؟ ما أنت عارف إننا ساعات يا ابني  
بنشطح شوية ونفوق ونرجع لبيوتنا عادي.

مازن: لا يا أمجد دي مش نزوة... ما احنا ياما اتشاقينا قبل  
الجواز... ريم هي الإنسانية اللي كنت بدور عليها.

أمجد: وأنت بقى من فلاحتك عاوز تجبهم يشتغلوا في نفس  
المكان.... عاوز تحط النار جمب الكبريت!!!!

مازن: أنا مش عارف أفكر يا أمجد ولا عارف أعمل إيه؟؟

أمجد: سيبها في حالها يا مازن... أنت راجل متجاوز...  
وهتبقى أب... إدي لنفسك ولراتك فرصة كمان.

فكر مازن في كلام أمجد وهو سابق في طريقه للبيت....  
وقرر إنه لازم يبعد عن ريم... هي تستحق راجل ظروفه أحسن  
منه مش نص راجل زي ما هي قالت... أو راجل مطلق داخل في  
مشاكل مع مراته بسبب ابنه وبدأ مازن يركز في شغله الجديد...  
وكان حاله زيها بالطبيب... مش ناسي بس بيتناسى... وفي يوم  
كان مازن في المصنع بيراجع تقفيلة الحسابات لكن لقي غلطات  
كثير في الحسابات وديون خارجية تعطل الشغل... بعث جاب  
رئيس الحسابات علشان يستفهم منه وسأله: يا أستاذ عمرو في  
غلطات كثير في الميزانية والصرف والديون... وكل ده هياثر علينا  
في الآخر.

عمرو: يا فندم احنا شغلنا كله كان ماشي بأوامر من أستاذ  
سعيد الله يرحمه.

مازن: أنا فاهم... بس واضح إن أستاذ سعيد في الآخر قبل  
وفاته ظروف تبعه مخلتهوش يقدر يتابع الشغل كويس.

كان مازن بيقول كده و غدير داخله من الباب... وبصورة  
تهكمية سأله: وماله بقى أستاذ سعيد الله يرحمه!!!!!! المصنع ده  
أستاذ سعيد اللي مش عاجبك ده بدأه من الصفر.



ريم: يا بابا أنا عمري ما رفضت لك أمر... بس بجد أنا  
مقدرش أبعد عنكم. حسين: ماشي يابنتي خلاص... طب في  
موضوع ثاني عاوز أكلّمك فيه. ريم: خير يا بابا.

حسين: أستاذ مازن اللي كان معاكي في الشغل كلمني من  
شوية. وقفت ريم مخضوضة وقالت: إيه!!! مازن!!! قصدي مستر  
مازن.... خير!!!

حسين: هو طالب القرب مني فيكي.

اصفر وش ريم وقالت له: قرب... قرب إزاي يعني!!!  
وفكرت... تبقى مصيبة لو مفهمش باباها كمان إنه متجاوز...  
وكملت كلامها: ده متجاوز يا بابا.

حسين: ما أنا عارف يا بنتي... وعارف كمان إن مراته حامل  
بس هو مقصدش اللي فهمتيه... هو يقصد.....



obseikan.com

## أحاسيس في صندوق (الحلقة السابعة)

آخر الأسبوع كان مازن وأخوه ومامتهم في بيت ريم... بعد اعتراض شديد من ريم إنهم يبجوا أصلاً... بس رفض ريم لوليد اللي كان باباها موافق عليه ومرتاح له خلاه يصمم إن مش كل مرة ريم هتعمل اللي عاوزاه وجه الوقت اللي يمشي فيه كلمته عليها زي ما قال.

بدأت سهير والدة مازن وشريف الكلام وقالت: أنا طلعت من الدنيا بمازن وشريف بعد باباهم الله يرحمه ما توفاه الله وهما لسه صغيرين... ربنا قدرني وربتهم أحسن تربية في البيت اللي سابهلنا باباهم الله يرحمه وقدرت أبني شقتين واحدة لمازن وواحدة لشريف علشان يبقوا معايا في نفس البيت، مازن كلمني كتييييير أوووي عن ريم... وعن أدبها وأخلاقها لدرجة إنني اشتقت أشوفها... بس مقاليش أد إيه هي جميلة كمان من برة زي ما وصف لي إنها جميلة أوي من جوه وأنا انهاردة جاية أنا ومازن باعتبار إنه الكبير وبدل باباهم الله يرحمه نخطب ريم لشريف أخوه.

ريم كانت سامعة الكلام وحاسة إنها من صعوبته عليها  
دايخة ومعدتها واجعاها أوي... مش مصدقة بجد... كانت بتبص  
لمازن ومامته بتتكلم وعينيها فيها ١٠٠ سؤال..... أنت إزاي تعمل  
كده!!!! هونت عليك إزاي!!!!!! ولو أنا هونت عليك هان عليك  
أخوك إزاي!!!!

رد حسين: والله سيماهم على وجوههم وده شرف لينا طبعا...  
ريم بنتكم وشريف ابننا.

ردت سهير: الشرف لينا احنا يا حاج حسين... أنا بس  
بستأذنك نسيب العرايس شوية يتعرفوا على بعض.

ساعتها مازن حس بغيرة شدييدة بس إحساسه ده ماكنش  
أااي حاجة أدام الإحساس الرهيب اللي جوه ريم.

خرج مازن ومامته في الصالة وسابوا شريف وريم في الصالون  
مع باب موارد... كان بيحاول من خلاله يشوفها أو يسمع أااي  
كلام بينهم لكنه مقدرش، دخلت تهاني بصينية العصير لمازن  
ووالدته لكنه رفض ياخذ وقالها: أستأذنك يا طنط في فنجان قهوة  
مضبوط، كان بيشر ب سيجارة ورا سيجارة بشكل هستيري ورجله  
كانت بتتحرك لفوق وتحت في حركة توتر... حس إن اللي بيعمله  
ده أكبر غلطة ممكن يرتكبها في حياته... في حقه... وحقها... وحق

أخوه كمان.... لازم شريف يرفض... أو هي ترفض... لازم الغلطة  
والعك ده يتصلح... مافقش من اللي هو فيه إلا على صوت حسين  
وهو بيقول: لسه بدري واللّه يا جماعة ما أنتوا منورنا.

ردت سهير: ده نوركم أنتم واللّه... أنتم ونعم الناس... وإن  
شاء اللّه ربنا يجعل نصيب بينا.

في طريقهم للبيت سألت سهير شريف: هه إيه رأيك يا  
ابني... أنت غلبتني ودخلتني بيوت كتير وقليل ما ارتحت زي ما  
ارتحت عند الناس دي. شريف: واللّه يا ماما باينها أول حاجة  
عدلة ابنك الكبير يعملها لي ههههههه.

سهير: أفهم من كده إنك مرتاح للبيت!!!

شريف: ما خلاص يا سوسو بقى متكسفينيش وأنت عارفاني  
بتكسف ههههههه.

ضحكت سهير من شقاوة شريف المشهور بيها في العيلة  
كلها وقالت له: واللّه اللّه يكون في عونها... دي هتشوف يامااا  
ههههههههه.

وعلي الضحك في العربية لكن مازن تقريباً مكانش مركز  
في ولا كلمة معاهم... كان كل اللي مسيطر عليه إحساس الذنب  
الرهيب اللي جواه... وجه صوت شريف مع خبطة على دراع



ريم: ولو طلع مش مناسب وقتها أعمل إيه.... تدايقوا ثاني  
لما أقول عاوزة أفسخ.

حسين: أنا هاودتك كتير.. أنا هفسخ مع ده... وده لأ وده لأ...  
حتى وليد اللي كنت موافق عليه برده لأ... اسمعي بقى... من هنا  
ورايح كلمتي اللي هتمشي... أنا أبوكي وعارف مصلحتك... أنا  
هقول للناس إننا.. موافقين... وأدامك فترة الخطوبة ابقى اتعريف  
وادرسيه براحتك.

ريم: يا بابا أرجوك أنااااا.....

حسين: خلاص مفيش كلام ثاني... اللي قولتهولك هو اللي  
هيمشي... وده آخر كلام عندي.

كانت أول مرة ريم تشوف غدير وهما بيحببوا الدبل...  
شكها حلو... شيك في لبسها... عليها علامات الحمل واضحة  
من بطنها اللي ابتدت تكبر... كان شريف رقيق أوووي معاها...  
وطلب منها تتقي كل اللي نفسها فيه بس هي اکتفت بدبلة رقيقة  
ومحبس وهو نقى لها سلسلة فيها حرف S... لتاني مرة بتتقي  
شبكة وهي مش حاسة بأي إحساس فرح.

في بيت ريم كان شريف عندهم على العشا بعد مشوار  
الشبكة... ودخلت سهير بعد العشا بأطباق فيها بسبوسة... أكل

منها شريف بس ريم لأ وسألها: مابتكليس ليه... وبعدين مين اللي عاملها... إوعي تكون مامتك وتقعد تقول أنتِ اللي عملاها وكده.

ردت ريم: فعلاً ماما هي اللي عملاها مش أنا بس أنا مبحهاش .

شريف: أمال بتحبي إيه!!!!

ريم: بحب صوابع زينب وبلح الشام.

شريف: يا لاهوووي.... ده أنا مش أجيب لك صوابع زينب بس... ده أنا أجيب لك زينب ذات نفسها بصوابعها بمونيكرها... بس ننول الرضا هههههههههههه.

قابلت ريم كلام شريف بابتسامه باهتة... أد إيه عاوز يسعدها حتى ولو هيرسم على شفايفها بسمة بكلامه وهزاره، كان مازن لما بيبقى واقف في البلكونة بتاعة شقته ويشوف شريف واقف في شقة مامته بيتجنن.... كان بيبقى عارف إنه بيكلها.... يا ترى بيقولها إيه... بتقوله إيه... حاسة معاه بإيه!!!! كان حلم وعدى بسرعة فترة الخطوبة... كتب الكتاب والفرح... صورة عروسة حزينة مشوشة وموسيقى مش مفهومة، استنى مازن شريف لما نزل وخطب عليها.... افتكرت إن شريف نسي حاجة وجريت تفتح له... لكن مكانش جوزها دخل بسرعة وقفل الباب وراه قبل ما

حد يشوفه... اتخضت ورجعت لورا لحد ما ضهرها خبط في  
الحيطة... مسك مازن دراعها وقال لها: أنا مش طايق أشوفك  
في بيته... أنا مش عارف أنا عملت كده إزاي... أنت مش بتحببه  
صح.... قولي إنك مش بتحببه!!!!

ريم: أنت أكيد مجنون... اطلع برة.

مازن: مش طالع برة.... وهتسمعي كلامي للأخر.... دخلتي  
في حياتي ليه.... دخلتي في حياتي ليه!!!!!!

اترعبت ريم وردت: أنت مش في وعيك... اخرج بدل ما  
أصوت ومامتك ومراتك يسمعوا.

رد مازن وهو ماسك دراعاتها الاتنين: ياريت تعملها... وأهي  
تبقى الفضيحة اللي أنا مستتيها وتحل كل المشاكل.

وفجأة... سمعوا صوت مفتاح بيتحط في الكالون... وفتح  
شريف الباب.



obseikan.com

# أحاسيس في صندوق (الحلقة الثامنة)

صحي مازن من كابوسه وهو في حالة فزع.... كانت مخدته  
مبلولة من كثر العرق اللي على جبينه... مكانش حتى قادر ياخذ  
نفسه من كثر ما كان الحلم فزعه طب ده كان مجرد حلم... آمال  
هيحصل إيه لو بقى حقيقة... لكن نص الحلم اتحقق فعلاً لما  
أخوه خطبها.... ولو استتى أكثر من كده هيتحقق الكابوس كله،  
قام لبس هدومه بسرعة وراح على شقة مامته... لقي شريف  
بيفطر قبل ما ينزل شغله في الجامعة... مامته شافته وسألت:  
مالك يا زيزو... أنت تعبان ولا إيه!!! مال وشك أصفر كده??

مازن: مفيش يا ماما أنا بس ما نمتش كويس.

سهير: طب أقعد أفطر مع أخوك وهصب لك الشاي أهه.

شد مازن كرسي أدام شريف وسأله: أنت ناوي على إيه!!!

شريف: ناوي على إيه في إيه!!!

مازن: في الخطوبة.

شريف: يا ابني ما احنا جنبنا الدبل خلاص... يخرب بيت  
الزهايمر... واتفقنا هنلبسها في البيت عندها آخر الأسبوع...  
قالوا هيعملوا حفلة بسيطة.

مازن: وليه السريعة دي... أنت فكرت كويس!!!

شريف: اللي يشوفك وأنت بتتكلم عنها وكبرت الموضوع في  
نفوخي ما يشوفك دلوقتي... شكلك بتتهرب من البدلة اللي  
وعدتني بيها... انسى... هتجيبها يعني هتجيبها.

في الشركة كانت ريم مشغولة مع العملا وترتيب الفايالات  
والعقود... بس لقت واحد واقف أدامها بيتسألها: حضرتك آنسة  
ريم!!!!

ريم: أيوة يا فندم تحت أمرك.

الشخص: الورد ده جاي لحضرتك وكمان العلبه دي.

ريم: ورد!!!! من مين!!!!

الشخص: الكارت موجود على الورد من فضلك وقعلي هنا.

وقعت ريم بالاستلام وأخذت الورد والعلبة... كان ورد رقيق أوي  
وعليه كارت مكتوب فيه «أحبك حباً جعل السماء تبكي ندى على  
الورود... وحبني لكي جعلني أراكي ملكة البحور... ولكنني لست

ملكاً يا سيدتي... فأنا خادم قلبك على مر الدهور... شريف» كان الكارت عليه ريحة برفانه اللي شمته في صالون بيتهم... أد إيه رقيق وحساس... وفتحت العلبة لقتها مليانة صوابع زينب... زي ما قالت له إنها بتحبها كان جواها أحاسيس كتيير... إحساس أد إيه شريف رقيق ويحاول يسعدها... وأد إيه قرفانة من مازن اللي كان سبب في كل اللي هي فيه ده... واللي واحشها في نفس الوقت... مشاعر كلها متناقضة بس حساها كلها.

رن تليفون مازن وهو في العربية ولقى إن شريف هو اللي بيتصل بيه: هه... عاوز إيه!!!

شريف: حبيبي وعم عيالي والله.

مازن: انتنجز... أكيد في طلب.

شريف: إوعى تفهمني صح... خدمة لأخوك حبيبي... أنا كنت مدي ميعاد لريم علشان تنزل تجيب فستان حفلة الخطوبة..... بس رئيس الجامعة طق في دماغه يعملنا اجتماع... فمعلشي عدي عليها لأن زمانها واقفة في الشارع وموبايلها غير متاح.

كان مازن طاير بالعربية رايح لها... أخيراً هيشوفها... أخيراً هيتكلم معاها... لقاها واقفة مستتية في المكان اللي شريف قاله عليه... اتصدمت إن مش دي عربية شريف... دي عربية مازن...

هي عارفها كويس بس قالت إنه ممكن يكون معدي صدفة  
لكنها اكتشفت إنها مش صدفة لما ركن أدامها وقالها: شريف  
مش جاي... وقالني آجي أخدمك.

كلمته من برة العربية: طيب أنا هكلمه.

مازن: مش جاي ومش هيرد... عنده اجتماع مع رئيس  
الجامعة... وبعدين اركبي الناس تقول إيه وأنت واقفة بتكلميني  
كده... أو يفتكروا إنني بعاكس... من فضلك اركبي.

اضطرت ريم إنها تركب... يااااااا... ريحة برفانه وحشتها...  
خلاها ترجع فلاش باك لورا أيام ما كانت بتشمه في الشركة...  
قاعدة في عربيته... قريب منه... بس فاقت لما افتكرت إن ده  
مش كرسيها ولا مكانها... ده كرسي ومكان مراته... أكيد التابلوه  
ده في حاجة تخصصها... أكيد مراته لما بتقعد بتبص في المراية  
دي... يااااه... دي حتى بتغير على عربيته مش عليه هو بس.

قاطع تفكيرها وقالها: مبسوطه!!!

ريم: يارب أنت اللي تكون مبسوط بعد كل اللي عملته.

مازن: أنا عارف إنني غلطت وانهاردة حاولت أخلي شريف  
يأجل الخطوبة لكنه رفض.

ريم: ومين قالك إن بابا أصلاً هيوافق يأجل معاه بعد ما اتفقوا... كفاية إنك السبب في إن يبقى في مشكلة بيني وبين بابا لأول مرة.

مازن: ريم حاولي تفهميني... أنا عملت كده علشان....

ريم: أرجوك... أنا مش عاوزه أتكلم في حاجة... وبعدين أنت ماشي بينا على فين... أنا كنت متفقة مع شريف إننا هنجيب فستان والمحلات مش من الشارع ده.

مازن: أنا حابب أقعد معاكي في مكان نكمل كلامنا.

ريم: ولما أخوك يتصل ويسأل أنتوا فين!!!! هتقولوا في مكان!!! من فضلك وديني المكان اللي كنت فيه... وإلا هنزل وآخد تاكسي.

سؤال ريم خلى مازن مينطقش كلمة بعد اللي قالته... ولف ورجع للشارع اللي موجود فيه محلات فساتين الخطوبة والجواز والسواريهات... نزلت ريم من العربية لقت مازن بيركن ونازل معاها...

سألته: أنت رايح فين!!!

مازن: هفضل معاكي.... شريف قالي أوصلك وأستاكي وأروحك، دخلت ريم محل من المحلات... بس قبل ما تتفرج على

أي فستان عملت مكاملة تليفون... وبدأت تتفرج على الفساتين  
وتفتكر أيام ما كانت برده نازلة تدور على فستان أيام خطوبتها  
الأولى... كان نفسها المرة دي تتفرج وهي فرحانة عن المرة اللي  
فاتت... أمال إحساسها هيكون إيه وهي بتختار الفستان الأبيض!!!

دخلت ريم أكثر من محل... لحد ما جالها اتصال على  
موبايلها... وصفت للي بيتصل عنوان واسم المحل اللي هي فيه...  
وبعد دقائق اتفاجئ مازن... لما لقي غدير داخله نفس المحل اللي  
هما فيه مازن وشه اصفر وسأل في ارتباك: خير إيه اللي جايبك  
هنا!!!

غدير: دي ريم قالت لي إن أنتوا هنا وشريف عنده اجتماع  
وطلبت مني آجي أنقي فستان معاها... وكمان اقترحت إنني أدور  
على حاجة سواريه لأن كل سوارياتي متفغنيش دلوقتي مع الحمل.

وهنا ريم سحبت الكلام وقالت: تقدر تتفضل دلوقتي يا  
مستر مازن... أنا مش عاوزة أعطلك أكثر من كده.... وعموماً  
أنا هروح مع غدير.

فهم مازن الرسالة اللي حابة ريم إنها توصلها له ومشى من  
المحل بهدوء بس كان جواه بركان من الغضب من تصرف ريم اللي  
مجاش على هواه.



oboiikan.com

# أحاسيس في صندوق (الحلقة التاسعة)

اتجمد مازن في مكانه وسألها: قالت لك!!! قالت لك إيه  
بالظبط!!!

ردت غدير: قالت لي إنك عارف إنها كانت مخطوبة ومع  
ذلك مقولتش لشريف... أنت ليه خبيت عليه!!!

أخذ مازن نفسه ورد: أنا مخبتش ولا حاجة بس ماجتش  
مناسبة.

غدير: على العموم هي هتقوله... هي قالت مش هتخبي  
عليه حاجة ورن موبايل مازن بنمرة عمرو مدير حسابات المصنع...  
ورد عليه.

مازن: ألو... أستاذ عمرو... أهلاً بيك.

عمرو: أهلاً يا فندم... أنا بس حبيت أبلغك إننا سلمنا  
الطلبية من دقايق... آخر عريية حملناها طلعت من شوية...  
والتاجر إداني الشيك وكله تمام.

رد مازن: والله العمال دول جدعان إنهم خلصوا الطليبة في الوقت القياسي ده... أنا كنت ابتديت أفقد الأمل... وكنت هقولك حضر مبلغ الشرط الجزائي اللي في العقد علشان مش هنلحق وكمل: من فضلك يا أستاذ عمرو اصرف للعمال شهر مكافأة علشان تعبهم ده.

غدير كانت سامعة حوار مازن وادخلت وردت: شهر مكافأة!!!!  
ليه إن شاء الله!!!!

مازن: العمال خلصوا الطليبة في وقت قياسي... وعلى فكرة مبلغ الشرط الجزائي اللي كنا هندفعه أضعاف مكافأة الشهر دي... هما يستاهلوهما. غدير: لا ما هو مش مال سايب علشان ترميه يمين وشمال.

مازن: والدتك كلفتني إني أمسك المصنع... وأنا بعمل اللي شايفه في مصلحة الشغل.

غدير: والله لما يبقى مالك ابقى بعزته زي ما تحب... ما هو المال السايب يعلم السرقة.

مازن: سرقة!!!! وسرقة دي بقى تقصديني أنا بيها بقى ولا العمال!!! غدير: والله اللي على راسه بطحة بقى.

مازن: بطحة!!! ده جزائي يا هانم اني ماسك مصنعكم... من  
بكرة أنا راجع شغلي في الشركة... وشوفولكوا حد تاني بقى...  
أنت خسارة فيكي أي حاجة تتعملك.

غدير: خسارة!!! الخسارة ليا أنا... أنت مكنتش تسوا...  
ولا كنت تحلم إنك تمسك مصنع زي ده غلى الدم في عروق مازن  
ورفع إيده يضربها بالقلم لكنه فرمل نفسه ووقف إيده في الهواء.  
غدير: وكمان عاوز تمد إيدك عليا!!! أنا عند ماما... ولما  
تعرف قيمتي تعالالي أنا هناك.

وفي دقايق كانت غدير لمت هدومها في شنطة وسابت البيت  
ومشيت. في أسانسير الشركة تاني يوم أول ما دخلت ريم شمت  
ريحته... بس بدل ما تفرح زي العادة قلبها اتقبض... يا ترى  
جاي ليه!!! دخلت لقت مكتبه منور... وهو قاعد عليه... و  
بقية أصحابها بيهنوه بالرجوع للشغل تاني... واضطرت إنها  
كمان تدخل تهنيه بالرجوع زيها أصحابها تجنباً لأي شبهة...  
وخاصة كمان إن الكل عارف إن أخوه خلاص هيخطبها.  
ريم: مستر مازن... حمد الله على السلامة مكتبك نور.

مازن: الله يسلمك يا ريم... اتفضلوا يا جماعة على شغلکم...  
واستي أنت يا ريم... عاوز أعرف الفترة اللي فاتت من الشغل  
إيه حصل؟؟

خرج الكل من مكتبه إلا ريم اللي كانت عارفة ومتأكدة إنه  
مش عاوزها في شغل ولا حاجة وبدأت هي الكلام: إيه رجعتك  
تاني وسبت المصنع ليه!!!

مازن: ويا ترى رجوعي ده فرحك ولا زعلك!!!

ريم: من فضلك متردش على سؤال بسؤال.

مازن: أنا سبت المصنع يا ريم... و غدير كمان سابت البيت...  
خلاص يا ريم مشاكلنا كلها هتتحل... أنا قررت أطلقها... أنا  
مش قادر أكمل معاها أكثر من كده... ولا قادر أبعد عنك أكثر  
من كده.

ريم: وابنك!!!!!!

مازن: ابني لما يعيش بين اتنين محترمين بعض أحسن ما  
يعيش في مشاكل كل يوم... ولما يبلغ سن الرشد يختار يعيش  
معاها ولا معايا.

ريم: وشريف!!!

احمر وش مازن وسألها: شريف!!!! ماله شريف!!!!

ريم: هتقوله إيه!!! هه.. رد عليا هتقوله إيه!!!! هتقوله أنا كنت  
حاجز خطيبتك لحد ما أطلق مراتي وأتجوزها!!!! ولا هتقوله أنا

عارف إني خطبتها ليك وإنك حبتها بس معلىش هاخذها أصلي  
حبيتها الأول ولا هنتعدني في بيت واحد معاه إزاي.... بلاش...  
هتحت إيدك في إيد بابا إزاي تقرأ فتحتي بعد ما حطيت إيدك  
في إيده وقرئت فتحتي على أخوك.

ودمعت ريم وكملت كلامها: جه الوقت اللي تحصد نتيجة  
تصرفك الأناني... أنت بوظلت الدنيا خلاص ومعدش ينفع إنك  
تعديلها وسكتت ثواني كأنها بتجمع شجاعته وقالت له: أنا بحب  
شريف... ومش هسيبه علشانك ولا علشان حد.... ولو مبعدتش  
عني... أنا هعرفه كل حاجة... لو حابب تخسر أخوك اللي  
معتبرك في منزلة أبوه... خلاص براحتك.

كلام ريم كان بالنسبة له صادم.... مكانش متوقع أبداً إن  
يكون ده ردها... كان فاهم إنها هتفرح... كان فاهم إنها كانت  
هتفكر معاه إزاي يطلعوا من الموقف كده من غير ما يخسر أخوه  
ولا أبوها ولا ابنه.... بس نسي إن محدش أبداً بيكسب كل حاجة  
وقبل ما ميعاد الشغل يخلص... كانت ريم مكلمه شريف إنها عاوزاه  
يعدي عليها ضروري بعد الشغل شافهم مازن تحت الشركة وريم  
بتركب معاه... ولما شافه شريف نده عليه: زيزووو.... ما تركز  
وتيجي معانا أحسن... هعزمك متخافش أنا عارف إنك جلدة.

شاور له مازن من بعيد وركب عربيته ومشى.... يا ترى ريم  
هتلكي له حاجة فعلاً!!!!

وبمداعبة بص شريف لريم وقالها: ده نهار الهنا ده نهار  
المنى... البرنسيصة هتخرج معايا!!! يا فرحتك يا ابن سهير.

بصت له ريم وقالت له: ممكن توديني بيت أهل غدير!!!

شريف: بيت غدير!!!! ليه في إيه!!!!

ريم: مفيش كنت عاوزاها في موضوع وهي قافلة موبايلها.

اتفاجئت غدير لما لقت ريم عندها في البيت... وبدأت ريم  
كلامها: أنا عارفة إننا ملحقناش نبقى صحاب... بس أنا اعتبرتك  
زي منى أختي.... وسامحيني في اللي هقوله... مش تدخل في  
خصوصيات نهائي بس حال مستر مازن انهاردة كان صعب أوي.

غدير: ليه ماله!!!!

ريم: كان متأثر جداً ومكتئب ولما زينت عليه أوي في الكلام  
علشان أعرف ماله عرفت إن حصلت بينكم مشكلة امبارح وجيتي  
هنا عند مامتك... أنا معرفش إيه اللي حصل ومش عاوزة أعرف  
ولا هو حكالي... بس حاله لو دل على حاجة فيدل على أد إيه  
هو بيجبك.

وكملت ريم كلامها وهو فيه غصة الدنيا كلها وبتحاول تداري  
كذبها: مازن بيحبك أوي... ويحب ابنه اللي جاي علشان منك....  
إوعي تخسريه.... متخسريش حد بيحبك.

وخذت ريم شنطتها وقامت في هدوء: أنا كده قولت اللي  
عندي.... وعارفة وواقعة إنك هتتصرف صح.

في الوقت ده كان مازن في البيت لوحده بي فكر في كلام ريم....  
يعمل إيه... يطاوعها ويعيش عمره كله تيعس سواء كمل مع غدير  
أو سابها.... ولا يفجر القنبلة ويخلص وأهي كل حاجة بتاخذ  
وقتها وأكد أخوه هيسامحه بعد فترة وينسى وخصوصاً إنه لو  
حصل واتجوز ريم هياخدها ويعيش برة مش في نفس البيت مع  
أمه ومع شريف، راح شقة مامته ودخل على شريف في أوضته  
وقاله: أنت عارف أنا بحبك أد إيه صح!!!

شريف: معيش فلوس على فكرة.... انسسسى.

مازن: لما أبوك مات... مع إنني كنت لسه في ابتدائي بس  
حسيت ساعتها إنك ابني وإنني أبوك.

حس شريف إن مازن بيتكلم بجد وكلام مهم وكبير.... قعد  
جمبه على السرير وبصوت كله قلق سأل مازن: مالك يا مازن في  
إيه!!! أنا أول مرة أشوفك بتكلم كده.... قلقتني.

مازن: قبل ما أنطق بكلمة أنا بس عاوز أكذلك.... إن  
مفيش حاجة في الدنيا ممكن تفرق بينا.

وجمع مازن كل نقطة شجاعة جواه وقال لشريف: الحكاية  
من أولها إن ريم.....



## أحاسيس في صندوق (الحلقة العاشرة والأخيرة)

وجمع مازن كل نقطة شجاعة جواه وقال لشريف: الحكاية  
من أولها إن ريم.....

شريف: أوبياااا... فكرتني... أنا نسيت أشوف ريم رجعت من  
عند مراتك ولا لأ.

استغرب مازن ورد: مراتي!!!! وإيه اللي ودى ريم عند مراتي!!!!  
شريف: معرفش هي قالت لي إنها عاوزاها في موضوع ومش  
عارفة توصلها لأنها قافلة الموبايل.

قلق مازن وقتها.... هي هددته إنها هتحكي لأخوه كل حاجة  
لو مبعدهش عنها... وقالت له كمان إنها بتحبه... معقول تكون  
حكيت لغدير على كل حاجة!!!!

دور على الموبايل في جيبه ملقاهوش... افتكر إنه ساييه في  
شقتة.... قام بسرعة... بس شريف سأل باستغراب: طب أقعد  
كامل كلامك... أنت مش كنت بتقول عاوزني في حاجة مهمة!!!!  
رد مازن وهو طالع من أوضة شريف: بعدين... بعدين.

راح شقته وأخذ الموبايل... حاول يكلم ريم لكنها مردتش زي العادة... أما غدیر فكانت برده قافلة موبايلها... مكانش عارف يعمل إيه ولا يتصرف إزاي نزل أخذ عربيته وقعد يلف في الشوارع من غير هدف... مكانش شايف ولا سامع حاجة... مكانش حتى قادر يفكر... وجات رنة موبايله فوقته برقم شريف ورد عليه: عاوز إيه!!!

رد شريف بصوت بيترعش: الحق ماما يا ماالازن.

مازن بصوت مذعور: في إيه... إيه اللي حصل!!!!!!

شريف: معرفش... أغمي عليها وأنا رايح بيها المستشفى أهه.

مازن: طيب أنا ثانية وهكون عندك.

دخل مازن لقي شريف واقف مستني بقلق أدام الطوارئ... وقبل ما يسأله كان الدكتور طالع بيقولهم: يا جماعة للأسف الحاجة عندها جلطة في المخ.... ولازم لنا حقنة حالاً لتدويب الجلطة.. لكنها ناقصة في السوق بصراحة.

سأل مازن: طب والحل يا دكتور!!!!!!

الدكتور: حاجة من اتنين.. يا تجيبوها من السوق السوداء أو حد يجيبها من بره بسرعة... وعموماً هي هتطلع العناية المركزة وهنحاول نديها حاجات متزودش الحالة.

وسابهم الدكتور ومشى سايبهم باصين لبعض وكل واحد فيهم بيسأل الثاني بعينيه... والعمل إيه!!!

نطق شريف: أنا هكلم كل أصحابي الصيادلة واللي شغالين في شركات أدوية.

مازن: وأنا كمان هعمل اتصالاتي ولو وصلت لحاجة بلغني وبدأوا الاتنين يدوروا ويسألوا.

ورن موبايل شريف برقم ريم: ألو... إزيك يا شريف... هه... هتعددي عليا نجيب البدلة ولا إيه!!!!

شريف: معلشي يا ريم مش هينفع.

ريم: مالك يا شريف!!!!!! صوتك عامل كده ليه!!!!!!

حكى شريف لريم على اللي حصل لماتته وعلى إنه هو ومازن بيدوروا على الدوا..... اللي لقتها ريم فرصة حلوة أوي إنها تبلغ غدير باللي حصل وتكون جمب مازن في الموقف ده وفعلاً بلغت ريم غدير اللي عملت اتصالاتها وبالفعل لقت الدوا... لكنها مبلغتش مازن.... هي راحت المستشفى على طول.

اتصل شريف بالدكتور في المستشفى يطمئن على حالة سهير  
وكم ان يعرف الدكتور ان في أمل انه يلاقي العلاج المطلوب.

الدكتور: يا فندم مدام غدير جابت العلاج والحاجة فاقت  
وحالتها مستقرة إن شاء الله... احنا بس هنسيبها في العناية ٤٨  
ساعة نطمئن... ولو الحالة مستقرة هتنزل أوضة عادية إن شاء الله.

أول مرة شريف يعرف يعني إيه دموع فرح.... أمه هي كل  
حياته بعد ما والده توفى وهو صغير لكن مازن هو اللي كان في  
حالة ذهول من موقف غدير لما شريف حكاله على اللي عملته  
وإنها أنقذت حياة مامته... حاول يكلمها علشان يشكرها لكنها  
برده كانت قافلة الموبايل، مرت أيام وحالة سهير استقرت... و  
فترة وجودها في المستشفى كانت ريم وغدير بيزوروها يومياً اللي  
خلاههم يقربوا من بعض أكثر ومن سهير اللي كانت من وقت  
للتاني لما بتنفرد بسهير كانت بتكلمها على إن أد إيه مازن بيحبها  
وإنها المفروض تكسبه أكثر من كده ونصايح كتير.... كانت سهير  
بتنصحها زي بنتها مش زي حماتها.... اللي خلى غدير فعلاً تفكر  
في كلام سهير وتحاول إنها تطبقه وفي البيت عند سهير كانت ريم  
مسنداها بعد ما خرجت من المستشفى وبتقول لها: نورتي بيتك  
يا طنط.

ضحكت سهير ووجهت كلامها لمازن: روح شقتك يا زيزو هاتلي العكاز من عندك أنا كنت سايباه هناك وبصت بصة لشريف لأنهم كانوا فاهمين..... راح مازن وفتح الشقة ونور النور.... لقي بالونات وزينة وتورته على السفرة ولقى كمان غدير واقفة... كان شكلها رقيق على غير المعتاد.... وكانت ماسكة هدية في أيديها... وعلى استحياء قالت له: كل سنة وأنت طيب. على فكرة لقي مازن سهير وشريف وريم وراه واللي مكانتش تعرف حاجة عن المفاجأة اللي محضرها غدير وشريف ومامته علشانه بمناسبة عيد ميلاده واللي لقوه فرصة إن غدير ترجع البيت ثاني، قريت غدير من مازن بعلبة صغيرة فتحتها أدامه وكان فيها شوز بيبي لونه أزرق وقالت له: الدكتوراة قالت لي إنه ولد.

كانت ريم مكسورة أوي وقتها... متعرفشي غيرانة ولا غضبانة ولا صعبان عليها نفسها ولا إيه... لدرجة إنها استأذنت ومشيت بحجة إنها تسيب سهير ترتاح بعد ما خرجت من المستشفى بعدها بأيام كان شريف بيكلم ريم بيتفق معاها إنه هيعدي عليها بعد الشغل ينزلوا يجيبوا بدلته لأنهم أجلوا الخطوبة بما فيه الكفاية بسبب تعب سهير وظروف مازن بعد الشغل. كانت ريم مع شريف بيلفوا على المحلات وجه اتصال لشريف وكان بيرد: إيه ده بجججججد!!!!!! كمان!!!!!! مبروووووك يا ماما..... أنا جاي أنا وريم أهه.

ريم: خير في إيه!!!!

شريف: مش هتصدقى... غدير ولدت.

حست ريم إن حد كب عليها ميه بتغلى... ياااااه.... إيه الإحساس ده... ولدت!!! يعني بقى في حنة من مازن منها على وش الدنيا.... يعني حاجة بتربطهم سوا.... حاجة هتكون السبب إن اسم مازن وغدير يبقوا في شهادة ميلاد واحدة.... حست وقتها إنها مخنوقة.... وإنها مش قادرة تكمل تمثيل أكثر من كده.

كمل شريف كلامه: أنتِ مش سمعاني ولا إيه.... بقولك تخيلي سمت البيبي إيه!!!! سمته مازن بعد ما كانت مصررة إنها تسميه على اسم باباها.

لكن ريم كانت في دنيا تانية خالص... وبصت له وقالت له بصوت مخنوق: أنا مش قادرة أكمل.

رد عليها شريف: احنا فعلاً بقالنا ساعة نلطف... خلينا نرتاح شوية نشرب حاجة ونكمل وبعد كده نطلع على غدير في المستشفى.

لكن ريم قاطعته: شريف... أنا.. مش قادرة أكمل أكثر من كده... أنا أسفة بجد... وكملت وهي منهارة.... الدنيا دي وحشة أوي.... بتخلينا نقابل ناس صح في وقت غلط.

سألها شريف وهو مستغرب: ريم أنا مش فاهم حاجة .

ردت ريم: والأحسن إنك متفهمشي.... علشان أنت بالذات مينفعشي تفهم.... ياريتتي قابلتك في وقت تاني أو زمن تاني.. أكيد كانت هتبقى كل حاجة أحسن من دلوقتي.

وقبل ما ينطق شريف كانت ريم سايباه وماشيه... ريم مقدرتش تكمل لأنها مقدرتش تظلم شريف زي ما مازن ظلمها.... ولا زي ما القدر ظلمها وظلم مازن وظلم شريف، مقدرتش تكمل مع واحد وهي قلبها مع واحد تاني... والواحد التاني ده مش بعيد... ده كان هيبقى عم ولادها في يوم من الأيام كانت عارفة إنها خسرت كثير... خسرت مازن وخسرت شريف وخسرت شغلها وخسرت أيام هتعيشها في مشاكل مع أهلها بسبب رفضها لشريف... لكنها كسبت نفسها يمكن هتعيش سنينيين حب مازن في قلبها... وحب شريف في عقلها... وهتعيش سنين فاكرة قصة كانت هي بطلتها... أينعم مكانتش نهايتها زي ما بتتمنى بس أكيد هو ده الخير مادام ربنا كاتبهولها.

ريم فقلت قصتها.... خرجت منها مكسورة.... خرجت منها مجروحة... وخرجت منها كلها مشاعر وأحاسيس.... لكنها أحاسيس مخرجتش للنور.. كانت أحاسيس في صندوق.

**تمت بحمد الله**

obseikan.com

## الصفحة

## الفهرس

٥ .....إهداء:

٧ .....مقدمة:

### أبيض وأسود

١١ .....أبيض وأسود الحلقة الأولى:

١٩ .....أبيض وأسود الحلقة الثانية:

٢٩ .....أبيض وأسود الحلقة الثالثة:

٣٧ .....أبيض وأسود الحلقة الرابعة:

٤٥ .....أبيض وأسود الحلقة الخامسة:

٥٣ .....أبيض وأسود الحلقة السادسة:

٦٣ .....أبيض وأسود الحلقة السابعة:

٧١ .....أبيض وأسود الحلقة الثامنة:

### كوما

٨١ .....كوما (الحلقة الأولى):

٨٩ .....كوما (الحلقة الثانية):

٩٧ ..... كوما (الحلقة الثالثة):

١٠٥ ..... كوما (الحلقة الرابعة والأخيرة):

### ١١٣ ..... **شنطة مشاعر**

١١٥ ..... شنطة مشاعر (الحلقة الأولى):

١٢١ ..... شنطة مشاعر (الحلقة الثانية):

١٢٩ ..... شنطة مشاعر (الحلقة الثالثة):

١٣٧ ..... شنطة مشاعر (الحلقة الرابعة):

١٤٥ ..... شنطة مشاعر (الحلقة الخامسة):

١٥٣ ..... شنطة مشاعر (الحلقة السادسة):

١٦١ ..... شنطة مشاعر (الحلقة السابعة):

١٦٩ ..... شنطة مشاعر (الحلقة الثامنة):

١٧٩ ..... شنطة مشاعر (الحلقة التاسعة):

١٨٧ ..... شنطة مشاعر (الحلقة العاشرة والأخيرة):

### ١٩٥ ..... **أحاسيس في صندوق**

١٩٧ ..... أحاسيس في صندوق (الحلقة الأولى):

- ٢٠١ ..... أحاسيس في صندوق (الحلقة الثانية):
- ٢٠٩ ..... أحاسيس في صندوق (الحلقة الثالثة):
- ٢١٧ ..... أحاسيس في صندوق (الحلقة الرابعة):
- ٢٢٥ ..... أحاسيس في صندوق (الحلقة الخامسة):
- ٢٣٣ ..... أحاسيس في صندوق (الحلقة السادسة):
- ٢٤١ ..... أحاسيس في صندوق (الحلقة السابعة):
- ٢٤٩ ..... أحاسيس في صندوق (الحلقة الثامنة):
- ٢٥٧ ..... أحاسيس في صندوق (الحلقة التاسعة):
- ٢٦٥ ..... أحاسيس في صندوق (الحلقة العاشرة والأخيرة):

حقوق الطبع محفوظة للناشر



أطلس

للنشر والإنتاج الإعلامي

يحظر نشر أو اقتباس أى جزء  
من هذا الكتاب إلا بعد الرجوع  
إلى الناشر